

# San Mateo

---

**Jesucristo Cohãcjũ macũno tiquiro acaye panopũ cjẽna ijire**  
(Lc 3.23-38)

**1** <sup>1</sup>Jesucristo acayere panopũ cjẽnare yahutja yũhũ. Tiquiro ñecũno mũnano panopũ cjũno Davi wame tiriquire ijie tiahye. Tiquiro ijiato pano tiquina ñecũno mũnano iji turiariquire Abrahã wame tiriquire ijie tiahye.

<sup>2</sup>Abrahã Isaac pacũro ijiahye. Isaac Jacob pacũro ijiahye. Jacob Judã gãhũ pacũro ijiahye. <sup>3</sup>Fare, Zara mehna tiquina pacũro Judã ijiahye. Tiquina pacoro Tamar wame tiricoro ijiahye. Fare Esrom pacũro ijiahye. Esrom Aram pacũro ijiahye. <sup>4</sup>Aram Aminadab pacũro ijiahye. Aminadab Naasũn pacũro ijiahye. Naasũn Salmũn pacũro ijiahye. <sup>5</sup>Salmũn Booz pacũro ijiahye. Tiquiro pacoro Rahab ijiahye. Booz Obed pacũro ijiahye. Tiquiro pacoro Rut ijiahye. Obed Isaĩ pacũro ijiahye. <sup>6</sup>Isaĩ Davi pacũro ijiahye. Davi pehe Israe masa pũthoro ijiahye. Tiquiro Uria wame tiriquire mũnano namonore tiquiro namo tiri bato Salomo wame tiriquire pohna tiahye.

<sup>7</sup>Salomo Roboam pacũro ijiahye. Roboam Abia pacũro ijiahye. Abia Asa pacũro ijiahye. <sup>8</sup>Asa Josafat pacũro ijiahye. Josafat Joram pacũro ijiahye. Joram Uzia pacũro ijiahye. <sup>9</sup>Uzia Jotam pacũro ijiahye. Jotam Acaz pacũro ijiahye. Acaz Ezequia pacũro ijiahye. <sup>10</sup>Ezequia Manase pacũro ijiahye. Manase Amũn pacũro ijiahye. Amũn Josia pacũro ijiahye. <sup>11</sup>Josia Jeconia gãhũ pacũro ijiahye. Tiquina ijiri pjere Israe yehpa cjẽnare Babilonia cjẽna pehe ñehe cãhye tiquina ya yehparũ.

<sup>12</sup>Sa ye Babilonia yehparũ tiquina esari bato, Jeconia Salatiere pohna tiahye. Salatiel Zorobabel pacũro ijiahye. <sup>13</sup>Zorobabel Abiud pacũro ijiahye. Abiud Eliaquim pacũro ijiahye. Eliaquim Azor pacũro ijiahye. <sup>14</sup>Azor Zadoc pacũro ijiahye. Zadoc Aquim pacũro ijiahye. Aquim Eliud pacũro ijiahye. <sup>15</sup>Eliud Eleazar pacũro ijiahye. Eleazar Matãn pacũro ijiahye. Matãn Jacob pacũro ijiahye. <sup>16</sup>Jacob Josẽ pacũro ijiahye. Josẽ Marĩa manũno ijiahye. Marĩa pehe Jesu pacoro ijiri. Jesu pehe masare yũhũoatiquiro ijiro, Cristo tiquina ni pisuriquire ijiri.

<sup>17</sup>Sa yeye Abrahãre mari queo mũhtagũ tee Davire mari queo bato tigũ ahriquina ijipihyeyquina tiquina panamena mehna ijie, catorce cururi waro

ijiahye. Sa yeye mari pari turi Davire mari queo mūhtagū tee Babiloniapū Israe masare tiquina neato pano mari queo bato tigū ijipihtiyequina tiquina panamena mehna ijiye, catorce cururi waro pari turi ijiahye. Sa ye tuhasa Babiloniapū tiquina esari bato mari queo mūhtagū tee Cristo tiquiro masa bajuagūpū mari queo bato tigū ijipihtiyequina tiquina panamena mehna ijiye, catorce cururi waro ijiahye tja.

### Jesucristo tiquiro masa bajarire yahuahye

(Lc 2.1-7)

<sup>18</sup>Sa ye ohō saha Jesucristo masa bajuari jiri. Tiquiro pacoro María pehe José mehna omoca dūhteaticoro ijiahye. Sa yero ticoro omoca dūhteato pano Espiritu Santo tutuaye mehna coā nijinogāre ne bucua cāhtaro masiahye ticoro basi. <sup>19</sup>Sa yero José ticorore omoca dūhteatiquiro tire masino, potō ijiyere yeriquiro ijiro ticorore cohāno taro nimahye. Masa tiquina ihñono ticorore būoro ye dueraro, masa tiquina tūhoato pano yahuro marieno ticorore cohāno taro nimahye. <sup>20</sup>Tire tiquiro tūhoturi watoa Cohācjū yaquiro angel pehe quehēnopū Josére bajuaro, ohō saha niahye:

—José, Davi mūnana panami iji turiagu, María mehna bue tiro marieno omoca dūhteya. Ticoro Espiritu Santo yedohoro mehna coā nijinogāre ne bucua cāhtaricoro ijire. Sa yegu bue tiro marieno omoca dūhteya ticorore. <sup>21</sup>Ticoro pohna tirota. Tiquirota ticoro macūnota tiquiro ya maca cjēnare pecapū wahaboriquinare yūhdūoatiquiro ijirota. Tiquiro sa yūhdūoatiquiro ijigū ihñagū Jesu wame yegūta mūhū tiquirogāre, niahye angel Josére.

<sup>22</sup>Ahri ijipihtiye sa wahahye panopū cjūno Cohācjū yere yahu mūhtariquiro tiquiro ni ojoariro sahata. Tire tiquirore Cohācjū ojoa dutiahye. Ohō saha ni ojoahye Cohācjū yere:

<sup>23</sup>Nuhmino, nijinogāre bocaro pohna tirota ticoro macūnogāre. Sa yero Emanuel wame tirota tiquirogā, ni ojoahye Cohācjū yere.

“Emanuel” nino “Cohācjū mari mehnata ijire”, nino niaga.

<sup>24</sup>Cohācjū yaquiro angel Josére tiquiro ni yahuri bato José pehe wahcā, angel dutiriro sahata María mehna omoca dūhteahye. <sup>25</sup>Tiquiro macūnogāre ticoro pohna tiato pano José pehe ticoro mehna ijiera tiahye. Ticoro pehe pohna tia wahahye. Sa yero tiquiro pehe macūnogāre Jesu wame yeahye.

### Asū mūja taro cjēna Jesugāre ihñāne esahye

**2** <sup>1</sup>Herode Judea yehpa cjēna pūhtoro tiquiro ijiri pje ti yehpapū ijiri macapū Belēpū Jesu masa bajuahye. Tiquiro sa masa bajuari bato nāhpicohare buheyequina nāhpicohare quehnoano masiñequina asū mūja taro cjēna ahta, Jerusalēpū wihiahye. <sup>2</sup>Sa wihiye, masare to cjēnare sinituahye:

—¿Judio masa pūhtoro ijiatiquiro yojopūre nohopū masa bajuagari tiquiro? Asū mūja taropū cjāna ijiaja. Sa yena nāhpicoha coā baja wahā sagū ihñana “Pūhtoro masa bajuaro niaga”, ni masii usā. Sa tia bajuagū ihñana, usā ihcāno mehna tiquirore ño peona ahtaū ohōpū, ni, yahuahye buheyequina masare.



(San Mateo 2.2)

<sup>3</sup>Sa ye apequina Herodere tire yahuahye. Tiquina sa yahugū tūhoro Herode pehe bujua witi tūhotuahye. Sa yeye ijipihtiyequina Jerusalē cjēna gūhū tiquiro yero sahata bujua witi tūhotuahye tiquina gūhū. <sup>4</sup>Sa yero Herode pehe ijipihtiyequina pahia pūhtoare, mari judio masare buheyequina gūhūre tiquiro piji cahmecoa peho, tiquinare sinituahye tiquiro:

—¿Nohopū masa bajuaboagari Cristo pehe, mūsa tūhotugū? ni sinituahye tiquiro.

<sup>5</sup>Ohō saha ni yahuahye tiquirore:

—Belēpū, Judea yehparū ijiri macarū Cristo masa bajarota. Ohō saha ni ojoahye Cohācjū yere yahu mūhtariquiro:

<sup>6</sup>Belēpū yeequinare Israe masare dutiatiquiro, tiquinare cohteatiquiro ahtarota. Sa yero apeye macari Judea yehparū ijiye macari yūhūoro ijire Belē pehe, ni ojoahye Cohācjū yere, ni yahuahye tiquina Herodere.

<sup>7</sup>Tiquina sa ni yahuri bato Herode masa tũhoeropũ asũ mũja taropũ ahtariquinare pijioahye. Tiquiro cahapũ tiquina esagũ ihñano, tiquinare sinituahye. Tiquiro sa sinitugũ tũhoye, tiquina ñahpicohare ihñari decore yahuahye tiquina. <sup>8</sup>Tiquina sa yahuri bato Herode pehe tiquinare Belẽpũ ohoro, ohõ saha niahye tiquinare:

—Tiquirogãre quehnoano macaña. Tiquirogãre bocana yũhũre tojoana yahu tojoaya. Yũhũ gũhũ tiquirogãre ño peou wahau tũũ niaja, niahye tiquinare Herode.

<sup>9</sup>Tiquiro sa nidi bato, tiquina wahahye. Tiquina sa wahagũ asũ mũja taropũ tiquina ihñaria ñahpicoha pehe tiquina pano ỹhmũ tãducuahye. Sa yero nijinogã tiquiro ijero bui waro tojoa wahã sahye tia ñahpicoha. <sup>10</sup>Sa yeye ñahpicohare ihñañe, tutuaro bucueahye tiquina. <sup>11</sup>Nijinogã tiquiro ijiri wũhũpũ esa, sajãa wahahye tiquina. Sa sajã saye, nijinogãre tiquiro pacoro mehna ijiriquiregãre ihñahye tiquina. Sa ihñañe tiquina dũsepe curi mehna quehe sa, tiquirogãre ño peohye. Ño peo tuhasa tiquina acarire pũohye. Urure, bueyere, mirra wame tiye ehme sitye gũhũre ne wio, tire tiquirogãre wapa marieno ohoahye. <sup>12</sup>Tire oho tuhasa carĩa wahahye tiquina. Tiquina sa carigũ quehẽnopũ Cohãcjũ yahuahye tiquinare: “Herode cahapũ tojoeracãhña”, ni yahuahye Cohãcjũ tiquinare quehẽnopũre. Tiquiro sa ni yahuri bato, tiquina pehe wahcãhye. Tiquina sa wahcãri bato ape mahapũ tiquina ya dihtapũ tojoaa wahahye.

### José gũhũ Jesugãre Egiptopũ ne duhti cãa wahahye

<sup>13</sup>Tiquina sa wahari bato Cohãcjũ yaquiro angel quehẽnopũ Josere bajuaro, ohõ saha niahye:

—Wahcãña. Herode pehe nijinogãre wejẽno taro, macano nine yojopũre. Sa ye nijinogãre tiquiro pacoro gũhũre Egiptopũ ỹmũñano ne duhti cãa wahaya. Topũre yũhũ nidiro punota ijiya, tee yũhũ yahugũpũ, ni yahuahye angel Josere.



(San Mateo 2.11)

<sup>14</sup>Tiquiro sa nigũ tũhoro, José pehe ñamita wahcã, nijinogãre, tiquiro pacoro gãhũre Egiptopũ ne duhti cãa wahahye. <sup>15</sup>Egiptopũ esa, Herode catiro puno topũre ijiahye tiquina. Sa yeahye panopũ cjũno Cohãcjũ yere yahu mũhtariquiro tiquiro ni ojoariro sahata. Tire tiquirore Cohãcjũ ojoa dutiahye. Ohõ saha ni ojoahye Cohãcjũ yere: “Egiptopũ ijiriquirore yũhu macũre pijiou”, ni ojoahye Cohãcjũ yere.

### Herode macanagãre wejẽ dutiahye

<sup>16</sup>Sa ye ñahpicohare buheyequina tiquina duhti yũhdũ cãgũ tũhoro Herode pehe usua yũhdũa wahahye. Sa usuaro, Belẽ cjẽnare, ti maca dũhtũ caha cjẽna gãhũre tiquina pohnene mũmagãre pũa cũhma cũoyequinagãre wejẽ bato ti dutiahye tiquiro. Coã warore ñahpicohare buheyequina ñahpicohare tiquina ihñari decore yahuahye Herodere. Tiquina sa nigũ tũhoro tiquiro wejẽ duariquirogã masa bajuari decore masino, “Ohõpe cũhmari cũore” nino, pũa cũhma cũoyequinagãre wejẽ bato ti dutiahye. <sup>17</sup>Panopũ cjũno Jeremia Cohãcjũ yere yahu mũhtariquiro tiquiro ni ojoariro sahata wahahye. Ohõ saha ni ojoahye tiquiro:

<sup>18</sup>“Ramá wame tiropũ bisirota. Tutuaro bũjũa witiye mehna utiye bisirota. Raquel panamena numia iji turiaye numiapũ Israe masa namosãnumia tiquina pohnene tutuaro utieta. Tiquina pohnene apequina wejẽgũ ihñañe, ne bũjũa witi duhusi”, ni ojoahye panopũ.

<sup>19</sup>Sa ye Herode tiquiro yariari bato Egiptopũ ijiriquirore Josẽre Cohãcjũ yaquiro angel quehẽnopũ bajuahye. Sa bajuaro ohõ saha niahye Josẽre:

<sup>20</sup>—Nijinogãre wejẽ duamediquina yariaa wahari. Sa yegũ wahcãña. Tiquirogãre pacoro mehna Israe yehpapũ ne tojoaa wahaya mũhũ, ni yahuahye angel Josẽre:

<sup>21</sup>Tiquiro sa nidi bato José wahcã, nijinogãre pacoro mehnata Israe yehpapũ ne tojoaa wahahye. <sup>22</sup>Sa yeperota Arquelao Herode macũno pehe tiquiro pacũro comesariquiro ijigũ tũhoro José pehe Judea yehpapũ tojoa duaro cueahye. Sa yero pari turi tja quehẽnopũ tiquirore yahu nemoahye. Tiquirore pari turi Judea yehpapũ iji dutierahye. Tiquiro sa ni yahuri bato, tiquina Galilea yehpapũ waha wahahye. <sup>23</sup>Ti yehpapũre Nazare wame tiri macapũ ijiahye tiquina. Sa yeahye tiquina Cohãcjũ yere yahu mũhtariquina tiquina ojoariro sahata. Ohõ saha ni ojoahye: “‘Cristo Nazare cjũnota ijire’, nieta masa”, ni ojoahye Cohãcjũ yere yahu mũhtariquina panopũ cjẽna.

### Ñu wame yeriquiro masare yahuahye

(Mr 1.1-8; Lc 3.1-9, 15-17; Jn 1.19-28)

**3** <sup>1</sup>Sa ye ti pjere Ñu Cohãcjũ yequinare wame yeriquiro ijiahye. Judea yehpapũ masa marienopũ tiquiro Cohãcjũ yere yahu dũcahye masare. <sup>2</sup>Ohõ saha ni yahuahye tiquinare:

—Mũsa ñañe yerire bũjũa witiya. Tire duhuya. Ʋhmũse cjũno Cohãcjũ mũsa pũhtoro tiquiro ijiato mehenogã dũhsare, ni yahuahye tiquiro.

<sup>3</sup>Panopꝛ cǵũno Isaia Cohãcǵũ yere yahu mahtariquiro Ñu tiquiro buheatire ohõ saha ni ojoahye:

Masa marienopꝛ yahuducu sañuducuriquiro ohõ saha ni buherota tiquiro: “Mari pũhtoro ahtato pano mahare mari quehnoyuro saha quehnoana ijyuya m̄sa. M̄sa ñañe yerire b̄j̄ua witiya”, ni sañuducurota, ni ojoahye Isaia Ñure.

<sup>4</sup>Sa yero Ñu camello poari suhtirore sañariquiro, wahi quiro cahsero mehna tũã dihori quiro ijahye. Poreroare, n̄scũ cǵẽ umi gũhũre ihyae tiahye. <sup>5</sup>Jerusalẽ cǵẽna, ijipihtiro Judea yehparũ ijyiequina, Jordã wame tiri ma caharũ ijyiequina gũhũ tiquirore tuhoye ahtahye. <sup>6</sup>Wihi, tiquirore tuhõ, tiquina ñañe yerire b̄j̄ua witi, Cohãcǵũre tire yahu yãhdũahye tiquina. Sa tiquina yahugũ tuhoro Jordãpũ Ñu tiquinare wame yeahye.

<sup>7</sup>Sa yero peyequina fariseo masa, saduceo masa gũhũ Ñure tiquina wame ye dutiye ahtagũ ihãno tiquiro yahuahye tiquinare:

—Aña yero saha ña yãhdũana ijire m̄sa. M̄sa ñañe yerire b̄j̄ua witi duerana Cohãcǵũ m̄sa ñañe yeri buhiri tiquiro buhiri dahreato pano duhti masiedare m̄sa. <sup>8</sup>Sa yena potota m̄sa ñañene b̄j̄ua witiya. Quehnoañene comesaya. Sa yena quehnoañe pehere yeya m̄sa. <sup>9</sup>Ohõ saha ni tuhhotueracãhña: “Panopꝛ cǵũno Abrahã mari ñescũ m̄n̄ano ijie tiahye. Sa yena tiquiro panamena iji turiana ijina mari Cohãcǵũ yequina ijiaja”, ni, tuhhotueracãhña m̄sa. M̄sare niita njaja. Abrahã panamena iji turiana ijimene m̄sa. M̄sa sa ijiepegũta ti m̄sa sa ijyie dũhseati ijierare. Cohãcǵũ pehe ahri utã paca mehna Abrahã panamenare dojogũ ye masine. Sa yero Abrahã panamena iji turiana m̄sa ijyie ihyo waro ijire utã paca ti paca ihyo waro ijiro sahata. <sup>10</sup>Ohõ saha ijire: Masa yucãri yero saha ijire. Cohãcǵũ pehe yucãrre quẽatiare comeare c̄uoriquiro yero saha ijire. Sa yero ñañe dũca tiye cǵũre quẽ cohã, ti nuhcori gũhũre dũte surerota. Dũte sure tuhasa, pecarũ ẽj̄ũanota tiquiro ti cǵũre, nuhcori gũhũre. Sata yerota masa gũhũre tiquirore cahmeeñequinare. <sup>11</sup>Yũhũ bato yãhũ yãhdũoro tutuariquiro ahtarota.



(San Mateo 3.11)

Quehnoa yũhdũariquiuro ijire tiquiro. Tiquiro yero saha ijieraja yũhu pehe. Sa yegu tiquirore tũhotugu, “Thyo ijigu ijiaja yũhu”, ni tũhotuaja yũhu. Yũhu pehe masa ñañe yerire bũjua witi duti, mũsare wame yegu aco mehna yemi. Tiquiro pehe yũhu yũhdũoro yerota. Espĩritu Santore masa mehna ijiducugũ yerota tiquiro. Sa yero peca ñañene ỹjũa wero sahata tiquiro ahtariquiuro pehe masa ñañe yerire cose werota. <sup>12</sup>Yũhu bato ahtariquiuro cahseri cohãriquiuro yero saha ijire. Cahseri cohãriquiuro tiquiro batiro mehna ijipihtiye trigo cahserire puti were. Tiquiro sa puti weri bato trigo pehere tiquiro ihbori wũhũpũ ihborota. Sata yerota tiquina ñañene bũjua witiyequinare yũhu bato ahtariquiuro. Tiquiro puti weye cahseri pehere tiquiro ỹjũanota. Ti peca ỹjũari peca ne yatisi. Sata yerota tiquiro yũhu bato ahtariquiuro tiquina ñañene bũjua witiyequinare, ni yahuahye Ñu.

**Ñu Jesure wame yeahye**  
(*Mr 1.9-11; Lc 3.21-22*)

<sup>13</sup>Came Jesu Galileapũ ijiriquiro waha, Jordã wame tiri mapũ buha sahye Ñure wame ye dutiro. <sup>14</sup>Coã warore Ñu wame ye dueramahye.

—Yohou, mũhu pehe yũhu yũhdũoro tutuagu yũhu pehere mũhu wame yegũ quehnoaboaga. Mũhũre wame yebogu ijieraja yũhu, ni yũhtimahye Ñu Jesure.

<sup>15</sup>Jesu pehe yũhtiahye tiquirore:

—Yũhũre wame yeya. Ohõ saha yena, Cohãcjũ dutiro saha sohtoa tina niaja mari, niahye Jesu.

Tiquiro sa nigũ tũhoro,

—Aũ, ni yũhtiahye Ñu.

<sup>16</sup>Sa ni tuhasa, Jesure wame yeahye. Tiquiro wame ye tuhasagũ Jesu diarũ ducuriquiro maja dũcahye. Tiquiro maja dũcagũ, ỹhmũanopũ parĩ maahye. Cohãcjũ yaquiuro Espĩritu bũjua yero saha tiquiro bui dijia tagũ ihñahye. <sup>17</sup>Sa dijia tagũ ỹhmũanopũ yahuducuye bisiahye:

—Ahriquiuro yũhu macũ yũhu cahĩniquiro ijire. Tiquiro mehna tutuaro bucueja, niahye ỹhmũanopũ.

**Watĩno ñañene ye dutimahye Jesure**  
(*Mr 1.12-13; Lc 4.1-13*)

**4** <sup>1</sup>Sa ye Espĩritu Santo pehe Jesure masa marienopũ neahye, topũ watĩno tiquirore ñañene ye dutiatio saha.

<sup>2</sup>Topũ esaro cuarenta decori waro ihyaro marieno ijiahye Jesu. Sa yero ỹjua ahbahye. <sup>3</sup>Yjua tiquirore ahbagũ ihñano watĩno pehe tiquiro cahapũ esaro, ohõ saha niahye:

—Mũhu Cohãcjũ macũ ijigu, ahria utãre ihyaye dojomehneña, nimahye tiquiro Jesure.

<sup>4</sup>Jesu ohõ saha ni yũhtiahye:

—Yeraja. Cohãcjũ yere tiquina ojoari pũpũ ohõ saha nine: “Masare ihyaye mehna dihita catieraro cahmene. Ijipihtiye Cohãcjũ tiquiro ye yahuye mehna ijiro cahmene”, nine Cohãcjũ, ni yũhtiahye Jesu watĩnore.

<sup>5</sup>Tiquiro sa ni yũhtiri bato watĩno pehe Jerusalẽpũ “Cohãcjũ ya maca” tiquina nidi macapũ Jesure neahye. Topũ esa, Cohãcjũ ya wũhũ bui Jesure ne sahye tiquiro. <sup>6</sup>Ne sa tuhasa, tiquirore ohõ saha nimahye:

—Cohãcjũ yere tiquina ojoari pũ ohõ saha nine:

“Cohãcjũ tiquiro yequina angelere mũhũre ihña ihbo dutirota. Sa yeye tiquina pehe mũhũre ihña ihboeta ‘Utãpũ pũha tu maari,’ niñe”, nine tiquiro ojoari pũ.

Tiquiro sa nidi poto ijigũ mũhũ Cohãcjũ macũ ijigũ yehpapũ uhpu dijia ihñoña yũhũre. Mũhũre tiquina yedohogũ ihñoña yũhũre, nimahye watĩno.

<sup>7</sup>Jesu uhpu dijia ihño dueraro ohõ saha ni yũhtiahye:

—Cohãcjũ yere tiquina ojoari pũ ohõ saha nine: “Mũsa pũthoro Cohãcjũ tiquiro nidire ‘¿Poto ijajari?’ ni masi duana Cohãcjũre ye ihño duti tuhueracãhña”, nine Cohãcjũ yere tiquina ojoari pũ, niahye Jesu.

<sup>8</sup>Tiquiro sa ni yũhtiri bato uhmũa yũhdũdu cunãpũ Jesure ne mũjahye watĩno tja. Tã buipũ ne mũja sa pje, ijipihtiye macarine ihñodoque dijioahye Jesure. Tiquina cũoye gãhũre ihñoahye. <sup>9</sup>Sa ihñoño Jesure ohõ saha nimahye:

—Yũhũre dũsepe curi mehna quehe sa, ño peoya mũhũ. Mũhũ sa yegũ ijipihtiye ahri macarine mũhũre ohoutja, ni yahumahye watĩno.

<sup>10</sup>Tiquiro sa nigũ Jesu ohõ saha ni yũhtiahye:

—Satana, wahaya mũhũ. Ohõ saha nine Cohãcjũ yere tiquina ojoari pũ: “Mũhũ pũthoro Cohãcjũ dihitarẽ ño peoya. Tiquiro ye dutiye dihitarẽ yeya”, nine Cohãcjũ yere tiquina ojoari pũ, niahye Jesu watĩnore.

<sup>11</sup>Tiquiro sa nigũ tũhoro watĩno wahaa wahahye. Tiquiro wahari bato angele pehe wihi, Jesure yedohoye ihyayere ohoahye angele.

### Galilea yehpapũ Jesu buhe dũcahye

(Mr 1.14-15; Lc 4.14-15)

<sup>12</sup>Sa ye Ñure peresupũ tiquina yegũ tũhoro, wahaa wahahye Jesu. Waha, Galilea yehpapũ esahye. <sup>13</sup>Topũ ijiri macapũ Nazarepũ waha, yũhdũ cã, Capernau wame tiri macapũ esahye. Galilea wame tiri ditara dũhtũ cahapũ ijiri Capernau. Ti maca Zebulón yehpa cahapũ, Neftalí yehpa cahapũ ijiri Capernau. Topũ esa, ijiahye Jesu. <sup>14</sup>Sata yeahye Jesu panopũ cjũno Cohãcjũ yere yahu mũhtariquiro Isaia tiquiro ni ojoariro sahata. Ohõ saha ni ojoahye:

<sup>15</sup>Zebulón yehpa cahapũ, Neftalí yehpa cahapũ, ditarapũ wahari mahapũ, Jordã wame tiri ma ape sie pãhrẽpũ Galilea yehpa ijire. Ti yehpa judio masa ijieyequina ya yehpa ijire. <sup>16</sup>To cjẽna Cohãcjũ yere quehnoano masiedare. Sa masiedapeta quehnoariquirore ihñañepũ masieta. Tiquina pehe Cohãcjũre ne masiedare. Sa yeye pecapũ wahaboriquina ijimahye. Sa yero ihcãquiro tiquinare Cohãcjũ yere masigũ yerota, ni ojoahye Isaia.



<sup>17</sup>Topu ijero, Cohãcjũ yere yahu dũcahye Jesu:  
—Musa ñaňe yerire bujua witiya. Sa yena quehnoañene comesaya. Æhmuse cjũno Cohãcjũ ijipihtyequina puhtoro tiquiro ijianto mehenogã dũsare, ni yahu dũcahye tiquiro.

**Pititiaro wahi wejẽnequinare tiquiro mehna cjẽna ijatiquinare pijiahye Jesu**  
(Mr 1.16-20; Lc 5.1-11)

<sup>18</sup>Sa ye Galilea wame tiri ditara dũhtũ caharu esaro, Simore, tiquiro bahuro Andre mehna boca sahye Jesu. Simo tiquina Pedro ni pisuriquiro ijiahye. Tiquina pehe wahi wejẽnequina ijieye, tiquina wẽñecjũre doque ñoňe niahye ditararu.

<sup>19</sup>—Yũhu mehna cjãna ijanaja ahtaya musa. Yũhu mehna musa ahtagũ musa wahire ñehe cahmecoana musa ijero saha, Cohãcjũ yequina ijatiquinare masare piji cahmecoana ijigũ yeitja musare. Yũhu mehna musa ahtagũ sa yeana jare cõtja musare, niahye tiquiro tiquinare.

<sup>20</sup>Tiquiro sa nigũ tuhoyeta tiquina wẽñecjũre cũ cã, tiquiro mehna wahahye.

<sup>21</sup>Sa ye Jesu tiquina mehna yũhdũ cã, Santiagore tiquiro bahuro Ñũ gũhũre boca sahye tja. Tiquina Zebedeo pohne ijiri. Tiquina yaria yucũsarũ tiquina pacuro mehna tiquina wẽñecjũre quehnoñe niahye. Tiquina puarore tiquiro pijioahye. <sup>22</sup>Tiquiro sa pijiogũ tuhoye, tiquina pehe duita tiquina pacurore, yucusa gũhũre cũ, Jesu mehna wahahye.

**Peyequina masare buheahye Jesu**

(Lc 6.17-19)

<sup>23</sup>Sa ye ijipihtiropu Galilea yehpare Jesu buhe tinidi. Judio masa mari buheye wũhusepu quehnoañe buheyere, æhmuse cjũno tiquiro puhtoro ijieye tiyere buheri. Tiquinare buhe, dohatieyquinare quehnoa wahagũ yero, ijipihtieyere dohatieyere yũhdũori tiquiro. <sup>24</sup>Tiquiro sa yegũ tuhoye Siria yehpa cjẽna ijipihtiropu ti yehparu ijieyequina tiquirore masi dũcari. Sa masiñe, sijoro saha ijieye dohatieyere cwoyeyequinare, watĩare cwoyeyequinare, ñama yariaye cwoyeyequinare, tini masieñequina gũhũre ne sari. Sa yero ijipihtieyequina tiquinare yũhdũgũ yeri Jesu. <sup>25</sup>Tiquiro sa yegũ ihñañe, Galilea yehpa cjẽna, Decapoli cjẽna, Jerusalẽ cjẽna, Judea yehpa cjẽna, Jordã ape sie pahrẽ cjẽna peyequina masa tiquiro mehna wahari.

**Cũnũru mũja, topu buheahye Jesu masare**

(Lc 6.20-23)

**5** <sup>1</sup>Sa ye masa peyequina tiquiro caharu tiquina esagũ ihñano Jesu cũnũru mũjaa wahahye. Mũja sa, topu dujiahye. Topu dujigũ tiquiro buheyequina tiquiro caharu esahye. <sup>2</sup>Tiquina esagũ ihñano ohõ saha ni buhe dũcahye.

<sup>3</sup>—Tiquina ñaňene bujua witiyequina Cohãcjũre cahmeñequina bucueyequina ijire. Æhmuse cjũno tiquiro puhtoro ijieropũre wahaeta tiquina. Æhmuse cjẽ tiquina ye ijire.

4'Utiyequina gũhũ bucueyequina ijire. Tiquinare bucuegũ yerota mari Pacu.

5'Apequinare yũhdũdũca dueyequina "Ihyo ijina ijiaja usã", ni tũhotuyequina bucueyequina ijire. Cohãcjũ "Ohoutja", tiquinare tiquiro nidi yehpare cœoeta tiquina.

6'Cohãcjũ dutiro saha ye duayequina, quehnoañene ye duayequina bucueyequina ijire. Cohãcjũ tiquiro yedohogũ tiquina quehnoañene yeducueta.

7'Apequinare paja ihñañequina bucueyequina ijire. Tiquina sa paja ihñagũ Cohãcjũ tiquina gũhũre paja ihñanota.

8'Tiquina ñañene cosenohriquina bucueyequina ijire. Cohãcjũre ihñaeta tiquina.

9'Apequinare cahmequedagũ yeyequina bucueyequina ijire. Tiquinare "Yũhũ pohna ijire", ninota Cohãcjũ.

10'Cohãcjũ dutiyere tiquina yeri buhiri apequina ñano yere Cohãcjũ tiquiro dutiriquinare. Tiquina sa ñano yegũ bucueyequina ijire tiquina pehe. Æhmũse cjũno tiquiro pũhoro ijiropũ tiquiro yere cœoeta tiquina.

11'Yeere mũsa yeri buhiri apequina mũsare tiquina tuhtiepegũta bucuena ijire mũsa. Mũsare tiquina ñano yepegũta bucuena ijire mũsa. Yeequina mũsa ijiri buhiri mũsare ijipihtiyere ñañe tiquina quiti dojomehnepegũta tiquina ni mehoepegũta bucuena ijire mũsa. 12Cohãcjũ yere yahu mũhtariquinare mũsa pano ijiriquinare tiquinapũreta ñano ye mũhtahye. Tiquinare yeriro sahata mũsa gũhũre apequina sa yegũ bucueya. Quehnoano jeripohna tiya. Sa yero Æhmũsepũ mũsa esagũ pajiro quehnoano yerota mũsare Cohãcjũ, ni yahuahye Jesu.

### **Moa yero saha, buhrioro yero saha ijire Jesu yequina**

*(Mr 9.50; Lc 14.34-35)*

13Sa ye Jesu buhe nemoahye:

—Moa mehna wahiquiro dihire ti ñano wahaeragũ yero sahata mũsa pehe yeequina pehe ijipihtiyequina apequinare ñañene tiquina ye dueragũ yere. Sa ijieperota moa pehe ti ñañe wahagũ pari turi quehnoañe ye masiedare. Ti moa ne quehnoaedare. Ti sa wahagũ ti moare cohãno cahmene. Ti moare cohãri bato ti bui masa cũhta cũre. Ne dũhseati ijierare ti moa tiquiro cohãñe. (Ti dũhseati ijieraro saha ijieracãhña mũsa. Cohãcjũ ye pehere cohãedacãhña,) ni yahuahye Jesu.

14Sa ye tiquiro buhe nemoahye:

—Buhrioro marine ihñagũ yero sahata mũsa pehe yeequina pehe ahri yehpa cjẽnare Cohãcjũre masigũ yere. Cũnũ bui ijiri macare nũono basioerare. 15Sa ye sihãriare masa sihãñe, sutu docapũ moha dapo masiedare. Tiare sihãriare Æhmũanopũ duhu peore ti wũhũ cjẽna ijipihtiyequina tiquina ihñatiare. 16Ohõ sahata mũsa gũhũ buhrioro yero saha ijina, quehnoañene yeya. Mũsa sa yegũ ihñañe masa mari Pacu Æhmũse cjũnore ño peo, "Tutuagũ, quehnoagũ ijire", nieta, ni yahuahye Jesu.

### Cohācjū tiquiro dutiyere tiquiro ojoari gūhure yahuahye Jesu

<sup>17</sup>Sa ni tuhasa, tiquinare yahu nemoahye:

—Ahrire mūsa masigū cahmeaja yūhū. Cohācjū dutiyere Moiserere tiquiro cūrire, tiquiro yere yahu mūhtañequina tiquina ojoari gūhure cohāgu tagu niedu. Ti dutiyere mūzare quehnoano yahu potou tūu nii. Ti dutiyere poto ijigū ihñou ahtau. Ti dutiye nidiro sahata ye sohtori tii tūu nii. <sup>18</sup>Ijirota mūzare niaja. Pihhiri deco pano ijinigū Cohācjū dutiye Moiserere tiquiro cūrire ne mehenogā cohāsi mari. Ahri yehpa, ūhmūse gūhū ti ijiro puno tiquiro dutiye gūhū ijirota. <sup>19</sup>Sa yeye ti dutiyere ihquēquina yūhdūdūcaye, apequinare sata ye dutiye, ūhmūse cjūno tiquiro pūhtoro ijiropū cahacjēna yero saha ijjeta. Ihcā dutirogā ijiepegūta tiquina yūhdūdūcaye, cahacjēna yero saha ijjeta tiquina. Apequina ti dutiyere quehnoano yeye, apequinare tiquina yero saha ye dutiye, ūhmūse cjūno tiquiro pūhtoro ijiropū pūhtoa yero saha ijjeta tiquina pehe. <sup>20</sup>Mūzare niita niaja yūhū. Judio masare buheyequina, fariseo masa gūhū Cohācjū cahmeñene queoro yerare. Tiquina yūhdūoro Cohācjū cahmeñene yeya mūsa. Mūsa sa yerana, tiquiro pūhtoro ijiropūre ne esasi mūsa, ni yahuahye Jesu.

### Usuyere yahuahye Jesu

(Lc 12.57-59)

<sup>21</sup>Sa ni tuhasa, tiquinare yahu nemoahye:

—Panopū cjēna ohō saha ni tiquina yahurire tūhori jimedi mūsa: “Masare wejēdacāhñā. Masare wejēdiquirore tiquina buhiri dahreatiquiro ijire”, tiquina nidire tūhori jimedi mūsa. <sup>22</sup>Ahri tiquina yahuri yūhdūo cjūno mūzare ahri pehere yahu nemoutja. Tiquiro acayūro mehna usuariquiro pehe tiquina buhiri dahreatiquiro ijire masūnore wejēdiquiro yero saha. Tiquiro acayūrore tuhtiriquiro “Ne tūho masiñe mariegū ijire mūhū”, nidiquiro buhiri dahre dutiyequina cahapū tiquina neatiquiro ijire. “Tūho masiegū ijire mūhū”, tiquiro acayūrore sa nidiquirore pecapū wahaboaga tiquiro.

<sup>23</sup>Mūsa acayūro mūzare tiquiro ihñā tuhtigū ohō saha yeya. Cohācjū wūhūpū Cohācjūre mūsa ño peoato pano, tiquirore wahiquirore mūsa ohoato pano ohō saha yeya. <sup>24</sup>Cohācjūre mūsa ohoatire duhu cū, mūsa acayūro cahapū waha, “Pari turi cahmequedacūhna. To punota duhuuhna tire”, niña tiquirore. Mūsa sa nidi bato Cohācjūre oho, ño peona wahaya tiquiro ya wūhūpū.

<sup>25</sup>Apequiro mūhūre yahusā duaro, pūhtoro masare beseriquiro cahapū mūhūre tiquiro nea duagū, tiquiro mehna usuaro marieno ijīya. Beseriquiro cahapū tiquiro neato pano tiquiro mehna quehnoano ijīya. Mūhū sa yegū ihñano tiquiro mūhūre yahusāedaboaga. Mūhū sa quehnoano ijieragū ihñano topūre mūsa esagū tiquiro pehe mūhūre masare beseriquirore yahusānota. Tiquiro sa yahusāgū, beseriquiro pehe peresu yeyequinapūre mūhūre ohorota. Sa yeye tiquina mūhūre peresu yeeta. <sup>26</sup>Ijirota niaja mūhūre. Topū ijīniita mūhū. Tee tiquina wapa ye dutirire mūhū wapa ye pehogūpū wijiagūta mūhū, ni yahuahye Jesu.

**Apequiro namono mehna ñano yeyere yahuahye Jesu**

<sup>27</sup>Ohō saha ni yahu nemoahye Jesu:

—Panopu cjenare ohō saha tiquina ni yahurire tūhori jimedi mūsa: “Apequiro namono mehna ñano yeracāhña”, tiquina nidire tūhori jimedi mūsa. <sup>28</sup>Ahri tiquina yahuri yūhdūo cjūno mūsare ahri pehere yahu nemoutja. Numinore ñehedaperota, ihcāquiro ticorore ñano tutuaro cahmeno, ñano wacū tūhoturo, ñano ye tuhasari ticoro mehna.

<sup>29</sup>Sa yegu mūhū capea poto pehepu ijiria mehna ñano yegu, tiare ore we ne mūhū cohāboriro sahata ti ñañene duhuya. Tire duhueragu pecapu wahagūta. Mūhū capeare mūhū cohāgū tia capea dihita butire. Mūhū pehere pecapu mūhū wahagū ña yūhdūare. Sa yegu ti ñañene duhuya. <sup>30</sup>Sa yegu mūhū omoca poto pehe ijiri omoca mehna ñano yegu, ti omocare mūhū dūte cohāboriro sahata ti ñañene duhuya. Tire duhueragu pecapu wahagūta. Mūhū omocare mūhū cohāgū ti omoca dihita butire. Mūhū pehe pecapu mūhū wahagū ña yūhdūare. Sa yegu ti ñañene duhuya, ni yahuahye Jesu.

**Tiquiro namonore cohāñene, wame peoye gūhūre yahuahye Jesu**

*(Mt 19.9; Mr 10.11-12; Lc 16.18)*

<sup>31</sup>Ohō saha ni yahu nemoahye Jesu:

—Panopu ahri gūhūre niahye: “Tiquiro namonore cohā duariquiro tiquiro cohātire yahuri pū mehna ticorore cohā masine”, nimahye panopu. <sup>32</sup>Ahri tiquina yahuri yūhdūo cjūno mūsare ahri pehere yahu nemoutja. Tiquiro namono apequiro mehna ñano yericoro ticoro ijierapegūta ticoro manūno ticorore cohāboaga. Ticoro sa cohānohricoro apequiro mehna omoca dūhtero, ñano yero niaga ticoro apequiro mehna ijiro. Ticoro manūno ticorore tiquiro cohāri bato ticorore apequiro mehna ñano yegū yere. Sa yero tiquiro bato namo tiriquire gūhū ticoro mehna ñano yero nine, ni yahuahye Jesu.

<sup>33</sup>Ohō saha ni yahu nemoahye Jesu:

—Panopu cjenā ohō saha tiquina ni yahurire tūhori jimedi mūsa: “Mūsa nidiro sahata yeya. ‘Cohācjū mehna poto sa yeitja’ mūsa nidiro sahata yeya”, tiquina ni yahurire tūhori jimedi mūsa. <sup>34</sup>Ahri tiquina yahuri yūhdūo cjūno mūsare ahri pehere yahu nemoutja. “Uhmūse mehna poto nii niaja”, ni uhmūse mehna wame peoeracāhña. Uhmūse pehe Cohācjū mari pūhtoro tiquiro ijiro ijire. Ihyo ijiro ijierare. Sa ijigū ihñana sa niedacāhña. <sup>35</sup>Ahri yehpa mehna ne wame peoeracāhña. Ahri yehpa Cohācjū ya yehpa ijire. Sa ijigū ihñana sa niedacāhña. Jerusalē mehna ne wame peoeracāhña. Tutuariquiro mari pūhtoro ya maca ijire Jerusalē. Ihyo ijiri maca ijierare. Sa ijigū ihñana sa niedacāhña ti wamene. <sup>36</sup>“Yūhū dapu mehna poto nii niaja”, ni wame peoeracāhña. Mūsa poari yehseye poari wahagū ye masiedare mūsa. Ti poarire ñiñe wahagū gūhūre ye masiedare mūsa. Sa ye masiena “Yūhū dapu mehna poto nii niaja”, ni wame peoeracāhña. <sup>37</sup>“Yenatja”, nina wame peoro marieno ohō saha dihita

tire niducuya. “Yesi”, nina gũhu wame peoro marieno niducuya. Mũsa wame peo nina, watĩno ñariquiuro dutiro saha yena niaga, ni yahuahye Jesu.

### Tiquina cahme ihña tuhtiyere yahuahye Jesu

(Lc 6.29-30)

<sup>38</sup>Ohõ saha ni yahu nemoahye Jesu:

—Panopu ohõ saha tiquina ni yahurire tũhori jimedi mũsa. “Mũhũre apequiuro mũhu capeare tiquiro quẽ tihãriro sahata mũhu gũhu tiquirore quẽ tihã cahmeña. Mũhu upiriare tiquiro quẽ nuhariro saha mũhu gũhu quẽ nuha cahmeña”, tiquina nidire tũhori ijimedi mũsa. <sup>39</sup>Tiquina yahuri yũhdũo cjuño ahri pehere yahu nemoutja mũsare. Mũhũre ñano yeriquirore sa ihña cãhña. Ihcã pehe mũhu wahsupure tiquiro quẽgũ, ape sie gũhũre quẽ dutiya tiquirore. <sup>40</sup>Apequiuro buhiri dahre dutiriquirore mũhũre tiquiro yahusãgũ, dutiriquiro pehe mũhu camisare mũhũre yahusãriquiurore oho dutiboaga. Tiquiro oho dutigũ, tiquirore ohoya. Mũhu bui cja suhtiro gũhũre oho nemoña tiquirore. <sup>41</sup>Apequiuro surara apee borore ihcã kilõmetro mũhũre tiquiro nea basa dutigũ, ape kilõmetrore waha nemoña tja. <sup>42</sup>Mũhũre sinidiquirore ohoya. Sa yegũ apequiuro mũhũre waso dutigũ wasoya tiquirore, ni yahuahye Jesu.

### Mũsare ihña tuhtiyequinare cahña

(Lc 6.27-28, 32-36)

<sup>43</sup>Ohõ saha ni yahu nemoahye Jesu:

—Masa ohõ saha nine: “Mũsa mehna cjenare cahña. Sa yena mũsare ihña tuhtiyequinare ihña tuhti cahmeña tja”, tiquina nidire tũhori jimedi mũsa. <sup>44</sup>Tiquina yahuri yũhdũo cjuño ahri pehere yahu nemoutja mũsare: Mũsare ihña tuhtiyequinare cahña. Mũsare ñano yeyequinare tiquina ye ijiatire Cohãcjũre sini basaya. <sup>45</sup>Mũsa sa yena mari Pacu uhmũse cjuño pohna ijire mũsa. Cohãcjũ pehe ihcãno saha yere masare. Ñãnequina gũhũre quehnoãnequina gũhũre asũ asigũ yere tiquiro. Sa yero Cohãcjũ dutiyere yeyequina gũhũre, yeyequina gũhũre acoro ahtagũ yere tiquiro. Masare ihcãno saha tiquiro yeriro sahata mũsa gũhu yeya. <sup>46</sup>Mũsare cahñequina dihitarẽ mũsa cahigũ ti ne dũhseati ijierare. Wapa ne cohteyequina gũhu sata yere. Sa yena ijipihtiyequinare cahña. <sup>47</sup>Mũsa acaye dihitarẽ mũsa quehnoano piti cagũ ti ne dũhseati ijierare. Cohãcjũre masieñequina gũhu sata yere. Sa yena ijipihtiyequinare quehnoano piti caya. <sup>48</sup>Ñãne mariena ijija mũsa. Mari Pacu uhmũse cjuño tiquiro ñãne marieniquiro tiquiro ijiro sahata mũsa gũhu ñãne mariena ijija, ni yahuahye Jesu.

### Quehnoãne yeyere yahuahye Jesu

**6** <sup>1</sup>Pari turi tiquiro yahu nemoahye:  
—Cohãcjũ ye ijiatire quehnoãne yena, tire masare “Ohõ saha ijigu ijiaja yahu”, ni ye ihñoedacãhña apequinare. Mũsa sa ni ye ihñori buhiri quehnoãne

musa yeri dũhseati ijierare. Sa yero Cohãcǵũ Ʃhmũse cǵũno quehnoañene musa yeri wapa musare ohosi. <sup>2</sup>Sa yena pejecũoyequinare yedohona, tire masare ye ihũoedacãhña. Masa tiquina ihũenopũ yedohoya tiquinare. Sata ihquẽquina ye ihũore mahapũ ijyeyequinare, judio masa mari buheye wũhũsepũ ijyeyequina gũhũre. Tiquina mari ihũono dihita quehnoano jji mehoñequina ijire. Sa ye ihũore tiquina, “Quehnoañequina ijire ahriquina”, masare ni ihña dutiye. Tiquina sa ni ihñagũ sa ye ihũoñequina pehe bucue tuhasari. “Quehnoañequina ijire”, ni masa tiquina ño peogũ bucue tuhasari tiquina. Sa yero Cohãcǵũ pehe ne bucue nemogũ yesi tiquinare. <sup>3</sup>Sa yena pejecũoyequinare yedohona, masa tiquina ihũenopũ yedohoya tiquinare. Mũsa mehna cǵẽna mehna ijina tiquina ihũeno pejecũoyequinare yedohoya. <sup>4</sup>Masa tiquina ihũenopũ musa yedohoepegũta Cohãcǵũ pehe ihñare. Sa ihñano musa sa yeri wapa ohorota musare, ni yahuahye Jesu.

**Cohãcǵũre siniñene yahuahye Jesu**  
(Lc 11.2-4)

<sup>5</sup>Pari turi tiquiuro yahu nemoahye:

—Cohãcǵũre sinina, masa ihũono dihita quehnoano jji mehoñequina yero saha yeracãhña musa. Judio masa mari buheye wũhũsepũ ducu, mahapũ gũhũre ducu, Cohãcǵũre sini ihũore tiquina masare. Sa sini ihũoñe poto masa tiquina ño peoye mehna tiquina bucue tuhasari. <sup>6</sup>Cohãcǵũre sinigũ tagũ, mũhũ ya tucũpũ biha sajãña. Biha sajã, mari Pacũ ihñamehneniquirore siniña. Mũsa sa yegũ masa marienopũ musa siniepegũta mari Pacũ musare tũhorota. Sa tũhoro musare quehnoano yerota tiquiuro.

<sup>7</sup>Sa yena Cohãcǵũre sinina, tũhoturo marieno musa sinidireta pari turi sini majare tojoeracãhña. Ohõ sahata yere Cohãcǵũre masieñequina. “Peye tahari ihcãno saha usã sinigũ Cohãcǵũ usãre tũhorota”, ni tũhotumene tiquina.

<sup>8</sup>Tiquina yero saha yeracãhña musa. Mũsa siniato pano mari Pacũ musa cahmeñene masi tuhasare. <sup>9</sup>Sa yena ohõ saha ni siniña musa Cohãcǵũre:

Usã Pacũ, Ʃhmũse cǵũ mũhũ quehnoagũ sa ijiducure.

<sup>10</sup>Yojobũre ijipihtiyequina pũhto ijyia. Ʃhmũsepũ mũhũ dutiro sahata tiquina yeriro sahata ahri yehpa cǵẽna gũhũ yeahro.

<sup>11</sup>Sa yegũ decoripe usã ihyatire ohoducuya usãre.

<sup>12</sup>Apequina usãre tiquina ñano yerire usã boaja. Sa yegũ mũhũ gũhũ usã ñano yerire boya.

<sup>13</sup>Sa yegũ usã ñañene ye duagũ usã tutuaro cahmegũ ihñagũ tire usãre ye dutiegũta. Sa yegũ usãre usã ñañene yeragũ yeya.

Mũhũ usã pũhto tutuagũ sa ijiducugũta. Ijipihtiyequina mũhũre sa ño peoducuahro, ni siniña Cohãcǵũre.

<sup>14</sup>Apequina musare tiquina ñano yerire musa bogũ ihñano, mari Pacũ Ʃhmũse cǵũno gũhũ musa ñano yerire borota. <sup>15</sup>Sa boeperota apequina musare tiquina ñano yerire musa boaeragũ mari Pacũ gũhũ musa ñano yerire bosì, ni yahuahye Jesu.

### Sijiyere buheahye Jesu

<sup>16</sup>Sa yero tiqiro tiquinare yahu nemoahye:

—Cohãcjũre ño peona tana sijina bujua witiyequina yero saha ye ihñoedacãhña. Sata yere masa ihñoono dihita quehnoano iji mehoñequina. Tiquina wãhdoa paca bujua witiyequina yero saha ijire. Tiquina sa ijiequina ijigũ tiquina sijigũ ihña masine masa. Ijirota musare nii niaja. Masa tiquinare ño peogũ cahmene tiquina. Sa yeye tiquinare tiquina ño peogũ ihñañe bucue tuhasari. Cohãcjũ pehe tiqirore tiquina ño peori wapa tiquinare bucuegũ yesi. Sa yena tiquina yero saha ye ihñoedacãhña masa. <sup>17</sup>Musa sijina, masa poarire aco mehna wa peo wãhapo peoya. Sa yena masa wãhdoa pacare coseya. <sup>18</sup>Musa sa yegũ masa sijigũ ihña masisi masa. Cohãcjũ dihita masa sijiyere ihña masinota. Musa sehsharo masa ijigũ tiqiro masa mehna sa ijiducure. Sa ihñano tiqiro musare quehnoano yerota tiqirore masa ño peori wapa, ni yahuahye Jesu.

### Uhmuse cjẽne cwo dutiahye Jesu

(Lc 12.33-34)

<sup>19</sup>Sa yero tiqiro yahu nemoahye:

—Ahri yehpa cjẽne ne cahmecoedacãhña. Ohõ cjẽ ahbaa wahaboaga. Ti ahbaeragũ yaqueriquiro neboaga tire. Tiquiro yaqueragũ mecasia tuaboaga. Sa yero ahri yehpa cjẽ butiaro cuarĩne. Sa yena ahri yehpa cjẽne tutuaro cahmedacãhña. <sup>20</sup>Uhmuse cjẽ pehere cahmeña masa. Uhmuse cjẽne mecasia tua masiedare. Topũ masa cuoye ne ahbaerare. Topũre yaqueriquiro ne masiedare. Sa yena uhmuse cjẽne cahmeña masa. <sup>21</sup>Topũ masa cuoye ijigũ, uhmuse cjẽne Cohãcjũ yere tutuaro wacũre masa, ni yahuahye Jesu.

### Masa tiquina tuhuturo sahata yere

(Lc 11.34-36)

<sup>22</sup>Sa yero ohõ saha ni yahu nemoahye tiquinare:

—Sihãria quehnoano buhriogũ mari quehnoano ihña masino sahata quehnoañene tuhutuye mehna quehnoano ye masinata masa. Masa tuhuturo sahata yere masa. Quehnoañene tuhutuna quehnoano yere masa. <sup>23</sup>Quehnoañene tuhutuerana ñañene yere masa. Masa ñañe dihitare masa tuhutuducugũ ti ñañe pehe ña yãhduye ijire, ni yahuahye Jesu.

### Niñerure cahñequina, Cohãcjũ pehere cahiedare

(Lc 16.13)

<sup>24</sup>Sa yero tiqiro yahu nemoahye tiquinare:

—Ihcãquiro Cohãcjũ pehere wacũno, tutua yãhduaro niñeru pehere wacũedare. Niñeru pehere tutua yãhduaro wacũno Cohãcjũ pehere wacũedare. Niñeru dihitare cahmediquiro ijiro Cohãcjũre bucuegũ yerare. Cohãcjũ gũhũre, niñeru gũhũre puarore cahme yãhduarocar basioerare musare.

### Cohācjū tiquiro pohnene ihña ihbore

(Lc 12.22-31)

<sup>25</sup> Sa yegu ahrire musare nii naja: Musa ihyayere, sihniñene, suhti gũhure pajiro bujua witi tuhoturacãhña. Musare bajumehneno ihyayere ihyatina dihitare suhti sañatina dihitare Cohācjū yerari musare.

<sup>26</sup> Minicjua parire Cohācjū tiquiro ihña ihboyere masiña musa. Tiquina weseri marieñequina ijire. Sa yeye ihyayere tiquina ihboye wũhuse tiquinare mariedare. Mari Pacu pehe tiquinare tiquina ihyatire ohore. Minicjua yũhdũoro musa pehere cahĩne Cohācjū. Sa yero musa gũhure ihña ihborota tiquiro. <sup>27</sup> Pajiro musa tuhutuye mehna ti musare ihcã hora cati nemogũ yerare. Sa yero musa pajiro tuhutuye dũhseati ijierare.

<sup>28</sup> Sa yena musa suhti sañatire pajiro bujua witi tuhoturacãhña. Nucu cjẽ cohorì ti cohoyere tuhutuya. Ti cohorì ti basi suhtire yerare. Sa yerapeta ti cohorì quehnoañe suhti yero saha quehnoañe cohorì bajure. <sup>29</sup> Salomo mũnano quehnoañe suhtire sañariquiro tiquiro ijiepegũta ti cohorì pehe tiquiro yũhdũoro quehnoa yũhdũaye cohorì waro ijire. <sup>30</sup> Cohorire quehnoañe cohorì yere Cohācjū pehe. Ti cohorì pehe meheñe decorigã iiducu ñai bora dijiaa wahare. Mehenogã iji, ape decoru pecaru ujua wahare. Sa ijiepegũta cohorire quehnoañe cohorì ijigũ yere Cohācjū. Sa yero Cohācjū cohorire tiquiro quehnoañe cohorì tiquiro yeriro yũhdũoro musa gũhure quehnoano yerota. Suhtire ohorota. Cohācjũre mehenogã wacũ tutuare musa. <sup>31</sup> Sa yena musa ihyatire, musa sihniatire, musa suhti sañatire pajiro bujua witi tuhoturacãhña. <sup>32</sup> Cohācjũre cahmeñequina pehe tire sa macaducuye nine. Mari Pacu uhmuse cjũno ijipihtiye musa cahmeñene masine. Tiquiro sa masigũ pajiro bujua witi tuhoturacãhña. <sup>33</sup> Cohācjū musa puhtoro tiquiro ijiatore cahme mũhtaña musa. Ijipihtiye apee boro yũhdũoro tiquirore cahmeña musa. Quehnoañene tiquiro ye dutiye gũhure cahmeña. Musa sa yeri bato Cohācjū pehe musa cahmeñe dũhsagũ ohorota. <sup>34</sup> Sa yena ñamiapure musa dũhse wahatore pajiro bujua witi tuhoturacãhña. Ñamiare musa ñano yũhdũgũ Cohācjū yedohorota musare. Miare musa ñano yũhdũato iji tuhasare. Sa yena mia cjẽ dihitare tuhutuya. Ape deco cjẽne pajiro bujua witi tuhutu nemoedacãhña. Cohācjū pehe musare yedohorota, ni yahuahye Jesu.

### Apequinare “Ñañequina ijire”, niedacãhña

(Lc 6.37-38, 41-42)

**7** <sup>1</sup> Sa yero tiquiro tiquinare yahu nemoahye:  
 —Apequinare “Ñañequina ijire”, niedacãhña musa. Musa sa niedagũ Cohācjū musare “Ñana ijire”, nisi. <sup>2</sup> Apequinare “Quehnoano yerare”, musa ni ihñano sahata Cohācjū pehe musa gũhure sata ni ihñanota. <sup>3</sup> Mari queoye mehna mari buhegũ ohõ saha yena ijire musa. Musa acayuro tiquiro capearu meheni pohcarogã sajãgũ ti pohcarogãre quehnoano ihñare musa. Musa ya capea pehere pajiri pjĩ ijiepegũta ti pjĩne ne ihñedare musa. Meheni pohcarogãre musa



ihñano saha m̄sa acayuro tiquiro ñano yeye pehere quehnoano ihñare m̄sa. M̄sa basi m̄sa ñañene tutuaro yepenata tire masiedare m̄sa, pajiri p̄jine m̄sa ihñeno saha. ¿Duhse ijiro boro sa ijajari m̄sa? <sup>4</sup>Ohõ saha nibona ijire m̄sa: “Yuh̄u acayu, ñañene yei nine m̄hu. Sa yegu tire duhuya”, nibona ijire m̄sa. Sa nibona ijiepenata pajiro ñañene yere m̄sa. ¿Duhseña m̄sa ñañene yepenata tire masiedajari m̄sa? <sup>5</sup>Masa tiquina ihñono dihita quehnoano iji mehona ijire m̄sa sa yena. Pajiri p̄jine m̄sa capeapu ijiri p̄jine m̄sa ne muhtaboriro sahata m̄sa ñano yeye pehere duhu muhtaña. M̄sa sa yeri bato m̄sa acayuro tiquiro ñano yeyere duhugũ ye masiboaga, meheni pohcarogãre m̄sa neboriro sahata.

<sup>6</sup>Diayea yero saha ijieyequina, yesea yero saha ijieyequina gũhu ñañequina Cohãcjũ yere quehnoa yuhduyere tiquina ño peerare. Tiquina pehere yahueracãhña. “Tiquina bajupe, ñano niari”, nina, yahueracãhña tiquinare, ni yahuahye Jesu.

### **Cohãcjũre mari siniñene yahuahye Jesu**

*(Lc 11.9-13; 6.31)*

<sup>7</sup>Sa yero tiquiro tiquinare yahu nemoahye:

—Cohãcjũre siniña m̄sa. Sinina m̄sa nenata. M̄sa sinidire bocanata.

Tiquirore sa siniducuya m̄sa. M̄sa sa yegũ tiquiro m̄sare ohorota.

<sup>8</sup>Ijipihtieyequina Cohãcjũre siniñequina neeta. Sa yeye tiquina sinidire bocaeta.

Sa yero ijipihtieyequina Cohãcjũre sa siniducuyequinare tiquiro tiquinare ohorota.

<sup>9</sup>¿M̄sa pohna pãgãre m̄sare tiquina sinigũ utã pehere ohoboagari m̄sa tiquinare? Ne ohosi.

<sup>10</sup>¿M̄sa pohna wahire m̄sare tiquina sinigũ aña pehere ohoboagari m̄sa tiquinare? Ne ohosi.

<sup>11</sup>M̄sa ñana ijiepenata m̄sa pohñare quehnoañene ohoe tiri m̄sa. Sa yero Cohãcjũ pehe m̄sa yuhduoro quehnoañene ohore m̄sare tiquiro pohñare tiquirore sininare. M̄sa pohñare m̄sa ohoriro yuhduoro Cohãcjũ pehe tiquiro pohñene ohore.

<sup>12</sup>Apeyquina m̄sare tiquina quehnoano yegũ cahmene m̄sa. Tiquinare m̄sa quehnoano yegũ cahmeno sahata quehnoano yeya tiquina gũhure.

Tiquina quehnoano yerapegũta m̄sa pehe tiquinare quehnoano yeya.

Sata ye dutire Cohãcjũ dutiye Moiserre tiquiro cũripũ, Cohãcjũ yere yahu muhtariquina tiquina ojoari gũhu, ni yahuahye Jesu.

### **Meheni sopecahagã quitire yahuahye Jesu**

*(Lc 13.24)*

<sup>13</sup>Sa yero tiquiro yahu nemoahye tiquinare.

—Uhmusepu Cohãcjũ cahapu waha duana tiquiro yere yero cahmene m̄sare.

Sa yena tiquiro yere sa ye macaedacãno cahmene. Meheni sopecahagãpu m̄sa sajã duagũ mijorĩne. Sata mijorĩne Cohãcjũ cahapu m̄sa waha duagũ. Pecapu

masa tiquina wahagũ mijoadare. Pajiri sopecahapu mari sajãgũ mijoadare. Ti

sopecahapu masa tiquina sajãboro saha pecapu masa tiquina wahagũ mijoadare.

Sa yeye peyequina masa topũ wahaye nine. <sup>14</sup>Cohãcjũ cahapu m̄sa waha duagũ

mijorĩne. Meheñequinagã masa topu wahaeta. Topu wahayequina ijipihtiye decori Cohãcjũ mehna ijiducuenta, ni yahuahye Jesu.

**Yucugũ ducare masina, tu padũ gãhũre masine musa**  
(Lc 6.43-44)

<sup>15</sup>Sa yero tiquiro yahu nemoahye tiquinare:

—Quehnoano yeya. “Cohãcjũ yere yahu mũhtana ijiaja”, ni mehoñequinare tũhoeracãhña musa. Tiquina oveja yero saha usueyequina saha bajumene. Tiquina tũhotuyepũ ñañequina ijire tiquina. <sup>16</sup>Tiquina ñano yegũ ihñana, ñañequina tiquina ijigũ masinata musa. Tiquina quehnoano yegũ ihñana quehnoañequina tiquina ijigũ masinata musa. Pota bucugũ uñse tõhorine dũca tierare. Potagũ higuera pacare dũca tierare. <sup>17</sup>Quehnoadũ yucugũ quehnoañene dũca tire. Ñadũ pehe ñañene dũca tire. <sup>18</sup>Quehnoadũ yucugũ ñañene ne dũca tierare. Sa yero ñadũ quehnoañene dũca tierare. <sup>19</sup>Quehnoañene dũca tieye cjũre dũte cohã cã, pecarũ uñãanota. Sata yerota Cohãcjũ tiquiro cahmeñene yerariquinare. <sup>20</sup>Sa yena “Cohãcjũ yere yahu mũhtana ijiaja”, ni mehoñequinare ohõ saha masinata. Tiquina yerire ihñana, tiquina ni mehoñequina ijigũ masinata, ni yahuahye Jesu.

**“Musare ne masiedaja”, ninota Cohãcjũ peyequina masare**  
(Lc 13.25-27)

<sup>21</sup>Sa yero tiquiro yahu nemoahye tiquinare:

—Peyequina yũhũre “Pũhto” niñequina ijiepetã uhmũse cjũno Cohãcjũ tiquiro pũhtoro ijirorpũre wahasi tiquina. Yũhũ Pacũ uhmũse cjũno tiquiro cahmeñene yeyequina dihita tiquiro pũhtoro ijirorpũre wahaeta. <sup>22</sup>Decorĩ pihitigũpũre peyequina masa ohõ saha nieta yũhũre: “Pũhto, mũhũ yere usã buhei. Mũhũ wame mehna watĩare cohãũ. Sa yena mũhũ tutuaye mehna peye bajumehneñene yei usã”, yũhũre niñequina ijieta. <sup>23</sup>Ohõ saha yũhtiitja tiquinare: “Musare ne masiedaja. Ñañene yena ijire musa. Yũhũ caharũ ahtaeracãhña”, niitja yũhũ tiquinare, ni yahuahye Jesu.

**Pũa wũhũ yeyequina quitire yahuahye Jesu**  
(Mr 1.22; Lc 6.47-49)

<sup>24</sup>Sa yero tiquiro yahu nemoahye tiquinare:

—Sa ye ijipihtiyequina ahri yũhũ buherire tũhoriquina yũhũ dutiyere yeyequina, quehnoano tũho masiniquiro wũhũ dahreriquire yero saha ijire tiquina. Tiquiro pehe uñcũãñe coperi sehe, wũhũre doco dũcahye. <sup>25</sup>Ti wũhũre peho tuhasari bato acoro tutuaro ahta, dia mini yũhdũa waha, tutuaro wihnono wẽahye. Sa ti tutuaro wẽpegũta ti wũhũ uñcũãno tiquiro docori wũhũ ijiro ne waha sa queherahye. <sup>26</sup>Sa yeye ijipihtiyequina yũhũ buherire tũhoepeta yũhũ dutiyere yerariquina, tũho masieniquiro wũhũ dahreriquire yero saha ijire. Tiquiro pehe ti wũhũre padũro buigã doco, quehnoano ye dũcaerahye. <sup>27</sup>Ti wũhũre peho tuhasari bato, acoro tutuaro ahta, dia mini yũhdũa waha,

wihnono tutuaro wēahye. Sa tutuaro wēno ti wūhū pehere wēdoque cū cāhye. Sa yero ti wūhū tutuaro bora sa quehea wahahye, ni yahuahye Jesu.

<sup>28</sup>Tiquiro sa ni buhegū tūhoye, tūho maria wahahye masa. <sup>29</sup>“Tiquiro potota pūhoro ijire. Sa yero quehnoano masi pehoriqiro ijiro marine buhere tiquiro. Mari judio masare buheyequina yero saha buherare”, ni tūhotuahye tiquina.

**Jesu cami bŭcŭ mŭna wihirore yūhdŭa wahagū yeahye**

*(Mr 1.40-45; Lc 5.12-16)*

**8** <sup>1</sup>Jesu cŭnŭpŭ buhe dujiriqiro dijiaa wahahye. Tiquiro dijiagū ihŭaŭne masa peyequina tiquiro bato wahahye. <sup>2</sup>Tiquiro sa wahagū ihcāqiro cami bŭcŭ mŭna wihiro tiquirore piti ca, dŭsepe curi mehna quehe sa, tiquirore siniahye.

—Pūhto, mūhū yūhŭre yūhdŭo duagŭ yūhdŭoya, niahye.

<sup>3</sup>Tiquiro sa nigū tūhoro tiquiro omoca mehna Jesu tiquirore ņa peohaye.

—Tire ye duaja. Mūhŭre yūhdŭgū yeitja, niahye Jesu tiquirore.

Tiquiro sa nigūta cami bŭcŭ mŭna yatia wahahye. <sup>4</sup>Sa ni tuhasa Jesu tiquirore niahye tja:

—Yūhū mūhŭre ohō saha yerire ne apequinare yahueracāhŭa. Mūhū pagŭre quehnoari pagŭ waharire pahire ihŭogŭ wahaya. Moiserē Cohācjŭ tiquiro cūriro sahata pahire minicjŭare ohoya mūhū yūhdŭarire masa ijipihtiyequina tiquina masino quehnoano, niahye Jesu.

**Surara pūhoro tiquiro cahacjŭno dohatigū Jesu yūhdŭoahye tiquirore**

*(Lc 7.1-10)*

<sup>5</sup>Sa ye Jesu Capernau wame tiri macapŭ tiquiro esagū cien surara pūhoro tiquiro cahapŭ esa, tiquirore tutuaro ohō saha ni sinidi:

<sup>6</sup>—Pūhto, yūhū cahacjŭno ne pagŭ tutueriqiro waha masiedaro tiquirore tutuaro purigū ya wūhŭpŭ cuñari tiquiro, nidi tiquiro Jesure.

<sup>7</sup>Tiquiro sa nigū,

—Aŭ, tiquiro dohatiyere yūhdŭogŭ wahaŭtja, nidi Jesu.

Tiquiro sa nigū ohō saha nidi surara pūhoro:

<sup>8-9</sup>—Pūhto, quehnoanota. Wahaegŭta. Yūhū yūhdŭoro quehnoa yūhdŭagŭ ijire mūhū. Ya wūhŭpŭ mūhŭre sajā ta dutibogŭ ijieraja yūhū. Mūhū masiŭe mehna yūhdŭoya tiquirore. Mūhū sa yegū yūhū cahacjŭno quehnoa waharota. Yūhŭre yūhū bui ijiyequina apequina pūhtoa dutire. Yūhū gūhū surarare dutiaja. Ihcāqirore “Wahaya”, yūhū nigū tiquiro wahare. Apeqirore “Ahtaya”, yūhū nigū tiquiro ahtare. Yūhū cahacjŭnore “Ahrire yeya”, yūhū nigū tire yere. Mūhū gūhū dutigŭta ijire. Sa yero mūhū dutiro sahata tiquiro dohatiriqiro yūhdŭrota, nidi tiquiro.

<sup>10</sup>Tiquiro sa nigū tūho maria waharo, peyequina masa tiquiro mehna ijiyequinare ohō saha nidi Jesu:

—Ijirota mŭsare niita niaja. Ahriqiro surara pūhoro Israe masŭno ijieriqiro Cohācjŭre tutuaro wacū tutuare. Tiquiro cahacjŭnore yūhū yūhdŭgū

yeatire masi tuhasare. Ne Israe masare ahriquiroyero saha ijiyequinare ihñedaga yũhũ. <sup>11</sup>Mũsare niita niaja. Peyequina ahriquiroyero saha Cohãcãjũre wacũ tutuayequina ijipihtiro cãena gãhũ uhmũse cãno pũhtoro tiquiroyero ijiropũ esa, topũ ijiyequina mehna ihyæta. Abrahã, Isaac, Jacob mehna ihyæta tiquina. <sup>12</sup>Masa apequina pehe Cohãcãjũ tiquiroyero ijiropũ wahaboriquina tiquina ijiepegũta ñanopũ nahitianopũ cohã cãnota tiquinare. Topũ tiquiroyero cohãriquina tutuaro uti, bũjũa witiye mehna bahque dihoeta, ni yahuri Jesu.

<sup>13</sup>Tire sa ni tuhasa, surara pũhtorore nidi.


—Tojoahya mũhũ ya wũhũpũ. Mũhũ cahacãjũno yũhdũrota. “Potota yũhdũrota”, ni mũhũ tũhoturiro sahata yũhdũrota, nidi Jesu.

Sa nigũta tiquiroyero cahacãjũno pehe quehnoa wahari.

### Pedro mareonore dohatiricorore yũhdũoahye Jesu

(Mr 1.29-31; Lc 4.38-39)

<sup>14</sup>Sa ye Jesu Pedro ya wũhũpũ esa, Pedro mareono dohatigũ ihñahye tiquiroyero. Ujuaye tigũ cũnahye ticoro. <sup>15</sup>Ticoro sa ijigũ ihñano ticoro omocare ña peoahye. Tiquiroyero sa ña peogũta ujuaye surua wahahye. Surugũ tũhoturo ticoro pehe wahcãdũca, tiquinare ihyayere peoahye.



(San Mateo 8.11)

**Jesu peyequina dohatiyequinare yũhdũoahye**  
(*Mr 1.32-34; Lc 4.40-41*)

<sup>16</sup>Sa ye ñamicahapũ peyequina watĩare cũoyequinare masa ne wihiahye Jesu cahapũ. Tiquina sa ne wihigũ ihñano ihcã tahata tiquiro waha dutigũ watĩa wahaa wahahye. Sa yero ijiphtiyequina dohatiyequina tiquina ne sariquinare yũhdũo pehoahye Jesu. <sup>17</sup>Sata yeahye tiquiro panopũ cjũno Cohãcjũ yere yahu mũhtariquiro Isaia tiquiro nidiro sahata. Ohõ saha ni ojoahye: “Mari dohatiyere yũhdũo cãnota tiquiro. Mari duti tiyere cohã cãnota”, ni ojoahye Isaia Jesure.

**Ihqũequina Jesu mehna waha duamahye**  
(*Lc 9.57-62*)

<sup>18</sup>Ape taha Jesu peyequina masa tiquiro cahapũ tiquina ijigũ ihñano, ohõ saha nidi.

—Ape sie pahrẽpũ isa pehãũhna, nidi.

<sup>19</sup>Sa usã pehãto pano mari judio masare buheriquiro Jesu cahapũ esa, ohõ saha nidi:

—Buhegũ, mũhũ mehna waha duaja noho mũhũ waharopũ, nidi.

<sup>20</sup>Jesu ohõ saha ni yũhtiri:

—Ihqũequina nũcũ cjẽna wahiquina tiquina coperi cũore. Minicjũa gũhũ tiquina suhti cũore. Yũhũ masũ Cohãcjũ ohorigũ pehe yũhũ carĩni wũhũ cũoeraja, ni yũhtiri Jesu.

<sup>21</sup>Sa ye apeqũiro Jesu buheriquiro ohõ saha nidi:

—Pũhto, yũhũ pacũ tiquiro yariagũ yarĩgũtja. Sa ya tuhasagũ pũrita mũhũ mehna wahagũtja, nidi tiquiro Jesure.

<sup>22</sup>Jesu yũhtiri:

—Yũhũre cahmeeñequina yariariquina yero saha ijire. Tiquina pehe yariariquinare yaahro. Sa yegũ mũhũ pehe yũhũ mehna cjũ ijicjũ ahtaya, nidi tiquiro.

**Jesu wihnonore yũsũ dutiahye**  
(*Mr 4.35-41; Lc 8.22-25*)

<sup>23</sup>Sa ni tuhasa yucũsapũ sajãri. Sa yena usã tiquiro buhena gũhũ tiquiro mehna waha, sajãũ. <sup>24</sup>Ti ditarapũ usã pehãgũ waro wihnono tutuaro wẽdi. Sa yero pahcõri yucũsare quẽ mio cãmedi. Sa wihnono wẽpegũta Jesu pehe carĩno nidi. <sup>25</sup>Sa wahagũ ihñana usã tiquirore wahcõu. Wahcõ ohõ saha nii:

—Pũhto, yũhdũoya. Mari minina tana niãjũ, nii usã.

<sup>26</sup>Usã sa nigũ Jesu yũhtiri:

—¿Dũhsena cue maca cãri mũsa? Yũhũre wacũ tutuerare mũsa, nidi Jesu usãre.

Sa ninota wahcãdũca sa, wihnonore pahcõri gũhũre “Yũsũahya”, nidi. Tiquiro sa nigũ wihnono yũhdũa wahari. Sa ye pahcõri gũhũ yũsũ dijiaa wahari. <sup>27</sup>Tiquiro sa yegũ ihña acũana, ohõ saha nii usã:

—¿Yohou, dũhse ijiriquiro boro masũno ijijari ahriquiro? Ahri wihnono, pahcõri gũhu tiquiro dutigũ yũhdũdũcaerare tiquireore, nii usã.

**Watia cwoyequinare watiare cohãhye Jesu**

*(Mr 5.1-20; Lc 8.26-39)*

<sup>28</sup>To bato pehã sa, Gadara cjẽna ya yehparũ esau. Topũ usã esagũ pũaro umua masa coperi caharũ ijiyequina Jesure piti cari. Tiquina watiare cwoyequina cuayequina ijiri. Sa yero topũ masa tiquina wahamehnenno ijiri. <sup>29</sup>Tiquirore piti ca, saũducuri:

—¿Mũhu Cohãcjũ macũ dũhse yegũ ahtajari mũhu usã caharũ? ¿Usãre Cohãcjũ tiquiro buhiri dahreati pje ijierapegũta usãre buhiri dahrei ahtaũ nijari mũhu? ni saũducuri tiquina.

<sup>30</sup>Tiquina caharũ peyequina yesea maca ihyaye nidi. <sup>31</sup>Tiquinare ihãñaẽ, watia ohõ saha nidi Jesure:

—Usãre cohãgũ sisequina caharũ waha dutiya usãre. Tiquina mehna iji dutiya usãre, ni sinidi watia Jesure.

<sup>32</sup>—Aũ, wahaya, nidi Jesu.

Tiquiro sa nigũ watia pũaro masa mehna ijiriquina waha, yesea caharũ esari. Tiquina mehna tiquina ijigũta yesea pari, pari cjũpũ oma maa buha, ditararũ bora ñojoa, mini yaria pihtia wahari.

<sup>33</sup>Tiquina sa wahagũ ihãñaẽ yeseare ihãa ihboyequina pehe cuea waha, oma maa cãa wahari. Macarũ esa, yesea tiquina minidire yahu site pehoahye. Watiare cwoyiquinare Jesu watiare tiquinapũre ijiriquinare cohã wiori gũhũre yahu pehoahye tiquina. <sup>34</sup>Sa tiquina yahu siteri bato ti maca cjẽna ijipihtiyequina Jesure ihãñaẽ ahtari. Sa ye tiquireore ihãñaẽ, tutuaro mehna waha dutiri tiquireore.

**Tini masieniquirore yũhdũoahye Jesu**

*(Mr 2.1-12; Lc 5.17-26)*

**9** <sup>1</sup>Sa ye Jesu yucũsarũ sajã, ditararũ pehã, tiquiro masari macarũ esahye. <sup>2</sup>Topũ apequina tini masieniquirore tiquiro cuñari cahsero mehna yo wua wihiahye Jesu caharũ. “Jesu ahriquirore dohatiyere yũhdũgũ yerota”, ni tũhotuahye tiquina. Tiquina sa ni tũhotugũ masino dohatiriquirore ohõ saha niahye Jesu:

—Bucueya mũhu. Mũhu ñãñe yeyere cohã tuhasaũ yũhu, niahye tiquiro.

<sup>3</sup>Tiquiro sa nigũ tũhoye ihquẽquina mari judio masare buheyequina ohõ saha ni tũhotumahye. “Ahriquiro ihyo ijiriquiro sa nino ‘Cohãcjũ ijijaja’, nino nine. Sa nino Cohãcjũre ñano nino nine”, ni tũhotumahye tiquina. <sup>4</sup>Tiquina sa ni tũhotugũ masino, ohõ saha niahye Jesu:

—¿Dũhsena sa ñano tũhotuajari mũsa? <sup>5</sup>“Mũhu ñãñe yeyere cohã tuhasaja”, yũhu nigũ “Ni mehogu ijire”, nine mũsa quehnoano masiedapenata. “Wahcãdũca, wahaya”, yũhu nigũ tiquiro tinigũ ihãna, yũhu nidi poto ijigũ duita mũsa masinata. <sup>6</sup>Yũhu masũ Cohãcjũ ohorigu

ahri yehparu masa tiquina ñañe yeyere cohã masiaja yuhu. Masa tiquina ñañe yeyere cohãcjüre cûri Cohãcjũ yuhure. Yuhu sa cohãrire masa masiato saha ohõ sahata ye ihñoutja masa ihñatire, niahye Jesu.

Sa ni tuhasa tini masieniquirote ohõ saha niahye:

—Wahcãdũcaya. Mũhu cuñari cahserore ne cãhña mũhu ya wũhũru, niahye tiquirote.

<sup>7</sup>Tiquiro sa nigũ tũhoro tini masieniquiro wahcãdũca sa, tiquirote ya wũhũru tojoa wahahye. <sup>8</sup>Sa wahagũ ihñañe masa cueahye. Sa ye Jesure Cohãcjũ tiquirote tutuayere tiquirote ohogũ ihñañe masa Cohãcjüre ño peo, quehnoano yahuducuahye.

### **Jesu Mateore pijiahye**

*(Mr 2.13-17; Lc 5.27-32)*

<sup>9</sup>Tiquina sa yeri bato Jesu topũ ijiriquiro ahta, yuhure Mateore boca sari. Pũhtoa ye ijiatire masare wapa ne cohtegũ ijimi. Sa yegũ ti pjere yuhũ dahrari tucũru dujii. Topũ yuhũ dujigũ ihñano ohõ saha nidi yuhure:

—Yuhu mehna cjũ ijiajũ ahtaya, nidi Jesu yuhure.

Tiquiro sa nigũ tũhogũ wahcãdũca tiquirote mehna wahaũ.

<sup>10</sup>Came ya wũhũru Jesu gũhu ihyaye ahtari. Peyequina wapa ne cohteyequina, “Ñano yeyequina”, tiquina niñequina gũhu usã mehna ihyari. <sup>11</sup>Tiquina mehna usã ihyagũ ihñañe, fariseo masa usãre Jesu buhenare ohõ saha nidi:

—¿Dũhse yero musare buheriquiro wapa ne cohteyequina mehna, ñano yeyequina mehna ihyajari? nidi tiquina usãre tiquirote buhenare.

<sup>12-13</sup>Tiquina sa nigũ tũhoro Jesu pehe queoye mehna buhero yũhtiri:

—Dohatieyequina duturure macaedare. Dohatieyequina dihita duturure macare. Ñañequina dohatieyequina yero saha ijire. Sa yegũ ñañequina dihitare tiquina ñañene yerire bujũa witi duti, quehnoañe pehere comesagũ yei ahtaũ nii yuhũ. Tiquina basi “Quehnoana ijiaja usã”, ni tũhotuyequinare yedohogũ ahtaerũ. Cohãcjũ tiquirote nidire tiquina ojarire masiña masa. “Wahiquinare masa wejẽ, ujuũ mũoñe mehna yuhure masa ño peogũ cahmedaja. Apequinare masa paja ihñagũ pehere cahmeaja”, ni ojoahye. Ahri tiquirote ojoari dũhse nidire masiña masa. Tire quehnoano buhe nemona wahaya, nidi Jesu fariseo masare.

### **Sijiyere sinituahye Ñu buheyequina Jesure**

*(Mr 2.18-22; Lc 5.33-39)*

<sup>14</sup>Came Ñu wame yeriquiro buheyequina Jesu caharu esa, sinituri:

—Usã Ñu buhena pehe peye tahari Cohãcjüre ño peona tana, sijiaja. Fariseo masa gũhu sata sijire. ¿Dũhse yeye mũhu buheyequina pehe sijierajari? nidi tiquina Jesure.

<sup>15</sup>Jesu tiquirote tũhotuyequina mehna queoye mehna buhero taro tiquinare ohõ saha ni yũhtiri:



(San Mateo 9.9)

—Ohō saha ijire ti: Omoca dūhteropu tiquina pijioriquina omoca dūhteriquiro mehna ijiye, siji masiedare. Sata yūhu buheyequina gūhu yūhu mehna ijiye, siji masiedare. Yūhu omoca dūhteriquiro yero saha ijiaja. Omoca dūhteriquiro bose deco tiquiro yegū tiquiro mehna cjēna bujūa witiye mehna ijierare. Sa yeye ihyeyequina ijierare. Yūhu Pacu Cohācjū yūhure tiquiro nedi bato pūritare yūhu buheyequina mehna ijisi yūhu. Sa yeye ti pjeṗata yūhu buheyequina gūhu sijieta, ni yūhtiri Jesu.

<sup>16</sup>Panopu cjē buheye wahma buheye mehna tiquina buhe more duagū ihñano ohō saha ni nemori Jesu tiquinare queoye mehna buhero.

—Ne wahma cahsero suhtiro cahsero mehna mūnano suhtirore sere ohōno cahmedare. Sa yegū wahma cahsero mari coseri bato mūnano suhtirore weje cahmecoa, paji yūhdūaro tūhnagū yere. (Ahri yero saha mūna buheyere wahma



buheye mehna piti dahre buheraro cahmene.) <sup>17</sup>Sa yena ne uhse co bisiye core wahiquire cahsero ajurore muna ajurore pose yeraro cahmene. Sa yegũ uhse co bisiye pahmuñepu muna ajurore tũhrẽ cãhre. Sa tũhnũgũ uhse co gũhu, ajuro gũhu cohãa wahare. Sa yena uhse co wahma core wahma ajuropu pose yero cahmene. Sa yegũ uhse co cohãeda, ajuro gũhu cohãedare. (Sata wahma buheye muna buheye mehna buhe moredaro cahmene,) ni yahuri Jesu tiquire.

**Jairo maconore maso, dii muna dohatiducurico gũhure yũhdũoahye Jesu**  
(Mr 5.21-43; Lc 8.40-56)

<sup>18</sup>Tiquiro sa ni yahuri watoa mari judio masa puhto mehna cjũno Jesu cahapu wihiri. Wihi, dũsepe curi mehna quehe sa, ohõ saha nidi.

—Yũhu maco mianogã yariaa wahari. Ticorore mũhu omocare duhu peogu ahtaya. Mũhu sa yegũ masanota, nidi tiquiro Jesure.

<sup>19</sup>Tiquiro sa nigũ tuhoru Jesu wahcãdũca tiquiro mehna wahari. Uũã tiquiro buhena gũhu wahũ. <sup>20</sup>Uũã mahapu wahaducugũ topu numino dii muna dohatiducurico Jesu batopu ahta, tiquiro suhtiro sohtoare dahra tuhuahye. Doce cũhmari waro decoripe dii muna dohatiro niahye. <sup>21</sup>Ohõ saha ni tuhtuahye ticoro sa yero: “Ti suhtirore dahra tuhugo, quehnoa wahagota”, ni tuhtuahye ticoro. <sup>22</sup>Ticoro sa yegũ masino Jesu majaredũca, ticorore nidi.

—Maco, bucueya mũhu. Mũhu yũhure wacũ tutuaye mehna quehnoago tojoare yojopure, nidi tiquiro.

Tiquiro sa nigũta yũhdũa wahari ticoro.

<sup>23</sup>Sa ye tuhasa Jesu puhtoro ya wũhũpu esari. Topu esa, ñehe quea utiyequinare weõgu mũte pohoro saha ijdũre putiyequinare ihũari. Peyequina masa tiquina ñano bisigũ gũhure tuhori tiquiro. <sup>24</sup>Tiquina sa yegũ ihũano masare ohõ saha nidi:

—Wijiaya mũsa. Yariere ticoro. Carĩno nine, nidi tiquire.

Tiquiro sa nigũ tuhoye “Sa ni maca cãno nine ahriquire”, niñe, masa bujuri tiquirore. <sup>25</sup>Sa yero wũhu puhiapure ijiyequina masare tiquiro wio pehori bato yariaricoro cahapu esa, ticoro omocare ñeheahye. Tiquiro sa ñehẽgũ masa quehe sa, wahcãdũca sahye ticoro. <sup>26</sup>Tiquiro sa yerire tuhoye, to cjẽna masa ijiptiyequina yahu siteri.

**Pũaro caperi bajueyequinare ihũagũ yeahye Jesu**

<sup>27</sup>Sa yero Jesu topu ijiriquiro wahagũ, pũaro caperi bajueyequina tiquirore pisu nũnũ tãri:

—Davi panami iji turiagu, masare yũhdũoacju, usãre paja ihũaña mũhu, ni saũducuri tiquina.

<sup>28</sup>Tiquina sa nigũta Jesu ape wũhũpu sajãri. Tiquiro sa sajãgũ masiñe caperi bajueyequina tiquiro cahapu sajãa wahari. Tiquina sa sajã sagũ ihũano tiquiro pehe sinituri tiquire:

—¿“Marine ihũagũ yerota tiquiro”, ni tuhtuajari mũsa yũhure? nidi tiquiro.

—Puhto, sata ni tuhtuaja usã, ni yũhtiri tiquina.

<sup>29</sup>Tiquina sa nigũta tiquina caperire ña peori. Ña peo ohõ saha nidi:

—Yũhũre “Sa yerota”, mũasa ni tũhoturo saha sa yeaja mũasa, nidi Jesu.

<sup>30</sup>Tiquiro sa nigũta tiquina caperi pehe quehnoa wahari. Sa ye Jesu ohõ saha nidi tiquinare:

—Ahri yũhũ ohõ saha yerire apequinare ne yahueracãhña, nidi.

<sup>31</sup>Tiquiro sa niepegũta waha, topũ ijiyequinare yahu siteri tiquina tiquiro sa yerire.

### Yahuduceriquire yahuducugũ yeahye Jesu

<sup>32</sup>Ti wũhũre tiquina wijiagũ waro ihcãquiro yahuduceriquire ne cãhtari masa. Watĩno tiquiro mehna ijiriquiro tiquirore yahuducueragũ yeahye. <sup>33</sup>Tiquina ne sagũ ihñano watĩnore Jesu cohã wiori. Tiquiro sa cohãgũ watĩnore cũoriquiro pehe yahuducua wahari. Tiquiro sa yegũ ihñãne ijiptiyequina ihña maria pihtia wahari.

—Ne, ahri yehpa Israe yehpapũre ohõ saha yeyere ihñedahti mari, ni yahuducuri tiquina basi.

<sup>34</sup>Fariseo masa pehe sijoro saha ni yahuducuri:

—Watĩa pũhtoro tutuaye mehna watĩare cohãre ahriquire, ni yahuducuri tiquina.

### Masare paja ihñahye Jesu

<sup>35</sup>Sa ye ijiptiye macari topũ ijiye macarigãre, bujũye macari gũhũre buhe tinino wahari Jesu. Quehnoãne buheyere judio masa mari buheye wũhũsepũ buhero wahari tiquiro. Sa yero Cohãcjũ pũhtoro tiquiro ijiatire yahuri. Ijiptiye dohatiye gũhũre to cjẽnare yũhdũori tiquiro. <sup>36</sup>Masa peyequina ñano yũhdũyequinare, pejecũoro wahayequinare tiquina ijigũ ihñano Jesu tiquinare paja ihñari. Tiquina oveja opana marieñequina yero saha tiquina ijigũ ihñano Jesu tutuaro paja ihñari tiquinare. <sup>37</sup>Sa yero ohõ saha nidi tiquiro usãre tiquiro buhenare, queoye mehna buhero:

—Trigo peye bũcua tuhasagũ peye ijigũ dahraye pajiro ijire. Sa ijipegũta dahrayequina pehe meheñequinagã ijire. Sata quehnoãne buheyere tũhoatiquina peyequina ijigũ pajiro ijire mari dahraye. Sa ijipegũta meheñequinagã dahrari masa yero saha quehnoãne buheyere buheatiquina gũhũ meheñequinagã ijire. <sup>38</sup>Sa yena quehnoãne buheyere buheatiquinare apequinare tiquiro ohoatire siniña Cohãcjũre, nidi Jesu.

### Jesu doce waro beseahye tiquiro ohoatiquinare

(Mr 3.13-19; Lc 6.12-16)

**10** <sup>1</sup>Came doce usãre tiquiro buhenare Jesu pijio, tutuayere ohori usãre. Watĩare usã cohã masiatire ijiptiye dohatiyere usã cohã masiatire ohori usãre.

<sup>2</sup>Ohō saha wame tii usã Jesu cūrina: Simo ijiri. Tiquiroreta Pedro ni pisuri Jesu. Simo bahuro Andre gũhu ijiri. Santiago gũhu tiquiro bahuro Ñu mehna ijiri. Tiquina Santiago gũhu pacuro Zebedeo wame tiri. <sup>3</sup>Felipe, Bartolomé, Tomasu, yũhu Mateo ijii usã. Yũhu pehe puhtoia ye ijiatire masare wapa ne cohtegũ ijimi. Usã mehna Santiago ijiri. Tiquiro pehe Alfeo macũno ijiri. Sa yero Tadeo gũhu ijiri. <sup>4</sup>Simo celote ya curua cãũno ijimediquiro, Juda Iscariote gũhu ijiri. Juda pehe Jesure ihña tuhtiyequinare ihñoatiquiro ijiri.

### Jesu tiquiro buheyequinare buhe dutiro ohoahye

(Mr 6.7-13; Lc 9.1-6)

<sup>5</sup>Sa ye usãre doce tiquiro buhenare ohoro, “Ohō saha yeya”, ni yahuri usãre Jesu:

—Judio masa ijieyequina cahapũre wahaeracãhña. Ne Samaria yehrapũ ijieye macaripũ gũhũre wahaeracãhña. <sup>6</sup>Israe yehpa cãena cahapũ pehere wahaya. Cohãcjũre masieñequina ijire tiquina. <sup>7</sup>“Uhmũse cãũno puhtoro tiquiro ijiatore mehenogã dũhsare”, ni buheya tiquinare. <sup>8</sup>Sa yena camĩ bucũ mũna wihare, apeye peye sijoro saha ijieye dohatiyere cũoyequina gũhũre yũhdũgũ yeya. Yariariquinare masoña. Watĩa masa mehna ijieyequinare cohãña tiquinare. Mũsare sa ohogu niãa ahri tutuayere. Sa yena mũsa gũhu yũhu sa ohoriro sahata masare yũhdũgũ yeya wapa neno marieno.

<sup>9</sup>Mũsa wahana niñerure ne nedacãhña. <sup>10</sup>Ne mũsa ajurore, pũaro camĩsare, pũa pa dahpo suhtire, tuaye cãũ gũhũre nedacãhña. Mũsa sañano dihitare sañaah wahaya. Apeye suhtire nedacãhña. Mũsa buhena waharopũ ijieyequina tiquina pehe mũsare pohe ijiatire ohoeta. Sata ohoro cahmene tiquinare.

<sup>11</sup>Ti macaripũ esana, mũsare quehnoano piti catiquirore macaña. Sa yena ti wũhũpũta tojoarĩña. Tee, coã wahanapũ wijiãa ti wũhũre. <sup>12</sup>Sa yena wũhũpũ saããna, “¿Ijiajari mũsa?” niña ti wũhu cãenare. Mũsare quehnoano tiquina cahmegũ “Cohãcjũ mehna quehnoano ijieye mũsa”, niña tiquinare. <sup>13</sup>Mũsare tiquina cahmedagũ, mũsa sa nĩborire niedacãhña. <sup>14</sup>Sa yena mũsare tiquina cahmedagũ, tiquina tuho dueragũ ti wũhũre wijiãa. Wijiãa, dahpocãri cãe dihta esa wahãrĩre wejẽ site cũña mũsa tiquinare tiquina ye buhirire masigũ yena. Ti macã cãena mũsare cahmedagũ sata yeya tiquina gũhũre. <sup>15</sup>Ijirota mũsare niita niãa. Ahri deco pihtigũpũre Sodoma cãena, Gomorra cãena gũhu tutuaro buhiri tiatiquinata ijire. Tiquina sa ijiepegũta tiquina yũhdũoro mũsare cahmeeñequina buhiri tiatiquina ijieya, ni yahuri Jesu.

### Jesu yequinare apequina ñano yeatire yahuahye Jesu

<sup>16</sup>Sa ni tuhasa ohō saha ni nemori:

—Yũhũre tuhoya mũsa. Oveja yero saha ijinare mũsare ñañequina watoa ohogu niãa. Tiquina ñañequina nũcũ cãena yayĩa usuayequina yero saha ijire. Sa yena mũsa pehe apequina wahiquina wacũ masieñequina yero saha ijieya. Sa ijina ijiepenata bujua yero saha ne usuena ijieya mũsa. <sup>17</sup>Quehnoano

yeya mûsa. Mûsare masa pũhtoare ohoeta. Judio masa mari buheye wũhusepũ quẽeta mûsare. <sup>18</sup>Sa yeye yeequina mûsa ijiri buhiri macari cjẽna pũhtoa cahapũ tiquina bui ijiequina pũhtoa cahapũ gãhũre neañeta mûsare. Sa yena mûsare topũ tiquina neagũ pũhtoare, judio masa ijiequina gãhũre quehnoañe buheyere buhenata mûsa. <sup>19-20</sup>Mûsare pũhtoare tiquina ohogũ tiquinare mûsa niatire “Yohou, masiedaboaga”, ni tũhotueracãhña. Mûsare tiquina sinitugũta mûsa niatire masinata. Sa masina tiquinare yahuna, mûsa tire mûsa esa tuharo yahuducuna nisi. Cohãcjũ pehe mari Pacũ tiquiro yaquiro Espĩritu mehna mûsare yahuducugũ yerota.

<sup>21</sup>Ti pjere tiquina wahmisũmũa tiquina bahanare wejẽ dutiye ohoeta pũhtoare yeequina tiquina ijiri buhiri. Tiquina pacũsũmũa tiquina pohne wejẽ dutiye ohoeta pũhtoare. Tiquina pohne pehe tiquina pacũsũmũare wejẽ dutiye ohoeta pũhtoare. <sup>22</sup>Sa yeye yeequina mûsa ijiri buhiri ihña tuhtieta masa ijipihitiyequina mûsare. Tiquina sa yepegũta ahri yehpapũ masa catiro puno mûsare tiquina ñano yerire ihcãno sahana yũhũre duhuerana, yũhdũnata mûsa. <sup>23</sup>Ihcã macapũ mûsare tiquina ñano yegũ ape macapũ duhti cãhña. Ijirota mûsare niita niaja. Israe yehpapũ ijie macarine mûsa pehoato pano, yũhũ masũ Cohãcjũ ohorigũ ahri yehpapũ toja taũtja.

<sup>24</sup>Ne ihcãquiro buheriquiro tiquirore yahuriquiro buipũ ijierare. Sa yero cahacjũno gãhũ tiquiro pũhtoro bui cjũno ijierare. <sup>25</sup>Sa yero ohõ saha tũhoturo cahmene buheriquirore: “Yũhũre buheriquiro yero sahata ijigũtja”, ni tũhoturo cahmene. Cahacjũno gãhũre sata ni tũhoturo cahmene. “Yũhũ pũhtoro yero sahata ijigũtja”, ni tũhoturo cahmene. “Tiquiro bui ijigũtja. Sa yegu yũhũ pũhtoro tiquiro ñano yũhdũriro sahata ñano yũhdũsi yũhũ pehe”, ni tũhotueraro cahmene. Yũhũ pehe wũhũ cjũno yero saha ijiaja. Mûsa pehe ti wũhũpũ dahrayequina yero saha ijire. Sa yeye masa yũhũre “Beelzebũ ijire”, ni yahusãñe, mûsa gãhũre yeequinare ñano ni yahuducuetã tiquina, ni yahuri Jesu.

### “¿Noa pehere cuegũ quehnoajari?” ni yahuahye Jesu

(Lc 12.2-7)

<sup>26</sup>Sa ni tuhasa ohõ saha ni nemori:

—Sa yena mûsare ñano yeyequinare cueracãhña. Masa tiquina yahuerarire came apequina masieta. Sa yeye tiquina nũori gãhũre apequina masieta. <sup>27</sup>Mûsare tũhoerogã yũhũ yahurire peyequina masa watoa buhe turiaya mûsa. <sup>28</sup>Masũnore wejẽñequina tiquiro pagũ dihitarẽ wejẽne. Tiquiro jeripohna yarierare. Sa yena mûsare wejẽ duayequinare cueracãhña. Cohãcjũ pehere cueya. Tiquiro mûsa pagũrere, mûsa jeripohnari gãhũre pecapũ cohã masine. Sa yena tiquiro pehere cueya.

<sup>29</sup>Pũaro siripia wapa mariedare. Tiquina sa wapa mariedapegũta ihcãquirogãre Cohãcjũ ne boerare. Cohãcjũ dutieragũ ne yarierare tiquirogã. <sup>30</sup>Sa yero mûsa poarire ne ihcã poa da dũhsaro marieno masi pehore Cohãcjũ. Sata mûsa ijie tiye gãhũre masi pehore Cohãcjũ. Sa

masino musare ihña ihboducure. <sup>31</sup>Siripiare tiqiro cahño yñdñoro, musa pehere cahñe Cohãcjũ. Sa yena pajiro tuhoturacãhña musa.

**Jesure musa wacũ tutuarire yahuya masare**  
(Lc 12.8-9)

<sup>32</sup>Ihcãqiro “Jesu yaqiro ijiaja”, masare tiqiro ni yahugũ yñhũ gũhũ tiqirore “Yaqiro ijire”, ni yahugutja yñhũ Pacure ùhmuse cjñnore. <sup>33</sup>Sa ijiepegũta ihcãqiro “Jesu yaqiro ijieraja”, masare tiqiro nigũ yñhũ gũhũ “Yaqiro ijierare tiqiro”, ni yahugutja yñhũ Pacure, ni yahuri Jesu.

**Jesu masare tu wagũ yere**  
(Lc 12.51-53; 14.26-27)

<sup>34</sup>Sa ni tuhasa ohõ saha ni yahu nemori:

—¿Dũhse ni tuhutuajari musa yñhũre? ¿“Tiqiro masare tiqiro buheri bato apequina tiquinare ihña tuhtisi”, ni, tuhutuajari musa? Sa ijierare. Masare yñhũ buheri bato ihquẽquina yeere tũhoeta. Apequina pehe tiquinare ihña tuhtieta. Ihcãno saha ijisi masa. <sup>35</sup>Bucũna yñhũ buheyere tiquina tũhori buhiri tiquina pohne tiquinare ihña tuhtieta. Bucũna numia gũhũ yñhũ buheyere tiquina tũhori buhiri tiquina pohna numia tiquinare ihña tuhtieta. Tiquina mareosãnumia yñhũ buheyere tiquina tũhori buhiri tiquina macũ namosãnumia tiquinare ihña tuhtieta. <sup>36</sup>Sa yeye masa tiquina acayere ihña tuhtiequina ijietta.

<sup>37</sup>Yñhũre tiquina cahĩboriro yñdñoro tiquina pacusũmũa pehere cahĩ yñhdũdũcaye, yeequina ijisi tiquina. Yñhũre tiquina cahĩboriro yñdñoro tiquina pohne pehere cahĩ yñhdũdũcaye, yeequina ijisi tiquina. <sup>38</sup>Sa yeye apequina curusapũ yariariro saha yeequina tiquina ijiri buhiri ñano yñhdũeta tiquina gũhũ. Sata ñano yñhdũ dueyequina yeequina ijisi tiquina. <sup>39</sup>Masa yñhũre wacũno marieno tiquina esa tuharo yeye pecapũ wahaeta tiquina. Sa yeye yeere sa yeducuye ijipihtiye decori yñhũ mehna ijietta tiquina, ni yahuri Jesu.

**Mari wapatatire yahuahye Jesu**  
(Mr 9.41)

<sup>40</sup>Sa ni tuhasa ohõ saha ni yahu nemori:

—Musare yeequinare ihcãqiro quehnoano cahmeno, yñhũ gũhũre cahmeno nine tiqiro. Sa yero tiqiro yñhũre quehnoano cahmediqiro yñhũre ohoriquiro gũhũre cahmeno nine. <sup>41</sup>Sa yero Cohãcjũ yere yahuriquiro wapatarota. Tiquirore quehnoano yerota Cohãcjũ. Sa yero tiqiro yere yahuriquiro tiqiro ijigũ ihñano apeqiro pehe yahuriquirore quehnoano cahmeno, yahuriquiro yero sahata wapatarota tiqiro gũhũ. Sa ye apeqiro quehnoano yeriquiro wapatarota. Sa yero quehnoano yeriquiro tiqiro ijigũ ihñano apeqiro pehe tiqirore quehnoano cahmeno, quehnoano yeriquiro yero saha wapatarota tiqiro gũhũ. <sup>42</sup>Yaqirogã ihcãqiro tiqiro ijigũ ihñañe dũhse ijieyequina tiqirogãre acore mehenogã tiquina sihõepẽgũta, potota tiquinare quehnoano yerota Cohãcjũ, ni yahuri Jesu.

Ñu wame yeriquiro tiquiro buheyequinare Jesure sinitu dutiro ohoahye  
(Lc 7.18-35)

**11** <sup>1</sup>Ûsãre tiquiro buhenare tiquiro sa ni yahuri bato to cahapũ ijiye macaripũ buhero wahari tiquiro.

<sup>2</sup>Sa ye tiquiro yerire Ñu peresupũ ijiriquiro tũhoohaye. Sa tũhooro Ñu tiquiro buheyequinare Jesure sinitu dutiro ohoahye. <sup>3</sup>Sa ye Jesu cahapũ esa, sinituri tiquina Ñu buheyequina.

—¿Ñu “Yũhũ bato apequiro ahtarota”, tiquiro nidigũ ijijari mũhũ? ¿Tiquiro nidigũ mũhũ ijieragũ apequirore cohtenatari usã? ni sinituri tiquina pehe Jesure.

<sup>4</sup>Tiquina sa nigũ tũhoro Jesu yũhtiri:

—Yojoopũre mũsa tũhorire, mũsa ihñarire Ñure yahuna wahaya: <sup>5</sup>“Caperi bajueyequina ihñare. Tini masieñequina tinine. Cami bũcũna quehnoa wahare. Cahmono tũhoeyequina tũhoa wahare. Yariariquina masaa wahare. Tiquina ijipihtieyquinare quehnoa wahagũ yei yũhũ. Sa yegũ pejecũoyequinare quehnoañe buheyere yahuaja. <sup>6</sup>Yũhũre tũhoriquiro “Poto ijire”, niniquiro tiquiro bucueriquiro ijire, nidi”, ni, Ñure yahuna wahaya, nidi Jesu.

<sup>7</sup>Ñu buheyequina tiquina wahari bato, Jesu pehe Ñu ijiye tiyere yahu dũcari peyequina masare:

—Masa marienopũ taare wihnono wẽdoqueo mũjagũ ihñana eserari mũsa.

<sup>8</sup>“Quehnoañe suhti tiriquirore ihñana wahaũhna”, niedari mũsa masa marienopũ wahana. Quehnoañe suhti tiyequina wapa bũjũyere cũoyequina pũthoa ye wũhũsepũ ijire. <sup>9</sup>Masa marienopũ esana Cohãcjũ yere yahu mũhtariquirore ihñana esari mũsa. Ijirota ijire. Ñu Cohãcjũ yere yahu mũhtariquiro ijire.

Apequina Cohãcjũ yere yahu mũhtañequina yũhdũoro ijiriquiro ijire tiquiro pehe.

<sup>10</sup>Panopũ Cohãcjũ yere tiquina ojoari pũpũ Ñure ohõ saha ni yahuahye:

Mari Pacũ tiquiro macũnore ohõ saha niahye: “Mũhũ pano mũhũre yahuyuatiquirore ohogũ niaja”, niahye, ni ojoahye panopũre Ñure.

<sup>11</sup>Mũsare ijirota niaja. Apequina ijipihtieyquina bui ijire Ñu wame yeriquiro. Ahri decoripũre tiquiro sa ijiepegũta ãhmũse cjũno pũhtoro ijioropũre ijipihtieyquina docapũ ijiriquiro pũrita Ñu bui ijire.

<sup>12</sup>Ñu wame yeriquiro tiquiro buhe, wame ye dũcagũ peyequina masa ãhmũse cjũno pũhtoro ijioropũ tiquina tutuaye mehna, tiquina esa tuhoro sajà duamedi. <sup>13</sup>Cohãcjũ yere yahu mũhtañequina tiquina ojoarire, Cohãcjũ Moiserere tiquiro cũripũ gũhũre buhena Cohãcjũ tiquiro pũhtoro ijiatore masiaja mari. Ñu gũhũ tireta yahuri. <sup>14</sup>“Elia ahtarota”, panopũ tiquina nidiquirota ijire Ñu pehe. Panopũ cjẽna tiquina nidire “Poto ijire”, ni duana Ñu tiquina sa nidiquiro tiquiro ijigũ masinata mũsa. <sup>15</sup>Quehnoano tũhoya mũsa ahrire.

<sup>16</sup>¿Yojoopũ cjẽna masa yabequina yero saha ijijari tiquina, mũsa tũhotugũ? Tiquina macanagã yero saha ijire. Apequina tiquina cahmeno saha tiquina yeragũ bucuere tiquinagã. Doeri cjẽ duaropũ ape dujiye, ohõ saha ni pisupere tiquinagã basi: <sup>17</sup>“Mũsa basatire usã putipemi. ¿Dũhsena mũsa basaerari usã

tire putigũ? Usã tutuaro ñehe quea utipe, sañuducupemi. ¿Musa pehe dahsena usã mehna utiperari?” niducuriquina yero sahata ijire yojopũ cjëna gũhu. Yojopũ cjëna tiquina cahmeno saha usã yeragũ ihñañe bucuere tiquina gũhu. <sup>18</sup>Tiquina yero saha yena ohõ saha yere musa yojopũ cjãna. Ñu wame yeriquiro Cohãcjũre ño peoro taro sijiro, vinore sihniedari. Tiquiro sa sihniedagũ ihñana “Watĩnore cãoriquiro ijire”, nimedi musa tiquiro pehere. <sup>19</sup>Yũhu masu Cohãcjũ ohorigu ijigu yũhu ihya, sihniaja. Yũhu sa yegũ ihñana ohõ saha nine musa yũhu pehere: “Ihñaña. Ahriquiro pajiro ihyariquiro, queheriquiro ijire. Wapa ne cohteyequina, ñano yeyequina gũhu tiquina piti tiriquiro ijire tiquiro”, nine musa yũhũre. Sa nina macanagã yero saha yahuducuna nine musa. Musa cahmeno saha usã yeragũ bucuere musa. Sa masiedapenata usã ye ihñorire ihñana, Cohãcjũ yere usã masigũ masinata musa, nidi Jesu tiquinare.

**Tiquina ñañene bujua witieyequina ye macari cjënare tuhtiahye Jesu**  
(Lc 10.13-15)

<sup>20</sup>Apeye macari cjënare tuhtiri Jesu. Ti macarine apeye macari yũhdũoro Cohãcjũ tutuaye mehna ye ihñomedi tiquiro. Tiquiro sa ye ihñoepegũta tiquina ñañe yerire duhuerari tiquina. Sa yero ohõ saha ni tuhtiri Jesu tiquinare.

<sup>21</sup>—Corazín cjãna, musa ñano yũhdũnata. Betsaida cjãna, musa gũhu ñano yũhdũnata. Musa ye macaripũre Cohãcjũ tutuaye mehna ye ihñomi. Tiro wame tiri macare, Sidõ wame tiri maca gũhũre tiquiro tutuaye mehna yũhu ye ihñogũ ihñañe panopũ to cjëna pehe tiquina ñañene bujua witiboaga. Sa yeye quehnoañene comesaboaga. Masa dija suhtire saña, peca cjë nujuare tiquina bui dahra site peoboaga tiquina ñañene bujua witiyere ihñõe.

<sup>22</sup>Musare niita niaja. Buhiri dahreati deco ijigũ Cohãcjũ Tiro cjëna, Sidõ cjëna yũhdũoro musa pehere musa ñari buhirire ña yũhdũaro buhiri dahrerota.

<sup>23</sup>Capernaũ cjãna, musa esa tuharo uhmũsepũ waha duamede. Musare Cohãcjũ pecarũ cohãnota. Musa ya macarũ Cohãcjũ tutuaye mehna ye ihñomi. Musa yũhũre tuhoerari. Sodoma wame tiri macare Cohãcjũ tutuaye mehna yũhu ye ihñogũ ti maca pehe yojopũre ijiboaga. <sup>24</sup>Musare niita niaja. Buhiri dahreri deco ijigũ Cohãcjũ Sodoma cjëna yũhdũoro, musa pehere musa ñari buhiri ña yũhdũaro buhiri dahrerota, nidi Jesu ti macari cjënare.

**—Yũhu cahapu sona taya, niahye Jesu**  
(Lc 10.21-22)

<sup>25</sup>Ti pjere ohõ saha nidi Jesu tiquiro Pacũro mehna yahuducuro:

—Yũhu Pacũ, mũhũ uhmũse cjëna pũhto, ahri yehpa cjëna pũhto ijire. Ahri mũhũ buheyere “Quehnoano masina ijiaja usã”, niñequinare masigũ yerare mũhũ. Buhe pehoeyequina pehere mũhũ yere masigũ yere mũhũ. Mũhũ sa yegũ, “Quehnoare”, niaja yũhu mũhũre. <sup>26</sup>Sata ijire. Tiquina pehere masigũ cahmedi mũhũ, nidi Jesu tiquiro Pacũrore.

<sup>27</sup>Sa yero masare ohõ saha ni yahu nemori:

—Yuhũ Pacũ ijipihtiyere yuhũre ohori. Tiquiro dihita yuhũre quehnoano masine. Sa yena usã dihita yuhũ masi dutiyequina mehna yuhũ Pacũre masiaja usã. <sup>28</sup>Musa ñañe apee boro nucũñe yero saha ijire. Nucũñene wũana musa tahrĩno saha ñañene wahyia wahare musa. Sa wahyiarina ijina yuhũre cahmeña musa. Musare sogũ yeitja. Musa ñañe yeyere duhugũ yeitja. <sup>29</sup>Yuhũ dutiyere yeya. Yeere quehnoano masiña. Yuhũ paja ihñagũ ijiaja. Sa yegũ yuhũdũcaegũ ijiaja. Yuhũ sa ijigũ yeere quehnoano masiña musa. Sa yena soye mehna quehnoano jeripohna tinata musa. <sup>30</sup>Yeere musa yegũ mijjoedare. Sa yero musa wũaye ti nucũedaro sahata yuhũ pehe musare mehenogã ye dutiaja, nidi Jesu.

### Judio masa tiquina sori decore trigore peheahye Jesu buheyequina

(Mr 2.23-28; Lc 6.1-5)

**12** <sup>1</sup>Mehenogã tiquiro sa ni buheri bato saurũ ijigũ usã Jesu mehna trigo wesepũ esau. Usã tiquiro buhena ujua ahbana, trigore pehe, ihya tuhasa, yuhũ cãa wahau usã. <sup>2</sup>Usã sa yegũ ihñañe, fariseo masa Jesure ohõ saha nidi:

—Tuhorĩna usãre. ¿Dũhse ye mũhũ buheyequina saurũ mari sori deco ijiepegũta dahrajari? Marine dutiyere yuhũdũcaye nine, nidi tiquina.

<sup>3-4</sup>Jesu yũhtiri. “Yuhũ buheyequina yuhũdũcaye niedare”, ni yahuro taro ohõ saha ni yũhtiri:

—Davi tiquiro mehna cjẽna mehna ujua ahbaro Cohãcjũ wũhũpũ sajã, Cohãcjũ ye pãre ihyahye. Ti pãre pahia dihita ihyae tiahye. Cohãcjũ dutiyere tiquina ojoari pũ apeqinane ti pãre ihya dutierare. ¿Davi gũhũ tire tiquina yerire Cohãcjũ ojoari pũpũ buherari musa? (Ti pãre ihyaro Cohãcjũre yuhũdũcaro niedahye. Miare ahri pjerire ihyaye yuhũ buheyequina gũhũ Cohãcjũre yuhũdũcaye niedare.) <sup>5</sup>Sa ye Cohãcjũ wũhũpũ dahrayequina pahia ne soerare mari soye decorire. Sa soerapeta Cohãcjũ dutiyere yuhũdũcayequina ijierare. ¿Tire buherari musa Cohãcjũ Moiserre tiquiro cũri pũpũ? <sup>6</sup>Musare niita niaja. Cohãcjũ wũhũre ño peona ti wũhũpũ dahrayequina tiquina soeragũ ihñapenata “Quehnoanota”, nine musa. Ti wũhũ yuhũdũoro yuhũ pehere ño peoro cahmene. <sup>7</sup>Cohãcjũ yere tiquina ojoari pũ ohõ saha nine: “Wahiquinare wejẽ, ujua muoñe mehna yuhũre musa ño peogũ cahmedaja. Apeqinare musa paja ihñagũ pehere cahmeaja yuhũ”, nine tiquiro yere tiquina ojoari pũ. Tiquiro sa nidire musa quehnoano tuhona, yuhũ buheyequinare tiquina buhiri mariedapegũta tiquinare tuhtieraboaga musa. <sup>8</sup>Yuhũ masu Cohãcjũ ohorigu ahri deco saurũ decore masa tiquina yeatire yahugũ ijigũ pũhto ijiaja, nidi Jesu fariseo masare.

### Omoca bũhariquiro quitu ijire

(Mr 3.1-6; Lc 6.6-11)

<sup>9</sup>Tiquiro sa nidi bato waha, judio masa mari buheri wũhũpũ esau usã Jesu mehna. <sup>10</sup>Topũ omoca bũhariquiro ijiri. Sa yeye fariseo masa pehe Jesure yahusãñe tehe, tiquirore sinituri:



—Saurú decore mari sori decore masunore yuhdno dutierare Cohãcjũ.  
¿Sata ijajari, mũhu tũhotugũ? ni sinituri tiquina.

<sup>11</sup>Jesu yũhtiri tiquinare:

—¿Mũsa yaquiro oveja saurú ijigũ copepũ tiquiro bora sajãgũ tiquirore ne wioeraboagari mũsa? Ne wionata mũsa. <sup>12</sup>Oveja yuhdnooro ijire masuno pehe Cohãcjũ tiquiro ihñagũ. Sa yero saurú ijigũ quehnoañene mari yegũ quehnoarĩne, ni yũhtiri Jesu tiquinare.

<sup>13</sup>Tiquiro sa nidi bato omoca bũhariquirore ohõ saha nidi:

—Mũhu omocare siõ potoya, nidi tiquiro.

Tiquiro sa nigũ omoca bũhariquiro pehe siõ poto, omoca quehnoa wahari ape omoca quehnoari omoca yero saha. <sup>14</sup>Sori decore tiquiro sa yegũ ihñañe, fariseo masa waha, tiquina basi ohõ saha niahye:

—¿Dũhse Jesure wejẽnatari mari? niahye tiquina basi.

### **Cohãcjũ yere yahu mũhtariquiro panopũ cjũno Jesure yahuahye**

<sup>15</sup>Jesu tiquina sa nidire masino, waha wahari. Tiquiro sa wahagũ peyequina masa tiquirore nũnũ tãri. Sa yero tiquiro pehe ijipihtiequina tiquina mehna cjẽnare dohatiyequinare yuhdũgũ yeri. <sup>16</sup>Sa yero dohatiyequinare tiquinare tiquiro yuhdũorire apequinare yahu site dutierari tiquiro. <sup>17</sup>Sa dohatiyequinare yuhdũgũ yero, Cohãcjũ yere yahu mũhtariquiro Isaia panopũ tiquiro ni ojoariro sahata yero nidi Jesu. Ohõ saha ni ojoahye Isaia:

<sup>18</sup>Ohõ saha nine Cohãcjũ: “Ahriquiro yũhu cahacjũno ijire. Tiquiro yũhu beseriquiro ijire. Tiquirore cahĩaja. Sa yegũ tiquiro mehna bucueaja. Yaquiro Espĩriture tiquirore ohogũtja. Sa yero yũhu tutuaye mehna ijipihtiequina masare yũhu buheyere yahurota tiquiro. <sup>19</sup>Sa yahuro tiquiro ne purĩno mehna yahusi. Sa yero sañuducusi. Sa yero maca cjã mahapũ peyequina masa watoa tiquiro tutuaro sañuducu yahusi. <sup>20</sup>Wũjũgũ nuhrino cuadũ tiquiro nuhriedagũ yero saha masa gũhũre quehnoano yerota tiquiro. Mehenogã ẽjũri pecare tiquiro yatigũ yeraro saha masa gũhũre quehnoano yerota tiquiro. Sata yeducurota tiquiro watĩnore tiquiro yuhdũducato pano. <sup>21</sup>Sa yeye peyequina masa tiquirore wacũ tutueta”, nine Cohãcjũ, ni ojoahye Isaia.

—Jesu watĩno tutuayere cõore, ni yahusãhye masa

*(Mr 3.20-30; Lc 11.14-23; 12.10)*

<sup>22</sup>Ihcã deco watĩno cõoriquirore masa ne cãhtari Jesu cahapũ. Tiquiro pehe watĩnore cõoro yahuducu masiedari. Sa yero caperi ne bajuerari. Tiquina sa ne wihigũ ihñano, yuhdũgũ yeri Jesu tiquirore. Tiquiro sa yegũ watĩno cõoriquiro ihña, yahuducuri. <sup>23</sup>Tiquiro sa wahagũ ihñañe, masa ihña maria wahari.

—¿Ahriquiro Davi panamino iji turiariquiro masare yuhdũoatiquiro ijajari? nidi tiquina basi.

<sup>24</sup>Jesu watĩare tiquiro cohãrĩre tũhoye fariseo masa ohõ saha ni tũhoturi:

—Beelzebú watía pũhtoro tiquiro tutuaye mehna watĩare cohãre Jesu, ni tũhoturi tiquina.

<sup>25</sup>Tiquina sa ni tũhotugũ masino, Jesu queoye mehna yahuri tiquinare, “Watĩno ye tutuaye mehna watĩare cohãgũ niedaja”, nino taro:

—Ihcã yehpa cjẽna tiquina basi cahmequeñe, ti yehpa cjẽna waha pihitia wahaboaga. Ihcã maca cjẽna tiquina basi cahmequeñe ti maca cjẽna waha pihitia wahaboaga. Ihcã wũhu cjẽna gũhu sata wahaboaga. <sup>26</sup>Sa yeye Beelzebú watía pũhtoro pehe watĩare cohãno, tiquina watía tiquina basi cahmequeñe niboaga. Sa ye tiquina gũhu waha pihitia wahaboaga. <sup>27</sup>Ohõ saha ni yahusãre mũa yũhure: “Tiquiro Beelzebú yedohoye mehna watĩare cohãre”, ni yahusãre mũa. Mũa mehna cjẽna gũhu watĩare cohãre. ¿Watĩno tiquiro tutuaye mehna watĩare cohãjari tiquina gũhu, mũa ihñagũ? Sa cohãedare. Tire masine mũa. Yũhu gũhu watĩno tutuaye mehna watĩare cohãedaja. <sup>28</sup>Sa yegũ yũhu pehe watĩare cohãgũ Cohãcjũ yaquiro Espĩritu tutuaye mehna tiquinare cohãja. Yũhu sa cohãgũ ihñana ohõ saha masiña mũa: Cohãcjũ masa bui pũhtoro ahri yehpapũre iji tuhasare yojopũre.

<sup>29</sup>Ohõ sahata ijire queoye mehna mari buhegũ: Tutuariquiro ya wũhũpũ arequiro sajã sa yaque masiedare. Tutuariquirore dũhteraro tiquiro ya wũhũpũ sajã sa yaque masiedare. Tutuariquirore tiquiro dũhteri bato sajã sa yaque masine, ni yahuri Jesu.

(Sa ni yahuri, watĩnore tiquiro yũhdũdũcarire yahuro. Watĩno tutuariquiro tiquiro ijiepegãta Jesu tiquirore yũhdũdũcare watĩare cohãno.)

Sa ni tuhasa ohõ saha ni yahu nemori Jesu.

<sup>30</sup>—Ihcãquiro yũhure cahmedaro, yũhure ihña tuhtiriquiro ijire. Ihcãquiro yũhure yedohoeraro, yũhure wape tigũ yero nine.

<sup>31</sup>’Sa yegũ mũsare poto niita niãja yũhu. Ijipihtiyẽ ñañene masa tiquina yegũ, yahuducugũ gũhure Cohãcjũ bo masine. Sa boeperota Espĩritu Santore tiquina ñano ni yahuducugũ ti pũritare ne bosì. <sup>32</sup>Yũhure masũ Cohãcjũ ohorigũre yũhure tiquina ñano ni yahuducurire bo masine Cohãcjũ. Espĩritu Santo pehere tiquina ñano ni yahuducurire ne bosì Cohãcjũ. Yojopũre, deco pihitigũ gũhure tiquina sa nidire bosì tiquiro, ni buheri Jesu tiquinare.

**Masa tiquina yahuducuyere tũhona tiquina ijieye tiyere masiãja mari**  
(Lc 6.43-45)

<sup>33</sup>Sa yero queoye mehna buhero ohõ saha ni yahu nemori tiquinare:

—Quehnoadũ yucũgũ quehnoañene dũca tire. Ñadũ yucũgũ ñañene dũca tire. Yucũgũ dũcare masina “Tũ dũcata ijire”, ni masiãja mari. Mari sa masino saha masa tiquina yahuducuyere tũhona tiquina ijieye tiyere masiãja mari.

<sup>34</sup>Añaa yero saha ñana ijire mũa. Mũa ñana ijina, quehnoañene ni masiedare mũa. Mari wacũñepũ mari tũhoturiro sahata mari dũseropũ wijiare.

<sup>35</sup>Quehnoariquiro quehnoañene tũhoture. Sa yero quehnoañene yahuducure. Ñariquiro ñañene tũhoture. Sa yero ñañene yahuducure. <sup>36</sup>Quehnoano tũhotu

yahuducuna ijiya m̄sa. Quehnoano yahuducuerana, buhiri dahreati deco ijigũ m̄sa sa ni maca c̄arire Cohãcjũre yahu yũhdũnata. <sup>37</sup>Queoro m̄sa yahuducurire masino “Quehnoana ijire”, ninota Cohãcjũ. Sa yero ñano m̄sa yahuducurire masino “Ñana ijire”, ninota tiquiuro, nidi Jesu tiquinare.

**Masa ñañequina Jesure Cohãcjũ tutuaye mehna ye ihño dutiahye**  
(Mr 8.12; Lc 11.29-32)

<sup>38</sup>Tiquiuro sa nidi bato mari judio masare buheyequina, fariseo masa gũhũ tiquiore ohõ saha nidi:

—Buhegũ, Cohãcjũ ohorigũ ijigũ Cohãcjũ tutuaye mehna ye ihñoña usãre, nimesi tiquina.

<sup>39</sup>Jesu yãhtiri:

—Yojoꝛũ cjẽna ñañequina, Cohãcjũre cahmeeñequina Cohãcjũ tutuaye mehna yũhũ ye ihñogũ ihña duamene. Tiquina sa ihña duepegũta Cohãcjũ yere yahu m̄ãhtariquiore Jona panopũ cjũnore Cohãcjũ tiquiuro tutuaye mehna tiquiuro yeri dihitare ye ihñonota masare. <sup>40</sup>Jona ihtia deco waro pajiriquiuro wahi paa puhiaꝛũ ijiahye. Tiquiuro sa wahariro sahata yũhũ gũhũ masũ Cohãcjũ ohorigũ ihtia deco waro masa copeꝛũ ijigũta. <sup>41</sup>Nĩnive cjẽna pehe Jona Cohãcjũ yere tiquiuro yahurire tũhoye tiquina ñañe yerire bujũa witiyahye. Sa bujũa witiyequina ijije buhiri dahreati deco ijigũ tiquina yojoꝛũ cjẽnare tiquina ñañene bujũa witiyequinare “Ñañequina ijire”, ni, yahusãeta. Jona tiquinare Cohãcjũ yere tiquiuro yahugũ tũhoye quehnoañene cahmeahye tiquina pehe. Sa cahmeñe quehnoano yeye niahye yojoꝛũ cjẽna yũhdũoro. Sa yeye tiquina yojoꝛũ cjẽnare yahusãeta. M̄sare niita niaja. Yojoꝛũ m̄sare yũhũ buheye Jona tiquiuro buheri yũhdũoro ijire. <sup>42</sup>Sa ye buhiri dahreati deco ijigũ pũhtoro sur cjõno panopũ cjõno ducu, yojoꝛũ cjẽnare “Ñañequina ijire”, ni yahusãnota ticoro gũhũ. Ticoro Salomo panopũ cjũno tiquiuro masiñene tũho duaro yoaropũ ahri yehpa ape sieꝛũ ijiricoro Salomore tũhoro ahtahye. Sa yero quehnoano yero niahye yojoꝛũ cjẽna yũhdũoro. Sa yero ticoro yahusãnota yojoꝛũ cjẽnare. M̄sare niita niaja. Yojoꝛũ m̄sare yũhũ buheri Salomo tiquiuro buheri yũhdũoro ijire, nidi Jesu tiquinare.

**Watĩno pari turi masũnore tiquiuro sajãri quitire yahuahye Jesu**  
(Lc 11.24-26)

<sup>43</sup>Sa yero pari turi Jesu tiquiuro tũhotuye mehna ohõ saha ni quiti yahuri tiquinare:

—Watĩno masũno mehna ijiriquiuro waha, aco marieni yehpaꝛũ tini, tiquiuro ijiatore macamahye. <sup>44</sup>Sa bocaeraro, ohõ saha ni tũhotuahye tiquiuro. “Masũno yũhũ cohãriquiuro mehnata pari turi ijigũ wahaũtja”, ni tũhotuahye tiquiuro. Sa ni tũhoturo tojoaa waha, tiquiuro cohãriquiuroreta bocahye. Sa tiquiuro bocagũ masũno pehe quehnoariquiuro ijimahye. <sup>45</sup>Sa yero watĩno apequina siete watĩare tiquiuro yũhdũoro ñañequinare pijiro wahahye. Tiquiuro sa pijigũ tiquina ijipihtiyequina tiquiuro mehna ijiahye. Masũno

pehe to pano ihcãquiro watĩnore curo, ñariquiro ijimahye. Camerũ pehere peyequina watĩare curoquiro ijiro, to pano tiquiro ijiriro yũhdũoro ña yũhdũariquiro ijiahye. Yojopũ cĵena Cohãcĵure cũomediquina tiquirore cohãne, tiquina gũhu ña yũhdũayequina waro wahaeta, nidi Jesu tiquinare.

### Jesu acaye tiquirore yahu duahye

(Mr 3.31-35; Lc 8.19-21)

<sup>46</sup>Masare tiquiro sa ni yahuducuri watoa tiquiro pacoro tiquiro bahana mehna sopecahapũ ducu, tiquirore yahu duari. <sup>47</sup>Sa yero ihcãquiro Jesure yahuri:

—Mũhu paco mũhu bahana mehna mũhũre yahu duaye sopecahapũ ducuri, nidi.

<sup>48</sup>Tiquiro sa nigũ tũhoro topũ ijieyquinare ohõ saha nidi Jesu tiquinare buhero taro:

—¿Noa ijijari yũhu paco, yũhu bahana gũhu, mũsa ihũagũ? nidi.

<sup>49</sup>Sa nino, usãre tiquiro buhenare ñupuha, ohõ saha nidi:

—Ahriquina ijire yũhu paco, yũhu bahana yero saha ijieyquina.

<sup>50</sup>Tiquina yũhu Pacũ hũmũse cĵeno tiquiro cahmeñene yere. Sa yeyequina yũhu bahũ, yũhu baho, yũhu paco yero saha ijire, nidi Jesu tiquinare.

### Jesu oteriquiro quitire yahuahye

(Mr 4.1-9; Lc 8.4-8)

**13** <sup>1</sup>Ti decota Jesu wũhũpũ ijiriquiro wijiari. Wijia, ditarapũ waha, ditara dũhtũ cahapũ dujiri. <sup>2</sup>Tiquiro sa dujigũ ihũãne peyequina masa tiquiro cahapũ cahmecoa wahpaa waha, bihsaro yeri Jesure. Sa bihsagũ ihũano yucũsarũ sajã, tiapũ dujiri tiquiro. Masa pehe padũropũ ducuri. <sup>3</sup>Sa yero tiquiro peye queoye mehna yahuri tiquinare, buhero taro. Ohõ saha nidi tiquiro:

—Oteriquiro otero wahahye. <sup>4</sup>Tiquiro sa otero wahagũ apeye pjeri maha dũhtũ cahapũ bora quehe sahye. Topũ bora quehe saye pjerire minicĵua ahta, ihya cãhye. <sup>5</sup>Sa ye apeye pjeri utã paca watoa bora quehe sahye. Utã paca watoa dihta marieda cĵũnopũ duita pihnimahye. <sup>6</sup>Sa pihnieperota asũ tutuaro asigũ, nũhcori marieda, ñaia wahahye. <sup>7</sup>Apeye pjeri taa watoa bora quehe sahye. Taa pehe dia yũhdũa waha, oteye pehere wejẽahye. <sup>8</sup>Apeye pjeri quehnoari yehpapũ bora quehe sahye. Quehnoano pihni, dũca tiahye. Apeye cĵu cien pjeri, apeye cĵu sesenta pjeri, apeye cĵu treinta pjeri dũca tiahye. <sup>9</sup>Ahrire quehnoano tũhoya mũsa, nidi Jesu.

### Jesu queoye mehna tiquiro buherire yahuahye

(Mr 4.10-12; Lc 8.9-10)

<sup>10</sup>Tiquiro sa nidi bato usã tiquiro buhena tiquiro cahapũ esa, sinituu usã tiquirore:

—¿Dũhse yegũ masare queoye mehna buheajari mũhũ? ni, sinituu usã.

<sup>11</sup>Jesu yũhtiri:

—Ûhmuse cjũno tiquiro pũhoro ijyere panopũ cjẽna tiquina masiedarire mũsare yũhũ buhenare masigũ yere Cohãcjũ. Apequina pehere sa yerare tiquiro. <sup>12</sup>Sa yero masiñequinare masi nemogũ yerota tiquiro. Sa yeye tiquina pehe quehnoano masieta. Masiẽnequina pehe mehenogã tiquina masiepegũta tiquina pehere masiedagũ yerota tiquiro. <sup>13</sup>Sa yegũ queoye mehna buheaja. Ohõ saha ijire. Yojobũ cjẽna ihñaepeta, ihñedariquina yero saha tojoare. Sa yeye tũhoepeta masiedare. Tire tũhoeyequina yero saha ijire tiquina. <sup>14</sup>Sa ijyeyequina ijyeye Isaia panopũ cjũno tiquiro ni ojoariro sahata yere tiquina. Ohõ saha ni ojoahye:

Ohõ saha nine Cohãcjũ: “Cohãcjũ yere tũhonata mũsa. Sa tũhoepenata, ne masisi mũsa. <sup>15</sup>Ahriquina masa dapu paca bũtiyequina tojoare. Sa ye tiquina cahmo coperire bihare, ‘tũhoari’, niñe. Tiquina caperire ihmitihãre, ‘ihñari’, niñe. Sa yeraye quehnoano ihñañe, masiboaga tiquina. Sa ye tũhoye, masiboaga tiquina. Tiquina wacũñepũ quehnoano masiboaga. Sa masiñe yũhũre Cohãcjũre cahmeboaga tiquina. Sa yũhũre cahmegũ tiquina ñañene cohã, tiquinare pecapũ wahaboriquinare yũhdugũ yeboaga yũhũ”, nine Cohãcjũ, ni ojoahye Isaia.

<sup>16</sup>Mũsa pehe mũsa caperi mehna ihñana, masine. Mũsa cahmo mehna tũhona, masine. Sa yena bucuena ijire mũsa. <sup>17</sup>Mũsare niita niaja. Yojobũ mũsa ihñañene mũsa tũhoyere panopũ cjẽna Cohãcjũ yequina tutuaro ihña duamahye. Cohãcjũ yere yahu mũhtariquina gũhũ tire tutuaro ihña duamahye. Sa ihña duepeta ne ihñedahye. Yojobũ mũsa tũhoye gũhũre tutuaro tũho duamahye tiquina. Sa masi duepeta tire masiedahye, ni yahuri Jesu usãre tiquiro buhenare.

### Jesu oteriquiro queoyere yahu pehoahye

(Mr 4.13-20; Lc 8.11-15)

<sup>18</sup>Came Jesu usãre yahu nemori:

—Tũhoya mũsa. Oteriquiro queoyere mũsare yahutja. Yũhũre tũhona, quehnoano masiña. <sup>19</sup>Oteye pjeri quehnoañe buheye yero saha ijire. Sa yeye maha dũhtũ cahapũ borari pjeri quehnoañe buheye yero saha ijire. Sa yeye masa quehnoañe buheyere tũhoepeta ne masiedare. Sa yero masa quehnoañe buheyere tiquina tũhogũ ihñano watĩno pehe ahta, ti buheyere quehnoañe buheyere masi dutierare masare. Minicjua ti pjerire tiquina dote nediro saha yere watĩno. <sup>20</sup>Sa ye utã paca watoa borari pjeri quehnoañe buheye yero saha ijire. Sa yeye masa quehnoañe buheyere tũho, bucueye mehna duita tire tũho nene. <sup>21</sup>Sa tũho nepeta utã paca watoa ijyeye cjũ nũhcori marieñe cjũ yero saha ahriquina masa gũhũ tutuerare. Sa tutueraye ñano yũhdũye, yeequina tiquina ijiri buhiri apequina tiquinare ñano yegũ ihñañe yee pehere duhu cãhre. Apequina tiquinare ñano yegũ tire ihcãno sahaeraye, yeere duhu cãhre. <sup>22</sup>Sa ye taa watoa borari pjeri quehnoañe buheye yero saha ijire. Sa yeye masa quehnoañe buheyere tũhoepeta, ahri yehpa cjẽne pajiro bũjua witi tũhotuye, niñeru pehere cahĩne. Tiquina sa

yegũ ti pehe quehnoañe buheyere cahmotare. Sa cahmotagũ masa quehnoañe pehere yerare. <sup>23</sup>Sa ye quehnoari yehpapu borari pjeri quehnoañe buheye yero saha ijire. Sa ye masa quehnoañe buheyere tuhoye, tire quehnoano masine. Sa masiñequina ijiye, Cohãcũ cahmeno sahata quehnoañene yere tiquina. Ihuquẽquina pajiro quehnoañene yere cien pjeri dũca tiro saha. Apequina doca cãunogã quehnoañene yere sesenta pjeri dũca tiro saha. Apequina mehenogã quehnoañene yere treinta pjeri dũca tiro saha, ni yahuri Jesu usãre.

### Trigo watoa taa diari queoyere yahuahye

<sup>24</sup>Sa ye pari turi queoye mehna buheri Jesu:

—Uhmuse cãuno tiquiro puhtoro ijiye ohõ saha ijire. Wese upuro tiquiro wesepu quehnoañe pjerire tiquiro oteriro saha ijire uhmuse cãuno tiquiro puhtoro ijiye. <sup>25</sup>Wese upuro ijpitihiyequina tiquiro mehna cãena gũhu tiquina carino watoa tiquirore ihãa tuhtiriquiro ahtahye. Sa ahtaro trigore ti oteriropu taare oteahye. Ote tuhasa wahaa wahahye. <sup>26</sup>Came trigo pihniahye. Sa ye ti dũca tiro taro yegũ waro diaa wahahye. <sup>27</sup>Sa ye wese upurore dahra cohteyequina tiquiro cahapu esa, yahuahye: “¿Puhto, quehnoañe pjeri dihitarẽ mũhu wesere mũhu otepegũta, dũhse ye taa gũhu diajari ti wesere?” nidi tiquina. <sup>28</sup>“Yũhũre ihãa tuhtiriquiro ijiaga ti taare oteriquiro”, niahye wese upuro. “¿Taare usã curegũ cahmeajari mũhu?” nimahye tiquirore dahra cohteyequina. <sup>29</sup>“Taare cureracãhã, ‘Trigo pehere cureari, nina. <sup>30</sup>Trigo taa mehnata bucuarĩahdo. Dũca nedi pje ijiãũ neñequinare ohõ saha niitja: ‘Taare cure mũhtaãa. Tuhasa mũsa curerire uãũããa. Came trigore peheya. Pehe peho, tire yũhu ihbori wũhũpu cũãa’, niitja tiquinare”, niahye wese upuro, nidi Jesu, queoye mehna yahuro.

### Mostaza pje queoyere yahuahye Jesu

(Mr 4.30-32; Lc 13.18-19)

<sup>31</sup>Sa ye apeye queoye mehna usãre ohõ saha ni buheri tja:

—Uhmuse cãuno tiquiro puhtoro ijiye mostaza pjeãã yero saha ijire. Ti pjeãã meheni pjeãã waro ijire. <sup>32</sup>Ti pjeããre wesepu tiquiro oteri bato, quehnoano pihnine. Sa yero paji yũhũdadũ wahare. Sa wahagũ minicããa pari ti dũpũripũ suhti suhare, ni yahuri Jesu. (Sa nino ohõ saha nino niahye. Mostaza pjeãã pajidũ tu bucuariro saha uhmuse cãunore mari puhtoro masiñequina meheñequinagã tiquina iji mũhtaepẽgũta camepu peyequina wahaeta.)

### Pãre pugũ yeye queoyere yahuahye Jesu

(Lc 13.20-21)

<sup>33</sup>Sa ye apeye queoye mehna usãre ohõ saha ni buheri tja:

—Uhmuse cãuno tiquiro puhtoro ijiye pãre pugũ yeye yero saha ijire. Tire numino ihcã ajuro trigore aco mehna quehnoano tire dahra morene pã bucuatire. Ticoro sa yegũ pãre pugũ yeye pehe trigore quehnoano sehsaa wahare, nidi Jesu.

(Sa nino ohõ saha nino niahye. Päre pugũ yeye trigore ti sehsaa wahariro saha ùhmuse cjũnore mari puhtorore peyequina masa ijipihitiro cjẽna masieta.)

### **Queoye mehna Jesu tiqiro buherire yahuahye**

*(Mr 4.33-34)*

<sup>34</sup>Ahri ijipihitiyere buhero, queoye mehna yahuri Jesu. Queoye marieno yahuerari tiqiro tiquinare. <sup>35</sup>Sata yeri tiqiro Cohãcjũ yere yahu muhtariqiro ni ojoariro sahata. Ohõ saha ni ojoahye panopũ:

Queoye mehna yahutja. Cohãcjũ ahri yehpare tiqiro bajumehnedi bato ne masare tiqiro yahuerarire yahutja, ni ojoahye Cohãcjũ yere yahu muhtariqiro munano.

### **Trigo watoa taa diari queoyere yahu pehoahye**

<sup>36</sup>Sa ye masare cohe ti, wuhũpũ sajãa wahari Jesu. Sa yena usã tiqiro buhena tiqiro cahapũ esa, sinituu usã:

—Trigo watoa taa diari queoyere yahu pehoya usãre, nii usã tiqiore.

<sup>37</sup>Jesu yãhtiri usãre:

—Wese upũro quehnoañe pjerire oteriqiro yero saha ijiaja yũhũ. Yũhũ masũ Cohãcjũ ohorigũ ijiaja. <sup>38</sup>Wese pehe ahri yehpa yero saha ijire. Quehnoañe pjeri pihniñe ùhmuse cjũno puhtoro ijiropũ ijiatiquina yero saha ijire. Taa pehe watĩno yequina yero saha ijire. <sup>39</sup>Wese upũrore ihña tuhtiriqiro taare oteriqiro watĩno yero saha ijire. Tire nedi pje pihtiri deco yero saha ijire. Sa ye trigore neñequina angele yero saha ijire. <sup>40</sup>Taare tiquina cure ùjũariro saha pihtiri deco ijigũ watĩno yequinare pecapũ cohãeta tiquinare. <sup>41</sup>Yũhũ masũ Cohãcjũ ohorigũ yequina angelere ohogũtja. Yũhũ ohogũ angele pehe ñañene ye dutiyequinare, ñañene yeyequinare yũhũ puhtoro ijiropũ neañeta. <sup>42</sup>Ne sa tuhasa pecapũ cohãeta tiquinare. Topũ tiquina tutuaro uti, bũjũa witiye mehna bahque dihoeta. <sup>43</sup>Sa ye Cohãcjũ yequina tiquina Pacũro tiqiro puhtoro ijiropũ ijietta. Topũ ijiiye, asũ deco cjũno yero saha quehnoano buhrioeta tiquina. Ahrire quehnoano tuhoya mũsa, ni yahuri Jesu.

### **Quehnoa yũhdũyere tiqiro nũorire tiqiro bocari queoyere yahuahye**

<sup>44</sup>Sa ye apeye queoye mehna yahuri tja:

—Ùhmuse cjũno tiqiro puhtoro ijiiye niñeru tiqiro nũori yero saha ijire. Masũno tire wesepũ wacũeno mehna boca, pari turi tire nũo nemoahye. Sa bocaro tutuaro bucueahye tiqiro. Sa yero tiqiro bocarire neno taro, ti wesere dú duahye. Sa yero tiqiro yere dua peho, ti wesere dúahye, ni yahuri Jesu. (Sa nino ohõ saha nino niahye. Ùhmuse cjũno tiqiro puhtoro ijiiye tiqiro bocari yero saha ijire. Tiqiro bocarire tiqiro tutuaro cahmediro sahata ùhmuse cjũnore masa puhtorore tiquina masidi bato masa tutuaro cahmene tiqiore.)

### Wapa bujuri pje queoyere yahuahye

<sup>45</sup>Sa ye apeye queoye mehna yahuri tja:

—Uhmuse cjũno tiquiro puhtoro ijiye wapa bujaye pjerire perla wame tiye pjerire dúriquiroyero saha ijire. <sup>46</sup>Ti pjerire macano quehnoa yuhduari pjere bocahye. Bocaro, ti pjere dú duaro, ijipihitiye tiquiro yere dua pehoru wahahye. Sa dua tuhasa ti pjere wapa bujuri pjere dúahye, nidi Jesu. (Sa nino ohõ saha nino niahye. Ti pjere perla pjere tiquiro cahmediro sahata uhmuse cjũnore masa puhtorore quehnoano tiquina masidi bato masa tutuaro cahmene tiquirore.)

### Wẽñanũ queoyere yahuahye

<sup>47</sup>Sa ye apeye queoye mehna Jesu yahuri tja:

—Uhmuse cjũno tiquiro puhtoro ijiye wẽñanũ tiquina doque ñodu yero saha ijire. Tu wẽñanũ mehna peyequina wahi sijoro saha ijiyequinare ñehene. <sup>48</sup>Tu wahpaa wahagũ wahi wejẽñequina pehe ture padũropũ weje nujua, quehnoañequina wahire besere. Quehnoañequinare tiquina puhusepũ bese sajãre. Ñañequina wahire cohãre. <sup>49</sup>Pihtiri deco ijigũ ohõ saha ijirota. Angele pehe masare beseeta. Ñañequinare ne wioeta quehnoañequina cahapũ ijiyequinare. <sup>50</sup>Ne wio, tiquinare pecapũ cohãeta. Topũ tiquina uti, tutuaro bujua witiye mehna upiri bahque dihoeta ñañequina pehe, ni yahuri Jesu.

### Mũna buheyere, wahma buheye gũhũre yahuahye

<sup>51</sup>Tiquiro sa ni yahuri bato sinituri usãre:

—¿Ahri ijipihitiyere tuhoajari musa? ni sinituri tiquiro.

—Tuhoaja usã, ni yuhtii usã.

<sup>52</sup>Usã sa nigũ tiquiro yahuri usãre:

—Judio masare buheyequina uhmuse cjũno tiquiro puhtoro ijiyere buheye, puaro buheyere yahure. Mũna buheyere, wahma buheye gũhũre yahure. Tiquina wũhu upũro yero saha ijire. Tiquiro wũhupũ ijiyere quehnoañene ne wioro, wahmare, mũna gũhũre ne wioro tiquiro, nidi Jesu usãre.

### Jesu Nazarepũ wahahye

(Mr 6.1-6; Lc 4.16-30)

<sup>53</sup>Ti queoyere tiquiro buheri bato, wahau usã tiquiro mehna. <sup>54</sup>Waha, tiquiro masari macapũ esa. Topũ esa, judio masa mari buheye wũhusepũ buheri tiquiro. Tiquiro sa buhegũ tuhoye, tuho maria wahari tiquina.

—¿Ahriquiroyero nohopũ tuhoyari ahri buheyere? ¿Dũhsero quehnoano masi pehoajari tiquiro? Cohãcjũ tutuaye mehna ye ihũore tiquiro basi. <sup>55</sup>Ahriquiroyero taboa dahrariquiroyero macũno ijire. Sa ye tiquiro pacoro María ijire. Sa ye Santiago, José, Simo, Juda, tiquiro bahana ijire. <sup>56</sup>Yojopũre tiquiro bahana numia ahri macapũ ijire. Sa yero tiquiro mari yero saha ijiriquiroyero ijire. ¿Sa ijiyperota nohopũ tuhoyari tiquiro ahri buheyere? ni yahuducuri tiquina basi.



<sup>57</sup>Sa ye tiquina tiquirore cahmedari. Tiquina sa cahmedagũ ihñano ohõ saha nidi Jesu tiquinare:

—Cohãcjũ yere yahu mũhtariquirore apequina ño peore. Tiquina sa ño peoregũta tiquiro ya maca cjẽna, tiquiro acaye tiquirore ño peerare. Sa yena yũhũre ño peerare mũsa ohõpũ yũhũ masarigũ ijigũ, nidi tiquiro tiquinare.

<sup>58</sup>Sa yero tiquirore tiquina wacũ tutueragũ ihñano, ti macapũ Cohãcjũ tutuaye mehna peye tahari ye ihñonedari Jesu.

**Ñu wame yeriquiro mũnano yariarire yahuahye**

(Mr 6.14-29; Lc 9.7-9)

**14** <sup>1</sup>Ti pjere Herode Galilea cjũno pũhtoro Jesu yerire tũhooahye. <sup>2</sup>Sa tũhoro ohõ saha nimahye:

—Ñu wame yeriquiro ijiga masatjiãno. Sa yero yojopũre tiquiro masari bato ahri tutuayere cũore tiquiro bajumehneñene yero, nimahye Herode tiquiro cahacjẽnare. Jesure “Ñuta ijire”, ni tũhotumahye tiquiro Ñure tiquina wejẽdi bato.

<sup>3-5</sup>Sa yero Ñure tiquiro wejẽ dutiatio pano Herode tiquiro bahũro Felipe namonore namo tiahye. Tiquiro sa yegũ ihñano Ñu wame yeriquiro Herode pehere ohõ saha nie timahye:

—Mũhũ bahũ namonore namo tigũ Cohãcjũ dutiyere yũhdũdũcagũ nine mũhũ, nie timahye Ñu.

Tiquiro sa nidi buhiri Herode tiquirore wejẽ duamahye. “ Ñu Cohãcjũ yere yahu mũhtariquiro ijire’, ni tũhoturi judio masa”, nino, tiquina pehere cueahye Herode. “Ñure yũhũ wejẽgũ tiquina usuaboaga”, nino tiquinare cueahye. Sa cuero Ñure wejẽ dueramahye. Sa wejẽ dueraperota Herode tiquirore ñehe dũhte duti, peresu yeahye. Tiquiro namono Herodia dutiro mehna sa yeahye Herode. <sup>6</sup>Sa ye Herode masa bajuari deco ijigũ bose deco yeahye tiquiro. Topũ Herodia macono bose deco wihyequina tiquina ihñonopũ basa ihñooahye. Ticoro sa basa ihñogũ ihñano Herode bucueahye. Sa bucuero ticorore niahye:

<sup>7</sup>—Cohãcjũ mehna poto niita niaja. Yũhũre mũhũ sinino punta ohogũtja yũhũ mũhũre, niahye Herode pehe Herodia maconore.

<sup>8</sup>Tiquiro sa nigũ tũhoro Herodia ticoro maconore ticoro siniatire yahuahye ticorore. Ticoro sa yahugũ ticoro macono pehe ohõ saha ni siniahye Herodere.

—Ñu wame yeriquiro dapure dũte sure dutiya. Sa yegũ waparo mehna tiquiro dapure ohoya yũhũre, niahye ticoro.

<sup>9</sup>Ticoro sa nigũ tũhoro Herode tutuaro bujũa witiahye. Masa tiquina ihñonopũ “Ohogũtja mũhũre”, niahye tiquiro. Sa yero tiquiro bæ tiro “Mũhũre ohoeraja”, ni masiedahye ticorore. Sa yero ticoro dutiriro sahata Herode pehe tiquiro cahacjẽnare Ñure wejẽ dutiahye. <sup>10</sup>Sa yero Ñu dapure dũte sure dutiahye. <sup>11</sup>Sa dũte sure tuhasa, waparo mehna tiquiro dapure ne cãhtahye tiquina. Herodia maconore tiquiro dapure tiquina ohogũ, ticoro pehe ticoro pacorore yũhdũoahye tja.

<sup>12</sup>Tiquina sa yeri bato Ñu buheyequina ahta, tiquiro pagure masa copepũ nea cũahye. Sa cũ tuhasa, tiquina tire Jesure yahuye wihiri.

**Cinco mil masare ihyaye ohoahye Jesu**

*(Mr 6.30-44; Lc 9.10-17; Jn 6.1-14)*

<sup>13</sup>Tiquina sa ni yahugũ tũhoro, Jesu usã mehna yucũsapũ sajã, masa marienopũ siho wahari. Jesu topũ wahagũ tũhoye, masa tiquina ye macaripũ ijiriquina ahta, mahapũ tiquirore nunũ tã cãa wahari. <sup>14</sup>Sa yero usã wahã sari bato tiquiro peyequina masare ihñano, paja ihñari tiquinare. Sa paja ihñano tiquina mehna cjẽna dohatiyequinare yũhdũgũ yeri. <sup>15</sup>Ñamicahapũ usã tiquiro buhena tiquirore ohõ saha nii:

—Ñamicahapũ waharo nine. Ohõ masa marienopũ ijire. Sa yegũ macaripũ masare tiquina ihyatire dú dutiya tiquina pohe tiatire, nimi usã tiquirore.

<sup>16</sup>Jesu yũhtiri usãre:

—Wahaeracãhdo tiquina. Mũsa basita ihyayere ohoya tiquinare, nidi usãre.

<sup>17</sup>—Ihcã omope paca pã paca, wahi pũaro to punota ijire usãre, ni yũhtii usã.

<sup>18</sup>—Tire yũhũre ne cãhtaya mũsa, nidi usãre.

<sup>19</sup>Tiquiro sa nigũ tũhona neaũ usã. Usã ne sari bato taa bui masare tiquiro duji dutiri. Tiquina dujigũ ihcã omope paca pã pacare, pũaro wahire ne, uhmũsepũ ihña mũo, Cohãcjũre “Quehnoare”, nidi. Sa ninota pã pacare nuhano, usãre tiquiro buhenare ohori. Tiquiro sa ohogũ usã pehe tire masare itii. <sup>20</sup>Sa ye ijipĩhtiequina quehnoano ihya, yapi yũhdũa wahari. Tiquina yapi wehorire doce pũhũse waro ne cahmecoa, wahpo dapou usã tiquiro buhena. <sup>21</sup>Topũ tire ihyariquina umũa dihitare queogũ cinco mil umũa ijiri. Numia, macanagã gũhũ ijiri.

**Jesu aco bui tiniahye**

*(Mr 6.45-52; Jn 6.16-21)*

<sup>22</sup>Came usãre tiquiro buhenare Jesu ditara ape sie pahrẽpũ pehãyu dutiri masare tiquiro cohe tiri watoa. <sup>23</sup>Cohe ti tuhasa, cũnũpũ mũja, Cohãcjũre sinino wahahye. Ñamine topũ tiquiro ihcãquirola ijiahye. <sup>24</sup>Ti pjeta ditara decopũ yucũsa mehna pehãducuna nimi usã. Wihnono tutuaro ahta, pahcõri bũjũye wahcã, yucũsare quẽ sajãri. <sup>25</sup>Sa wahagũ bohrea mũja tato pano Jesu aco bui tini cãhtari usã cahapũ. <sup>26</sup>Usã cahapũ tiquiro ahtagũ ihñana cue nii usã. Sa cuena sañuducumi usã.

—Yariariquiro mũnano pagũ ijire, ni sañuducumi usã.

<sup>27</sup>Usã sa cuegũ ihñano Jesu ohõ saha nidi:

—Ne yũhũre ihña cueracãhña. Yũhũta ijijaja, nidi usãre.

<sup>28</sup>Tiquiro sa nigũ tũhoro Pedro nidi tiquirore:

—Pũhto, potota mũhũta ijigũ, aco bui yũhũre mũhũ cahapũ ducu cã dutiya, nidi tiquiro.

<sup>29</sup>—Ahtaya, ni yũhtiri tiquiro pehe.



(San Mateo 14.29)

Tiquiro sa nigū Pedro yucusare dijia, aco bui Jesu cahapū ducu cāmedi.

<sup>30</sup>Wihnono tutuaro ahtagū ihñano cueri tiquiro. Sa cuero diha dijiaa wahamedi.

—Yūhure yedohoya pūhto, ni sañuducuri tiquiro Jesure.

<sup>31</sup>Tiquiro sa nigūta tiquiro omocare ñehe,

—Mehenogā wacū tutuare mūhū yūhure. ¿Dūhsegu yūhure wacū tutuerajari mūhū? nidi tiquiro Pedore.

<sup>32</sup>Tiquiro sa nidi bato yucusapū sajāri tiquina. Tiquina sa sajāri bato wihnono yūhdua wahari. <sup>33</sup>Sa yena usā tiquiro buhena yucusapū ijina Jesure ño peou.

—Potota mūhū Cohācjū macūta ijire, nii usā tiquirore.

**Genesare cjëna dohatiyequinare yũhdũoahye Jesu**  
(Mr 6.53-56)

<sup>34</sup>Sa yeri bato pehã, Genesare wame tiri yehparũ esau. <sup>35</sup>To cjëna Jesure ihña masidi. Sa masiñe tiquiroy caharũ ijiyequinare dohatiyequinare ne cãhta dutiri. Sa ye tiquina dohatiyequinare tiquiroy caharũ ne cãhtari.

<sup>36</sup>—Mũhu suhtiro dũhtũ caha dihitare usãre ñehe tuhu dutiya, ni sinidi tiquina Jesure.

Sa ye tiquiroy suhtirore ñehe tuhuriquinape topequinata quehnoa wahari.

**Masa ñañequina wahagũ yeyere yahuahye Jesu**  
(Mr 7.1-23)

**15** <sup>1</sup>Sa ye Jerusalẽ cjëna, fariseo masa, marine judio masare buheyequina mehna Jesu caharũ wihiye, sinituri tiquiroy:

<sup>2</sup>—¿Dũhse ijiro boro mari acaye bucũna mũnarũ tiquina dutirire yerajari mũhu buheyequina pehe? Tiquina ihyato pano tiquina dutiriro sahata omo coserare, nidi tiquina Jesure.

<sup>3</sup>Jesu yũhtiri tiquinare:

—¿Dũhse yena mari acaye panorũ cjëna ye dutiye dihitare yena tana Cohãcjũ ye dutiye pehere yerajari mũsa pehe? <sup>4</sup>Ohõ saha nine Cohãcjũ: “Mũsa pacusũmuare ño peoya”, nine. Sa yero “Ihcãquiroy tiquiroy pacusũmuare ñañene quitidãhreriquiroy ijiro ti buhiri apequina tiquina wejẽatiquiroy ijirota”, nine Cohãcjũ. <sup>5</sup>Tiquiroy sa niepegãta ohõ saha ye dutire mũsa pehe tiquina pacusũmuare yedoho dutierana: Tiquina pacusũmuare ohoborire Cohãcjũ pehere oho dutire mũsa. Sa ni buhemene mũsa. <sup>6</sup>Sa buhena tiquina pacusũmuare ño peogũ yerare mũsa. Mũsa sa yena Cohãcjũ dutiyere yũhdũducana nine mũsa, mari acaye panorũ cjëna ye dutiye dihitare yena. <sup>7</sup>Masa tiquina ihñono dihita quehnoano iji mehona ijire mũsa. Cohãcjũ yere yahu mũhtariquiroy Isaia mũsare potota yahu ojoahye panorũre:

<sup>8</sup>Ahriquina masa yũhũre quehnoano yahuducuepeta yũhũre ne ño peerare.

<sup>9</sup>Sa ye yũhũre tiquina ñu buheye ne dũhseati ijierare. “Cohãcjũ ye dutiye ijire ahri”, ni meho buhere tiquina ye buheye pehere, ni ojoahye Isaia, nidi Jesu fariseo masare, mari judio masare buheyequina gũhũre.

<sup>10</sup>Sa ni tuhasa tiquiroy caharũ masare pijio, ohõ saha nidi:

<sup>11</sup>—Tũhoya mũsa. Yũhu niñene quehnoano masiña mũsa. Mũsa dũserire sajàne pehe mũsa ihyaye pehe mũsare ñana ijigũ yerare. Mũsa ñañe yahuducuye pehe mũsa dũseri wijiaye pehe mũsare ñana ijigũ yere, nidi Jesu.

<sup>12</sup>Tiquiroy sa ni buheri bato usã tiquiroy buhena pehe tiquiroyre yahuu.

—Mũhu sa nigũ tũhoye fariseo masa usuari, ni yahuu usã tiquiroyre.

<sup>13</sup>Tire tũho, ohõ saha ni yũhtiri usãre:

—Tiquina fariseo masa taa yero saha ijire. Yũhu Pacũ uhmũse cjũno ijipihtiye oteyere tiquiroy oterarire mũhcori mehnata cure, cohãnota.

Sata yerota tiquinare. <sup>14</sup>Tiquinare sa ihña cãhña mûsa. Tiquina caperi bajueyequina tiquina ihña masiedaro saha ne Cohãcjũ yere masiedare. Sa ye pecapũ wahaeta. Sa masiedapeta apequina masieñequinare buhe duamedi. Sa ye caperi bajueyequina copepũ tiquina boraboriro saha tiquina buhenohriquina gũhũ pecapũ wahaeta, nidi Jesu.

<sup>15</sup>Tiquiro sa nigũ tũhoro Pedro nidi:

—Ahri quitire masa tiquina dũseri wijiaye quitire yahu nemoña usãre tja, nidi tiquiro Jesure.

<sup>16</sup>Jesu yũhtiri:

—¿Ne, yojopũ tũhoerajari mûsa? <sup>17</sup>Masa ihyayere ihyagũ tiquina dũseripũ sajãre. Sa ye tiquina paapũ sajã, yũhdũa wahare. Ihyo waro ijire. Mari ihyaye marine ñana wahagũ yerare. ¿Ahrire masiedajari mûsa? <sup>18</sup>Masa dũseripũ wijiaye, tiquina yahuducuye pehe tiquina tũhotuyepũ ahtare. Tiquina yahuducuye pehe ñañe ijiro, masare ñañequina ijigũ yere. <sup>19</sup>Ñañe tũhotuye, masare wejẽne, apequiromo mehna ñano yeye, ñano yeye numia mehna ñano yeye, yaqueye, ni mehoñe, masare ñañe quitu dahreye masa tũhotuyepũ ahtare. <sup>20</sup>Ti ñañe pehe masare ñañequina ijigũ yere. Sa yepegũta bucũna yee tirirosahata masa omo coserapeta tiquina ihyagũ ti masare ñañequina ijigũ yerare, nidi Jesu.

### Judio masono ijiericoro Jesure wacũ tutuahye

(Mr 7.24-30)

<sup>21</sup>Sa ni buhe tuhasa, usãre siho wahari tja. Tiro wame tiri maca cahapũ Sidõ wame tiri maca cahapũ esau usã. <sup>22</sup>Usã topũ esagũ Canaa yehpa cõño topũ ijiericoro Jesu cahapũ esa, sañuducuri:

—Pũhto, Davi panami iji turiagu masare yũhdũoacjũ, yũhũre paja ihñaña mũhũ. Yũhũ maco watĩnore cũoro, ña yũhdũaro yũhdũari ticoro, ni sañuducuri ticoro.

<sup>23</sup>Ticoro sa niepegũta Jesu yũhtierari. Sa yegũ ihñana usã tiquiro buhena pehe tiquirore ohõ saha nimi.

—Waha dutiya ticorore. Ñano cariboro bisiaga, nimi usã.

<sup>24</sup>Usã sa nigũ tũhoro yũhtiri ticorore:

—Israe masare Cohãcjũre masieñequina dihitare yedoho dutiro ohori yũhũ Pacũ yũhũre, nidi tiquiro.

<sup>25</sup>Tiquiro sa niepegũta Jesu dahpocãri cahapũ dũsepe curi mehna quehe sari ticoro.

—Pũhto, yedohoya yũhũre, nidi ticoro.

<sup>26</sup>Jesu yũhtiri ticorore.

—Ohõ saha ijire ahri: Coã warore wũhũ upũro pohne ye ihyayere diayearo oho mũhtagũ quehnoaedare. Israe masa yere ape yehpa cjenare yũhũ oho mũhtagũ quehnoaedare, nidi Jesu ticorore queoye mehna yahuro.

<sup>27</sup>—Sata ijire puhto. Sa ijiepegūta diayea gūhu wūhu upuro mesa docapu tiquina ihya site boroyere ihya cohtere tiquina gūhu. Ape yehpa cjo yūhu ijiepegūta yūhu gūhure yedoho masine mūhu, ni yūhtiri ticoro.

<sup>28</sup>Ticoro sa nigū tiquiuro yūhtiri:

—Numio, mūhu yūhure tutuaro wacū tutuare. Mūhu cahmeno sahata sa waharota, nidi Jesu ticorore.

Tiquiro sa nigūta duita quehnoa wahari ticoro macono.

### **Peyequina dohatiyequinare yūhdugū yeahye Jesu**

<sup>29</sup>Sa ni tuhasa usāre siho waha, Galilea wame tiri ditara dūhtu cahapu siho esari tja. Esa, mehenugā cūnare muja, tu buipū dujiri. <sup>30</sup>Topū tiquiuro ijigū peyequina masa tini masieñequinare, caperi bajueyequinare, pari yuri wahayequinare, yahuducu masieñequinare, peyequina apequina dohatiyequinare tiquiuro cahapu ne wihiri masa. Ne wihi tuhasa Jesu dahpocāri cahapu duhu cūri tiquina. Tiquina sa duhu cūri bato quehnoa wahagū yeri Jesu tiquinare. <sup>31</sup>Tiquiro sa yegū ihñañe masa ihña maria wahari. Yahuducu masieñequina tiquina yahuducugū ihñañe, pari yuri wahayequinare tiquina quehnoa wahagū ihñañe, tini masieñequina tiquina tinigū ihñañe, caperi bajueyequinare tiquina ihñagū ihñañe, ihña maria wahari tiquina. Sa ye ohō saha nidi:

—Israe masa usā puhto, Cohācjū tutuagu, quehnoagu ijire, ni ño peori tiquina Cohācjūre.

### **Cuatro mil masare ihyayere ohoahye Jesu**

*(Mr 8.1-10)*

<sup>32</sup>Tiquiro sa yeri bato Jesu usāre tiquiuro buhenare ohō saha nidi:

—Ahriquina masa yūhu mehna ihtia deco waro iji tuhasare. Sa ye pohe mariedare tiquinare. Pohe mariedagū ihñagu tiquinare paja ihñaja. “Tiquina ujua ahbayequina, mahapu borari”, nigū tiquinare ihyaye marieno tiquina ye wūhusepu waha duti dueraja. Sa yegu tiquinare pohe oho duaja, nidi tiquiuro.

<sup>33</sup>Tiquiro sa nigū usā tiquiuro buhena tiquiore sinituu:

—¿Duhse mari ohōre masa marienopure pāre boca ohoboagari mari? nii usā tiquiore.

<sup>34</sup>—¿Nohope paca pā pacare cūojari mūsa? nidi.

—Siete pā pacare, meheñequinagā wahire cūoja, ni yūhtii usā.

<sup>35</sup>Usā sa nigū tiquiuro masare yehpapu duji dutiri. <sup>36</sup>Tuhasa siete pā pacare, wahigā gūhure ne, Cohācjūre “Quehnoare”, nidi. Sa ninota pā pacare nuha, usāre tiquiuro buhenare ohori. Sa yena usā pehe ti ihyayere masare itii. <sup>37</sup>Sa ye masa tire ihya, yapi yūhdūa wahari. Tiquina yapi wehorire siete puhuse waro ne cahmecoa, wahpo dapou usā. <sup>38</sup>Topū ihyariquinare umua dihitare queogū cuatro mil waro umua ijiri. Numia, macanagā gūhu ijiri. <sup>39</sup>Tiquina sa ihya tuhasagū Jesu masare waha duti, yucūsapu sajā, Magadán wame tiri yehpapu usāre siho esari.

**Fariseo masa, saduceo masa gũhũ Cohãcjũ tutuaye mehna ye  
ihñogũ ihña duamahye**  
(Mr 8.11-13; Lc 12.54-56)

**16** <sup>1</sup>Sa ye fariseo masa, saduceo masa mehna Jesu cahapũ wihiri. Tiquiro ñano yegũ ihña duamedi tiquirore yahusã duaye. Sa ye tiquina tiquirore Cohãcjũ tutuaye mehna ye ihño dutimedi tiquiro masiedagũ ihña duaye, “Cohãcjũ ohoriquiro ijierare”, ni duaye. <sup>2</sup>Tiquina sa ye dutigũ Jesu yuhtiri tiquinare:

—Ñamicahapũ uhmũano sohãgũ ihñana “Quehnoari ñami ijirota”, nine mũa. <sup>3</sup>Sa yena bohrearo uhmũano sohãgũ, ñicuri deco ijigũ ihñana “Acoro ahtarota”, nine mũa. Sa quehnoano masiepenata Cohãcjũ tutuaye mehna mũsare yũhũ ye ihñogũ ihñaepenata ne tire quehnoano masiedare mũa. <sup>4</sup>Yojopũ cjẽna ña yũhdũyequina Cohãcjũre ño peo dueyequina Cohãcjũ tutuaye mehna ye ihñogũ ihña duamene. Ye ihñosi yũhũ. Cohãcjũ yere yahu mũhtariquiro Jona tiquiro dũhse waharire masi tuhasare mũa. Ti dihitare ihñoutja mũsare, ni yuhtiri Jesu.

Sa ni yahu tuhasa siho wahaa wahari tja.

**Fariseo masa saduceo masa tiquina ñañe buheyere yahuahye Jesu**  
(Mr 8.14-21)

<sup>5</sup>Ditarare usã pehãna, pãre bo cũ cã, pehã tari jii usã. <sup>6</sup>Sa yero Jesu usãre yahuri:

—Quehnoano yeya. Fariseo masa, saduceo masa tiquina ye pã pugũ yeyere ihñana quehnoano yeya. Cuarĩne ti, ni yahuri.

<sup>7</sup>Tiquiro sa nigũ tuhona tuho masiedana, usã basi tire yahuducuu:

—Mari pãre mari ne cãhtaeragũ ihñano sa niaga ahriquiro, nimi usã basi.

<sup>8</sup>Usã sa nidire masino, usãre sinituri:

—¿Dũhsena mũa pã borire wacũajari mũa? Mehenogã waro yũhũre wacũ tutuare mũa. <sup>9</sup>¿Yojopũ masiedajari mũa? ¿Cinco mil umũare ihcã omope pã pacare yũhũ nuha ohorire, numia gũhũre yũhũ ohorire wacũedagari mũa? ¿Nohope pũhũse waro mũa ne cahmecoa wahpo daporire wacũedagari mũa? <sup>10</sup>¿Sa yegũ siete pã pacare nuha, cuatro mil umũare yũhũ ohorire, numia gũhũre yũhũ ohorire wacũedagari mũa? ¿Nohope pũhũse waro mũa ne cahmecoa wahpo daporire wacũedagari mũa? <sup>11</sup>¿Sa yena pã pugũ yeyere yũhũ yahugũ dũhse yena quehnoano tuhøerajari mũa? Sa nigũ pã warore nigũ niedaja. Fariseo masa, saduceo masa tiquina pã pugũ yeyere ihñana quehnoano yeya. Cuarĩne ti, ni yahuri usãre tiquiro.

<sup>12</sup>Tiquiro sa ni yahugũpũ usã masii. “Pã pugũ yeye”, nino pã warore nino niedari. Sa nino fariseo masa, saduceo masa tiquina buheyere nino nidi. “Tiquina ye buheyere tuhøeracãhña”, nino nidi.

**Jesu poto Cristo tiqiro ijiyere Cohăcĵă ohoriquiro  
tiqiro ijiyere yahuahye Pedro**  
(*Mr 8.27-30; Lc 9.18-21*)

<sup>13</sup>Sa ye Jesu mehna wahana, Cesarea Filipo wame tiri maca cahapŭ ijiye macaripŭ esau ũsă. Sa yero macapŭ saĵă sari bato Jesu ũsăre tiqiro buhenare sinituri:

—ĴNoa boro ijiagari yŭhŭ, masa yŭhŭre tiquina tŭhotugŭ? ni sinituri tiqiro.

<sup>14</sup>—“Ńŭ wame yeriquiro ijire”, nine mŭhŭre. Apequina “Elia ijire”, nine. Apequina “Jeremia ijiboaga o apequiro Cohăcĵŭ yere yahu mŭhtariquina mehna cĵŭno mŭnano ijiboaga”, nine, ni yŭhtii ũsă tiquirore.

<sup>15</sup>—ĴMasa pehe masa tŭhotugŭ noa boro ijiagari yŭhŭ? ni, sinituri tiqiro.

<sup>16</sup>Simo Pedro yŭhtiri:

—Mŭhŭ Cristo Cohăcĵŭ ohorigŭ ijire. Cohăcĵŭ catiriquiro waro macŭ ijire mŭhŭ, ni yŭhtiri Simo Pedro.

<sup>17</sup>—Simo Ńŭ macŭ mŭhŭ bucuegŭ ijire. Ohŭ saha ni mŭhŭ yŭhŭre yŭhtiye masa tiquina yahuri ijierare. Yŭhŭ Pacŭ ŭhmŭse cĵŭno pehe tire mŭhŭre masigŭ yeri. <sup>18</sup>Mŭhŭre niita niaja. Mŭhŭ Pedro wame tigŭ ijire. (Pedro nino ũtă nino nine.) Ahri ũtă paa bui tutuari wŭhŭre yŭhŭ yeboriro saha yeequina pehere wacŭ tutuayequina ijigŭ yeitja yŭhŭ. Sa ye yeequina ne pecapŭ wahasi. <sup>19</sup>Ŭhmŭse cĵŭno mari pŭhtoro ijiro cĵă sawire mŭhŭre ohoutja. Sa yegŭ ahri yehpare mŭhŭ ye dutieragŭ ŭhmŭsepŭ gŭhŭre ye dutisi. Ahri yehpare mŭhŭ ye dutigŭ ŭhmŭsepŭ gŭhŭre ye dutiye ijietă, nidi Jesu.

<sup>20</sup>Tiqiro sa nidi bato ũsăre tiqiro buhenare ohŭ saha nidi:

—Yŭhŭre “Cristo ijire tiqiro”, ni yahu sitenedacăhŭa apequinare, ni, dutiri ũsăre.

**Jesu tiqiro yaria masa wijiatiye yahuahye**  
(*Mr 8.31-9.1; Lc 9.22-27*)

<sup>21</sup>Ti pjeta Jesu ũsăre tiqiro buhenare quehnoano yahu peho đucari:

—Jerusalŭpŭ yŭhŭre waharo cahmene yojopŭre. Topŭ judio masa mari bucŭna, mari pahia pŭhtoă, marine judio masare buheyequina gŭhŭ yŭhŭre ņano yeeta. Yŭhŭre wejĕeta. Sata ņano yŭhdŭro cahmene yŭhŭre. Sa yegŭ ihtia deco wahaboro masa wijiagŭtă, ni yahuri ũsăre tiqiro.

<sup>22</sup>Tiqiro sa nigŭ tŭhoro Pedro pehe ape sie cĵŭnogă Jesure ne sadŭca, tiquirore ohŭ saha nidi:

—Pŭhto, mŭhŭ nino saha sa wahaeracăhdo. Mŭhŭre tiquina wejĕdacăhdo, nimesi tiqiro Jesure.

<sup>23</sup>Tiqiro sa nigŭ tŭhoro Jesu majaredŭca, tiquirore ohŭ saha nidi:

—Satana yero saha yahuducugŭ nine mŭhŭ. Sa niedacăhŭa. Mŭhŭ tŭhotuye masa ye ijire. Cohăcĵŭ ye ijierare. Sa yegŭ yŭhŭ yeatiye cahmota duare mŭhŭ, nidi Jesu Pedroro.



<sup>24</sup>Tiquiro sa nidi bato usãre yahuri:

—Ihcãquiro yaquiro iji duaro, tiquiro cahmeno ye duamedire duhu cãnota. Sa yero yaquiro tiquiro ijiri buhiri ñano yũhdæperota yũhære duhusi. Sa yero yeere yeducuriquiro ijirota. <sup>25</sup>Masũno yũhære wacũno marieno tiquiro esa tuharo tiquiro cahmeno sahata yero, pecapũ waharota. Sa yero yeere masũno sa yeducuriquiro ijipihtiye decori yũhũ mehna uhmũsepu ijirota tiquiro. <sup>26</sup>¿Ihcãquiro masũno ahri yehpa cãene ijipihtiyere cãoriquiro Cohãcjũre cahmedaro pecapũ waharo, yabere wapatajari tiquiro? Sa ijiriquiro ne wapataerare. Pecapũ tiquiro jeripohna wahagũ ne dũhse wapa ye wioro basioerare. <sup>27</sup>Yũhũ masũ Cohãcjũ ohorigũ yeequina angele mehna ahri yehpapũ tojoa tagũ yũhũ Pacũ asi siteye mehna tojoa tagũ ijipihtiyequina masare tiquina ñaãe yeri buhiri buhiri dahreitja. Tiquina quehnoaãe pehere yegũ quehnoano yeitja tiquinare. <sup>28</sup>Ijirota musare yahutja. Ihquẽquina musa ohõrpũre ijina musa yariato pano yũhære yũhũ pũhto sajãgũ ihãanata, ni yahuri Jesu.

### Jesu tiquiro pagure comesahye

(Mr 9.2-13; Lc 9.28-36)

- 17** <sup>1</sup>Sa ye seis decori bato Jesu Pedrose, Santiagore tiquiro bahuro Ñũ gũhære uhmũanũ cũnũpũ tiquina dihitarẽ piji mũjari. <sup>2</sup>Uhmũanopũ tiquina esari bato tiquina ihãonopũ tiquiro pagure comesahye. Tiquiro wũhdoa asũ deco cãũno yero saha asi siteahye. Sa yero tiquiro suhtiro buhrioro yero saha yehsero wahahye. <sup>3</sup>Sa ye Jesu Moise mũnano, Elia mũnano mehna tiquina yahuducugũ ihãahye tiquina ihtiaro buheyequina. <sup>4</sup>Sa yero Pedro Jesure nimahye: —Pũhto, mari ohõpũ ijigũ quehnoa duare. Mũhũ cahmegũ ihtia wũhũgã yeitja. Mũhũ ya wũhũgã, Moise ya wũhũgã, Elia ya wũhũgã yeitja, nimahye tiquiro. <sup>5</sup>Tiquiro sa ni yahuducuri watoa ehmeo quehnoano asiye ehmeo tiquinare cahmotahye. Sa wahagũ ehmeo watoapũ yahuducuye bisiro ca tahye. —Ahriquiro yũhũ macũ yũhũ cahĩniquiro ijire. Tiquiro mehna bucueaja. Tiquirore tũhoya, ni yahuducuro ca tahye. <sup>6</sup>Sa nigũ tũhoye tiquiro buheyequina tũho maria waha, yehpapũ doque quehe sahye. <sup>7</sup>Tiquina sa wahari bato Jesu tiquina cahapũ esa, tiquinare buacarero, ohõ saha niahye: —Wahcãducaya musa. Yojobũre musa ihãarire, musa tũhori gũhære cueracãhã, niahye tiquiro tiquinare. <sup>8</sup>Tiquiro sa nigũ tiquina ihãa wahcõ, Jesu dihitarẽ ihãahye. Tiquina ihãariquina pehe mariedahye. <sup>9</sup>Sa ye cũnũpũ tiquina dijia tagũ Jesu tiquinare tutuaro mehna niahye: —Mianogãta yũhũ sa waharire apequinare yahueracãhã. Yũhũ masũ Cohãcjũ ohorigũ yũhũ yaria masa wijiari batopũ tire apequinare yahuya musa, niahye Jesu. <sup>10</sup>Tiquiro sa nidi bato Pedro gũhũ tiquirore sinituahye:

—“Cristo masare yuhd̄uoatiquiro tiquiro ahtato pano Eliare ahta m̄htano cahmene”, nine marine judio masa buheyequina. ¿D̄ahse ijiro boro sa niajari tiquina? ni sinituahye tiquina tiquirore.

<sup>11</sup>Jesu yuhtiahye:

—Potota ijire. Eliare ahta m̄hta dutiri Coh̄ãcj̄ũ, ijipihtiyere quehno m̄htatiquirore. <sup>12</sup>Oh̄o saha nigũ musare nigũ niaja. Elia wihi tuhasari. Tiquiro sa wihiepegũta tiquina tiquirore ne ih̄ña masiedari. Sa ye tiquina d̄ahse ye duaro yeri jiri tiquirore. Sata yeeta yuhũ gũh̄ure. Yuhũ masũ Coh̄ãcj̄ũ ohorigũ ijiaja. Tiquina sa yegũ ñano yuhd̄ugutja yuhũ, niahye Jesu.

<sup>13</sup>Tiquiro sa ni yahugũ tiquina quehnoano tũhoahye. “Elia”, nino, Ñu wame yeriquirore nino niahye. Tire masiahye tiquina.

### Jesu watĩnore c̄uoriquirore yuhd̄uoahye

(Mr 9.14-29; Lc 9.37-43)

<sup>14</sup>Sa ye peyequina masa caharũ tiquina dijia tagũ ih̄ñano ihcãquiro um̄no Jesu caharũ esa, d̄usepe curi mehna quehe sari.

<sup>15</sup>—Puhto, yuhũ macure paja ih̄ñaña. Tiquiro ñama yariayere dohatiriquiro ijire. Sa yero ña yuhduaro yuhd̄ure. Peye tahari pecarũ bora sa quehea m̄jare tiquiro. Ihquẽ tahari diarũ bora ñojoa m̄jare. <sup>16</sup>Sa yegũ m̄hũ buheyequina caharũ tiquirore ne sami. Tiquina tiquirore yuhd̄uo masiedari, nidi tiquiro Jesure.

<sup>17</sup>Jesu yuhtiri:

—Yojorũ c̄jana, ñana ijire m̄sa. Yuh̄ure ne wacũ tutuerare. Yoa yuhduari pje musare buhemi yuhũ. ¿Noho puno yoari pje yuh̄ure m̄sa cariboajari? Tiquirore ne cãhtaya yuh̄ure, nidi Jesu.

<sup>18</sup>Sa yero watĩnore tiquiro tuhtigũta watĩno pehe masũno mehna ijiriquiro wahaa wahari. Sa wahari batogãta quehnoa wahari tiquiro.

<sup>19</sup>Came usã tiquiro buhena usã sehsaro ijina Jesure sinituu:

—¿D̄ahsena usã pehe ahriquiro pehere watĩnore cohã masiedari, m̄hũ tũhotugũ? ni sinituu usã.

<sup>20</sup>Jesu yuhtiri:

—Yuh̄ure mehenogã wacũ tutuare m̄sa. Poto musare yahugũta niaja. Mostaza capegã meheni pjegã ijire. Ti yero saha Coh̄ãcj̄ũre mehenogã m̄sa wacũ tutuana oh̄o saha wahagũ ye masinata m̄sa. Ahdũ cun̄ure “Soh̄orũ wahaya”, m̄sa nigũ, waharota. Coh̄ãcj̄ũre sata wacũ tutuana, ijipihtiyere ye masine m̄sa. [<sup>21</sup>Sa ijiepegũta ahriquiro boro watĩnore m̄sa cohã duana Coh̄ãcj̄ũre tutuaro sinino cahmene musare. Sa ye duana sijiro cahmene musare Coh̄ãcj̄ũre sinina tana,] nidi Jesu usãre.

**Pari turi Jesu tiquiro yaria masa wijiatiye yahuahye**

*(Mr 9.30-32; Lc 9.43-45)*

22 Sa ye Galilea yehpapu usã tinigũ, Jesu usãre yahuri:

—Yuhu masu Cohãcjũ ohorigu ijijaja. Masa yuhure ñehe, apequinapure yuhure ohoeta. 23 Sa tiquina ohori bato yuhure wejêeta. Sa tiquina wejêgũ ihtia deco wahaboro masa wijiaguta, ni yahuri tiquiro usãre.

Tiquiro sa ni yahugũ tutuaro bujua witiĩ usã.

**Cohãcjũ wuhu cjê wapare sinituahye apequina**

24 Sa yena Capernaupu sajã sagũ, Cohãcjũ wuhu cjê ijiatire wapa ne cohteyequina Pedro cahapu esa, tiquirore sinituahye.

—¿Musare buheriquiro Cohãcjũ wuhu cjê wapa ijiatire wapa yeajari tiquiro? ni sinituahye tiquina.

25—Wapa yere tiquiro, ni yuhtiahye Pedro.

Tiquiro sa nidi bato wuhupu tiquiro sajãgũ Jesu sinitu muhtahye Pedrorre:

—¿Simo duhse ni tuhutuajari muhu? ¿Ahri yehpa cjêna puhto a yabequina pehere wapa neajari, muhu tuhutugũ? ¿Tiquina mehna cjênare wapa neajari? ¿O ape yehpa cjêna pehere wapa neajari, muhu tuhutugũ? ni sinituahye tiquiro Pedrorre.

26—Ape yehpa cjêna pehere wapa nene, ni yuhtiahye Pedro.

Tiquiro sa nigũ Jesu yahuahye:

—Sa yero puhtoro tiquiro ya yehpa cjênare wapa nedari. 27 Sa ijiepegũta wapa ne cohteyequinare usuagũ ye dueraja mari. Sa yena wapa yenata. Ditarapu wahaya. Topu esa, yohyeri dare doque ñoña. Sa yegu wahi muhure ihyariquirore weje ñoña. Tiquiro duseropu niñeru cjoere bocaguta muhu. Ti cjoe queoro wapa tiri cjoe ijirota. Yuhure, muhu gũhure Cohãcjũ wuhu cjêna tiquina wapa negũ quehnoano queoro esa tuharota ti cjoe. Ti cjoere bocagu mari wapamonore wapa yegu wahaya, niahye Jesu Pedrorre.

**Jesu buhayequina tiquina mehna cjênore puhto sã duamahye**

*(Mr 9.33-37; Lc 9.46-48)*

**18** 1 Ti pjere usã tiquiro buhena Jesu cahapu esa, sinituu tiquirore:

—¿Uhmuse cjêno puhtoro ijiropure usã mehna cjêno noa wahaboagari puhtoro? ni sinituu usã.

2 Usã sa nigũ Jesu nijinogãre pijio, tiquirogãre usã caha duhu docori. Duhu doco tuhasa, usãre nidi:

3—Poto musare yahugutja. Ahriquina macanagã Cohãcjũre tiquina puhtoro waro tuhature. Sa yena musa gũhu tiquina yero saha tuhutuna, quehnoañene comesana, uhmuse cjêno puhtoro ijiropure wahanata. Tiquina yero saha tuhutuerana puhtoro tiquiro ijiropu wahasi musa. 4 Sa yero uhmuse cjêno puhtoro ijiropure sa tuhutu cãriquiro ahriquiro nijinogã yero saha

tuhoturiquirota apequina bui puhtoro wahare. <sup>5</sup>Sa yena yeere yena tana ohō saha ijiyequinagāre cahmena, yuhū gūhure cahmene mūsa, ni yahuri Jesu.

**Ñañene yegū cuarīne**  
(*Mr 9.42-48; Lc 17.1-2*)

<sup>6</sup>Sa yero tiquinare yahu nemori:

—Ahriquirogā yero saha ijiriquiro yuhūre wacū tutuariquirogāre yahutja mūsare. Apequiro ahriquirogā yero saha ijiriquirore ñañene ye dutiro tiquiro ña yuhdūaro yuhdūrota. Tiquiro wamūare pajiria utāre dūhte yo, pajiri mapū tiquirore cohāgū ñano wahaboaga tiquiro. Sa ijepegūta ahriquirogā yero saha ijiriquirore ñañene ye dutiriquiro tiquiro pehe pajiri mapū tiquina cohāriquiro yuhdūoro ñano yuhdūrota. <sup>7</sup>Masare ñañene yegū yeye ijire. Tire yeye ahri yehpa cjēna ñano yuhdūre. Ñañene yeducure masa. Tiquina sa yegū tiquinare ñañene yegū yeyequina pehe ña yuhdūaro yuhdūeta.

<sup>8</sup>Mūhū omoca mehna ñano yegū ti omocare mūhū dūte cohāboro saha ti ñañene duhuya. Tire duhueragū pecapū wahagūta. Topūre ne peca yatierare. Mūhū omocare mūhū cohāgū ti si dihita butiboaga. Sa yegū mūhū pehe sa bajuri turu ijepegūta came Cohācjū mehna ijigūta. Pua omoca mehna pecapū wahagū mūhū sa wahagū ña yuhduaboaga. Sa yegū ti ñañene duhuya. Mūhū dahpocā mehna ñano yegū ti dahpocā gūhure mūhū dūte cohāboro saha ti ñañene duhuya. Tire duhueragū pecapū wahagūta. Topūre ne peca yatierare. Mūhū dahpocāre mūhū cohāgū ti si dihita butiboaga. Sa yegū sa bajuri turu ijepegūta came Cohācjū mehna ijigūta. Pua dahpocā mehna pecapū wahagū mūhū sa wahagū ña yuhduaboaga. Sa yegū ti ñañene duhuya. <sup>9</sup>Mūhū capea mehna ñano yegū tiare ore we mūhū cohāboro saha ti ñañene duhuya. Tire duhueragū pecapū wahagūta. Topūre ne peca yatierare. Tiare mūhū cohāgū tia dihita butiboaga. Ihcā pehe capea mariedapegūta came Cohācjū mehna ijigūta. Pua capea mehna pecapū wahagū mūhū sa wahagū ña yuhduaboaga. Sa yegū ti ñañene duhuya, ni yahuri Jesu.

**Oveja butiriquiro queoyere yahuahye Jesu**  
(*Lc 15.3-7*)

<sup>10</sup>Sa ni tuhasa ohō saha ni yahu nemori:

—Ne, ahriquinagāre macanagāre ihña tuhtieracāhña. Mūsare niita niaja yuhū. Tiquinagā yeequina angele tiquinagāre cohteyequina uhmūserpū ijiyequina pehe yuhū Pacū cahapū sa ijiducure. [<sup>11</sup>Yuhū masū Cohācjū ohorigū ahri yehpapū pecapū wahaboriquinare yuhduogū tūū nii yuhū,] ni yahuri Jesu.

<sup>12</sup>Sa ni tuhasa tiquiro tuhutuye mehna ohō saha ni queoye mehna buheri usāre.

—Ovejare cohteriquiro cien ovejare cūoriquiro ihcāquiro oveja butia wahagū ohō saha yerota tiquinare cohteriquiro pehe. Apequina ovejare noventa y nueve ovejare tiquina ihyaropū duhu doco, butiriquirore macano waharota. <sup>13</sup>Ijirota nii niaja mūsare. Tiquirore bocaro bucueroa tiquiro. Apequina noventa y nueve dūhsayequina mehna bucueroa tiquiro.

Tiquinare tiqiro bucuero yuhdoro butiriquiro pehere bocaro tutuaro bucuero. <sup>14</sup>Sata mari Pacu umuse cjeño ahriquina ihyo ijiyequina gũhure pecapu tiquina wahagũ cahmedare, ni yahuri Jesu.

**Mũhũ acayuro mũhũre ñano yegũ ohõ saha ye dutiahye Jesu**  
(Lc 17.3)

<sup>15</sup>Sa ni tuhasa ohõ saha ni yahu nemori:

—Mũhũ acayuro mũhũre ñano tiqiro yegũ tiqiro mehna yahugũ wahaya. Mũsa sehsaro tire yahuya. Mũhũ sa yegũ tiqiro mũhũre tũhoboaga. Tiquiro tũhogũ “Mũhũre ne pari turi ohõ saha yesi yũhũ”, tiqiro nigũ mũhũ acayurore pari turi piti tigũ niaga mũhũ. <sup>16</sup>Mũhũre tiqiro tũho dueragũ pũrita ihcãquiro mehna waha duagũ o pũaro mehna waha duagũ tiquinare piti ti cã, pari turi tiqirore yahuna wahaya. Mũsa sa yena pũana o ihtiana tiqirore mũsa yahusãgũ, “Poto tjire”, ni masieta apeqũna. <sup>17</sup>Sa yena mũhũ mehna cjeña gũhũre tiqiro tũho dueragũ ijipitiyequina Jesu yequina cahmecoãnequinare yahusãna wahaya. Sa yena Jesu yequina cahmecoãnequinare tiqiro tũho



(San Mateo 18.14)

dueragũ ihñana Cohãcjũre ño peo dueriquiro tiquiro ijiro saha yeya tiquirore. Wapa ne coheriquiro tiquiro ijiro saha yeya tiquirore.

18'Ijirota musare niita niaja. Ahri yehparũ musa Jesu yequina ñañene musa ye dutieragũ uhmusepũ gũhure ye dutisi. Ahri yehparũ musa quehnoañene ye dutigũ uhmusepũ gũhure ye dutiye ijirota.

19'Pari turi musare yahutja ahrire: Musa puana Cohãcjũre sinigũ, musa puana musa sinidire ihcãno saha musa tuhutugũ yũhũ Pacũ uhmuse cjũno tire yerota. 20'Pũaro o ihtiaro yeequina, yeere yeatiquina tiquina cahmecoagũ yũhũ tiquina mehna ijiaja, ni yahuri Jesu.

### **Cahacjũno apequiro tiquiro wapamonore tiquiro bo duerari quitire yahuahye Jesu**

21 Came Pedro Jesu cahapũ esa, sinituri:

—¿Pũhto, yũhũ acayũro mũhũ yaquiro peye tahari yũhũre ñano tiquiro yegũ ihñagũ nohope tahari tire bogũtari yũhũ? ¿Siete tahari bogũtari yũhũ? ni sinituri Pedro.

22 Jesu yũhtiri:

—Siete taharita mũhũre apequiro ñano yerire mũhũ bogũ to wahaerare. Peye tahari mũhũre ñano tiquiro yegũ gũhũre boya.

23'Uhmuse cjũno masa pũhtoro tiquiro ijie ahri queoye yero saha ijire. Ijipiltiyequina masa pũhtoro tiquiro cahacjẽnare tiquirore wapamoñequinare wapa ye peho duti duamahye. 24'Tiquina wapamorire tiquiro queo dũcagũ, tiquirore dahra cohteyequina pehe pajiro wapamoriquire tiquiro cahapũ ne cãhtahye. Wapamoriquire paji yũhdũaro wapamoahye tiquiro pũhtoro. 25'Sa yero tiquiro wapa ye masiedagũ tiquiro pũhtoro tiquirore, tiquiro namonore, tiquiro pohnene cahacjẽna sũ, tiquinare apequinare dua dutimahye. Sa ye ijipiltiye tiquiro cũoye gũhũre dua dutimahye, tiquiro wapamonore wapa ye peho dutiro. 26'Tiquiro sa dua dutigũ pajiro wapamoriquire pehe dũsepe curi mehna quehe sa, tiquiro pũhtoro tutuaro siniahye: "Pũhto, yũhũre paja ihñagũ cohteniña. Mũhũre wapa ye pehoutja", niahye tiquiro pũhtoro. 27'Tiquiro sa nigũ tuhoro, tiquirore paja ihñano tiquiro wapamonore sata bo cãhye.

28'Tiquiro sa yeri bato wapamoriquire pehe waha, apequiro cahacjũnore tiquirore mehenogã wapamoriquire boca sahye. Sa boca saro wamũa ñeheahye tiquirore. "Yũhũre mũhũ wapamonore wapa ye pehoya", niahye tiquiro mehna cjũnore tiquiro yero saha ijiriquire cahacjũnore. 29'Tiquiro sa nigũ apequiro cahacjũno pehe dũsepe curi mehna quehe sa, tiquirore tutuaro sinimahye. "Yũhũre paja ihñagũ mehenogã cohteniña. Mũhũre wapa ye pehoutja", nimahye apequiro cahacjũno tiquirore. 30'Tiquiro sa ni siniepegũta yũhtierahye. Sa yero tiquiro apequiro cahacjũnore peresu ye dutiahye. Tee tiquiro wapa ye pehogũpũ wioro taro niahye tiquirore. 31'Pajiro wapamoriquire mehenogã wapamoriquire tiquiro sa yegũ ihña, usua, apequina cahacjẽna pehe tiquina pũhtoro yahusãne wahahye. 32'Tiquina sa ni yahusãgũ tuhoro tiquina pũhtoro tiquina

yahusãriquiore pijio, ohõ saha niahye: “Mũhu ña yũhdũagu ijire. Mũhu yũhure tutuaro sinigũ mũhu wapamonore bo pehomi yũhu. <sup>33</sup>Mũhure yũhu sa yepegũta mũhu pehe mũhure wapamoriquire boerañohti. Mũhu wapamono pehere yũhu boriro sahata tiquire mũhure wapamono gũhure mũhu bogũ quehnoa yũhdũaboaga. ¿Dũhsegu tiquire paja ihñedari mũhu, sa yegu?” niahye pũtoro tiquire. <sup>34</sup>Sa nino tutuaro usua, peresu yeahye tiquire cahacjũnore. Tee tiquire wapa ye pehogũpũ wioro taro niahye, ni yahuri Jesu.

<sup>35</sup>Sa yero ohõ saha ni ahri quitire yahu bato tiri:

—Sata yerota yũhu Pacũ uhmũse cjũno mũsare. Mũsa ijipihina mũsa acaye mũsare tiquina ñano yerire quehnoano mũsa bo pehoeragũ tiquire mũsare buhiri dahrerota, nidi Jesu.

### Tiquina namosãnumiare cohãñene yahuahye Jesu

(Mr 10.1-12; Lc 16.18)

**19** <sup>1</sup>Tire tiquire sa ni yahuri bato tiquire Galileapũ ijiriquiro Judea yehparũ usãre siho wahari. Jordã wame tiri ma ape sie pahrẽpũ esau usã. <sup>2</sup>Topũ usã wahagũ peyequina masa usãre nũnũ tã cãri. Tiquina mehna cjẽnare dohatiyequinare yũhdũgũ yeri tiquire.

<sup>3</sup>Sa ye ihquẽquina fariseo masa Jesure yahusã duaye, ñano tiquire yahuducugũ tũho duaye, tiquire sinituri:

—¿Mari namosãnumiare cohãgũ quehnoaboagari? ¿Mari dutiye pehe sata ye dutiagari, mũhu tũhotugũ? ni sinituri tiquina.

<sup>4</sup>Jesu yũhtiri:

—¿Cohãcjũ yere tiquina ojoari pũpũ ne ahrire buherari mũsa? Ohõ saha ni ojoahye: “Coã waropũre ahri yehpare bajumehnediquiro uũũno, numino gũhure yeahye”, ni ojoahye. <sup>5</sup>Sa yero ohõ saha ni ojoa nemoahye: “Sa yero uũũno tiquire pacũsumũare cohã wjija, tiquire namono mehna ijirota. Sa ye tiquina pũaro ijiepetã ihcã pagũ yero saha ijire. <sup>6</sup>Sa ye tiquina pũaro yero saha ijierare. Ihcã pagũ yero saha ijiye nine. Cohãcjũ tiquire omoca dũhte dutiyequina ijire. Sa ye tiquinare cahme duhueraro cahmene”, ni ojoahye, nidi Jesu tiquinare.

<sup>7</sup>Tiquiro sa nigũ fariseo masa sinituri tja:

—Mũhu ohõ saha ni yahuepegũta ohõ saha ni ojoahye Moise pehe: “Mũhu namonore cohã duagu papera pũre tire ojoaya. Sa ojoagu ti pũre mũhu namonore mũhu ohori bato ticorore cohã masine mũhu”, ni ojoahye Moise. ¿Mũhu nino saha ijiepegũta Moise pehe dũhsero ohõ saha ni ojoayari? ni yũhtiri tiquina tiquire.

<sup>8</sup>Jesu yũhti cahmedi tiquinare:

—Cohãcjũre mũsa ñecũsumũa panopũ cjẽna tiquina tũho dueragũ ihñano tiquina namosãnumiare tiquina cohãgũ, “Sata wahacũnahdo”, niahye Moise. Tiquiro sa niepegũta coã waropũre ahri yehpare sa ijierari. <sup>9</sup>Mũsare niita niaja. Masũno tiquire namono ticoro ñano yerapegũta ticorore cohãno, apecorore namo tiro, tiquire apecoro mehna ñano yero nine. [Sa yero ahriquire cohãricorore namo tiriquire gũhu ticoro mehna ñano yeriquiro ijire,] nidi Jesu.

<sup>10</sup>Tiquina sa nigũ tũhona, usã tiquiro buhena pehe tiquirore ohõ saha nii:  
—Sata umũno tiquiro namono mehna tiquina cahme cohædagũ mari pehere mari namo tieragũ quehnoaboaga, nii usã.

<sup>11</sup>Jesu yũhtiri:

—Ihquẽquinareta namo ti dutierare Cohãcjũ. Tiquiro namo ti dutiriquina dihita namo tieta. <sup>12</sup>Umũare namo ti dutieraye ihquẽgã ijire. Ihquẽquina umũa numiare cahmeẽnequina masa bajuare. Apequina umũa masa tiquina apẽni tõho tiquina weriquina pehe namo ti masiedare. Apequina umũa umũuse cjũno tiquina pũhtoro yere yedoho duaye, namo tierare. Sa ye ahriquina namo ti dueyequina sata tũhotu cãhnequina, sata tiquina sohtori tigũ quehnoare, nidi Jesu usãre.

### Macanagã ye ijiatire Cohãcjũre sini basahye Jesu

(Mr 10.13-16; Lc 18.15-17)

<sup>13</sup>Sa ye masa macanagãre Jesu cahapũ ne wihiri. Sa ne wihiye, tiquina Jesure tiquiro omocare tiquinagã bui ña peo duti duamedi. Sa ye tiquinagãre Cohãcjũre sini basa duti duamedi Jesure. Tiquina sa yegũ ihñana usã tiquiro buhena tiquinare tuhtimi. <sup>14</sup>Usã sa tuhtigũ ihñano, usãre Jesu ohõ saha nidi:

—Macanagã yũhũ cahapũ ahtaahro. “Waharisa”, niedacãhña tiquinagãre. Tiquinagã Cohãcjũre tiquina pũhtoro tũhoture. Sa ye tiquiro umũuse cjũno pũhtoro ijirorũ ahriquinagã yero saha tũhotuyequina ijire topũre, nidi Jesu usãre.

<sup>15</sup>Sa ninota tiquiro omocare tiquinagã bui ña peo tuhasa, wahaa wahari.

### Doeri cjẽ upũro Jesure sinituahye

(Mr 10.17-31; Lc 18.18-30)

<sup>16</sup>Tiquiro sa yeri bato ihcãquiro Jesu cahapũ wihi, sinituri tiquirore:  
—¿Ne quehnoagũ buhegũ, ijipihtiyẽ decori Cohãcjũ mehna iji duagũ, quehnoañene ye duagũ dũhse yeboagari yũhũ? nidi tiquiro.

<sup>17</sup>—¿Dũhse ijiro boro yũhũre quehnoañene sinituajari mũhũ? Cohãcjũ dihita quehnoariquiro ijire. Ijipihtiyẽ decori Cohãcjũ mehna iji duagũ tiquiro dutiyere yeya, nidi Jesu.

<sup>18</sup>—¿Dise boro dutiyẽ pehere nigũ nijari? ni sinitu nemori tiquiro. Jesu yũhtiri:

—Masare wejẽdacãhña. Wũana tieracãhña. Yaqueracãhña. Ni mehoedacãhña. <sup>19</sup>Mũhũ pacusumũare ño peoya. Mũhũ basi mũhũ cahĩno saha mũhũ cahapũ ijiriquiro gũhũre cahĩña. Ahri dutiyere yero cahmene, nidi Jesu.

<sup>20</sup>—Ahri dutiyere ne yũhdũducaera tii yũhũ. ¿Dũhse ye nemoagari yũhũ ijipihtiyẽ decori Cohãcjũ mehna iji duagũ? nidi tiquiro Jesure.

<sup>21</sup>Tiquiro sa nigũ tũhoro Jesu yahu nemori:

—Mũhũ ñañe mariegũ iji duagũ mũhũ ye ijipihtiyere duagũ wahaya. Sa duagũ ijipihtiyẽ mũhũ wapatari niñerure pejesuoyequinare ohoya. Mũhũ sa yegũ pajiro mũhũ ye umũusepũ, Cohãcjũ cahapũ ijirota. Mũhũ sa yeri bato yũhũ mehna cjũ ijigũ ahtaya, ni yahuri Jesu.



<sup>22</sup>Tiquiro sa nigũ tũhoro tutuaro bũjũa witiri. Tiquiro doeri cjẽ upũro ijipihtiyẽ cœoriqũro ijiri. Sa yero Jesu yahugũ tũhoro tutuaro bũjũa witiri. Pejecœoyequinare oho dueraro wahaa wahari.

<sup>23</sup>Tiquiro sa wahari bato Jesu usãre tiquiro buhenare yahu nemori: —Ijirota musare niita niaja. Doeri cjẽ upũro Cohãcjũ pũhtoro ijiropũre tiquirore waharo basioera cjũre. <sup>24</sup>Musare yahu nemoutja: Camello pehe awia copepũ tiquiro sajã duagũ basioerare tiquirore. Tiquiro sa ijiro yũhdũoro doeri cjẽ upũro Cohãcjũre cahmedaro, Cohãcjũ pũhtoro ijiropũre waharo basioerare, nidi tiquiro.

<sup>25</sup>Tiquiro sa nigũ tũhona usã tũho maria waha, usã basi ohõ saha nii: —Aa, dũhse tiquiro nino sahata ijigũ, ne ihcãqũro masũno Cohãcjũ cahapũ waha masiedaboaga, nii usã basi.

<sup>26</sup>Usã sa nigũ Jesu usãre ihũano, yahuri: —Masa tiquina esa tuharo tiquina quehnoano yeri mehna Cohãcjũ cahapũ waha masiedare. Cohãcjũ pehe masare pecapũ wahaboriquinare yũhdũo masine. Tiquiro ijipihtiyere quehnoano ye masi peho cãre, nidi tiquiro usãre.

<sup>27</sup>Tiquiro sa nigũ Pedro tiquirore nidi: —Tũhorĩna. Usã pehe usã ye ijipihtiyere cũ cãũ mũhũ mehna wahana tana. ¿Usã ohõ saha yena, dũhse ijiyere wapatanatari usã? nidi tiquiro.

<sup>28</sup>Tiquiro sa nigũ tũhoro ohõ saha nidi Jesu: —Musare niita niaja: Pihitiri deco bato ijipihtiyẽ wahma dihita comesaeta. Ti pjeprũre yũhũ masũ Cohãcjũ ohorigũ yũhũ pũhtoro yũhũ dujiropũ asi siteropũ dujiitja yũhũ. Topũ yũhũ dujigũ musa gũhũ doce dujiye pahtaripũ pũhtoa tiquina dujiye pahtaripũ dujinata. Sa yena Israe masare doce cururi cjẽnare besenata musa quehnoañequina gũhũre, ñañequina gũhũre. <sup>29</sup>Sa ye yeere yena tana musa wũhũsere, musa bahanare, musa pacusũmuare, musa pohñare, musa weserire cũrina ijina, pajiro wapatanata. Sa yena ijipihtiyẽ decori Cohãcjũ mehna ijinata. <sup>30</sup>Sa ijiepegũta yojopũre peyequina pũhtoa ijiriquina ti pjeprũre ihyo ijieyequina tojoaeta. Sa ye yojopũre peyequina ihyo ijieyequina ijimediquina ti pjeprũre pũhtoa comesaeta, ni yahuri Jesu usãre tiquiro buhenare.

### Ũhse wesere dahrayequina queoyere yahuahye Jesu

**20** <sup>1</sup>Sa ye Jesu pari turi queoye mehna yahu nemori tja: —Ũhmũse cjũno masa pũhtoro ijire. Wese upũro queoye mehna tiquiro pũhtoro ijiyere yahutja musare. Tiquiro wese upũro bohrea quehagũ tiquiro ya wesere dahratiquinare pjiro wahahye. <sup>2</sup>“Ihcã cjoe niñeru cjoe wapa yegutja ihcã decore”, niahye tiquinare. “Aũ”, niahye dahratiquina. Tiquina sa nigũ wesepũ dahra dutiro ohoahye tiquiro tiquinare. <sup>3</sup>Sa yero decopũ nueve ijigũ doeri cjẽ duaropũ wahahye tiquiro. Topũ esaro, apequina dahraeyequinare ihũahye. <sup>4</sup>Sa ihũano tiquinare niahye: “Musa gũhũ ya wesere dahrana wahaya. Quehnoano wapa yegutja”, niahye tiquiro. <sup>5</sup>Sa ye tiquina wesepũ dahraye

wahahye. Sa ye wese up̄ero coheri p̄je ijigū, ñamicahap̄u tres ijigū gūhure dahra dutiahye. <sup>6</sup>Sa ye ñamicahap̄u cinco ijigū doeri c̄jē duarop̄u tiquiro wahahye tja. Top̄u esa, apequina dahraeyequinare ihñano, tiquinare niahye: “¿Musa dūhse yena niajari dahraerapenata ohōp̄ure?” ni sinituahye tiquinare. <sup>7</sup>“Ne, usāre dahraye mariedare”, ni yuhtiahye tiquina. “Musa gūhū ya wesere dahrana wahaya”, niahye tiquinare. Sa ye tiquiro nidiro sahata tiquiro ya wesere dahraye wahahye.

<sup>8</sup>Sa ye ñamicahap̄u dahra duhuri p̄je ijigū wese up̄ero tiquiro dahrayequinare coheriquirore ohō saha niahye: “Dahrayequinare p̄jiya. Tiquina wihigū tiquinare wapa yeya. Camep̄u yūhū dahra dutiriquinare wapa ye mūhtaña. Tiquinare wapa ye tuhasa, apequina gūhure wapa ye tuhasa, yūhū dahra duti mūhtariquinare wapa ye bato tiya”, niahye tiquiro. <sup>9</sup>Sa yero cinco ijigū dahra ducayequinare ihcā c̄joe niñeru c̄joe wapa yeahye. <sup>10</sup>Tiquiro sa wapa yegū ihñañe, “Usāre p̄aji c̄jūnogā wapa yerota”, ni tūhotumahye tiquiro duti mūhtariquina pehe. Tiquina gūhure ihcāno saha wapa yeahye. <sup>11</sup>Sa ye niñerure tiquiro wapa yegū tiquina p̄uhtoro mehna usuaye, tiquina basi cahme niahye: <sup>12</sup>“Ahriquina usā batop̄u tiquiro dahra dutiriquina pehe ihcā horata dahrari. Usā pehe ihcā deco quehnoano dahra nahñoa wahami. Ñano asū asiri usāre. Usā sa yoari p̄je dahraep̄egāta usā batop̄u dahra ducariquina gūhure ihcāno saha wapa yeri tiquiro”, ni usuahye tiquina basi. <sup>13</sup>Ihcāquiro tiquina mehna c̄jūno tiquiro sa nigū tūhoro, wese up̄ero yuhtiahye tiquirore: “Ne yūhū acayū, ‘Ihcā c̄joe niñeru c̄joere wapa yegū t̄ja’, nimi mūsare. Yūhū sa nigū yuhtiri mūsa. Sa yegū yūhū nidiro sahata mūsare wapa yei yūhū. Queoro wapa yei mūsare. Ne yaquerū mūsare. <sup>14</sup>Sa yegū yūhū wapa yerire ne, mūhū ya wūhūp̄u tojoarisa. Ahriquirore came yūhū dahra dutiriquiro gūhure mūsare yūhū wapa yeriro punota wapa yegū t̄ja. <sup>15</sup>Yee niñeru ijire ahri. Sa yegū yūhū cahmeno sahata ahri mehna wapa yegū t̄ja. ¿Apequinare bui c̄jūnogā yūhū quehnoano wapa yegū ihña tuhtiajari mūhū?” niahye tiquiro wese up̄ero, ni yahuri ti queoyere Jesu.

<sup>16</sup>Sa nino, yahu nemori tiquiro:

—Ahri queoye nidiro saha came c̄jā curua iji mūhtari curua ijirota ūhmūsep̄u. Sa ye iji mūhtari curua pehe tiquina camep̄u c̄jā curua tojoarota ūhmūsep̄u, ni yahuri Jesu.

### Pari turi Jesu tiquiro yaria masa wijiatiye yahuahye

(Mr 10.32-34; Lc 18.31-34)

<sup>17</sup>Sa ye Jerusalēp̄u wahaducu, usāre doce tiquiro buhenare p̄jijo tuhasa, ape siep̄u usāre usā sehsharo neari Jesu. Usā sehsharo usā ijigū usāre yahuri:

<sup>18</sup>—Tūhoya yūhure. Yojōp̄ure Jerusalēp̄u wahana niaja mari. Top̄u yūhure masure Cohāc̄jū ohorigure ñehe, apequinap̄ure yūhure ohoeta. Pahia p̄uhtoare, judio masare buheyequina gūhure yūhure ohoeta. Sa ye yūhure wejē dutieta tiquina. <sup>19</sup>Sa wejē dutiye, judio masa ijieyequinare yūhure ohoeta. Tiquina sa ohori bato tiquina pehe yūhure buj̄p̄e, tana, curusap̄u quē bihaeta yūhure. Sa yegū yūhū yariari bato ihtia deco wahaboro masa wijiagū t̄ja, ni yahuri Jesu usāre.

**Santiago, Ñu mehna tiquina pacoro pehe tiquinare sini basahye Jesure**  
(*Mr 10.35-45*)

<sup>20</sup>Sa ye Zebedeo namono p̄aro ticoro pohne mehna Jesu cahar̄u esa, d̄usepe curi mehna quehe sahye tiquire sinino taro.

<sup>21</sup>—¿D̄uhse ȳh̄u yeḡu cahmeajari m̄h̄u? niahye Jesu ticorore.

—M̄h̄u p̄h̄to saj̄aḡu ȳh̄u poh̄nare dutiyequina s̄õña. Sa yeḡu m̄h̄u p̄a peherip̄u duji dutiya tiquinare, ni siniahye ticoro.

<sup>22</sup>Jesu oh̄o saha niahye:

—M̄sa ñano ȳh̄d̄uatire masiedapenata sa sinine m̄sa. ¿Yojop̄re ȳh̄u ñano ȳh̄d̄uato saha m̄sa ḡh̄u ñano ȳh̄d̄una ihc̄ano sahaboagari m̄sa? niahye Jesu ticoro poh̄nene.

—Ihc̄ano sahanata, ni ȳhtiahye Santiago, Ñu mehna.

<sup>23</sup>—Ijirota niita nijaja m̄sare. Ȳh̄u ñano ȳh̄d̄uato saha ñano ȳh̄d̄unata m̄sa ḡh̄u. Sa ijiepeḡta ȳh̄u mehna dutiatiquinare, ȳh̄u mehna dujiatiquinare bese masiedaja ȳh̄u. Ȳh̄u Pac̄u pehe quehno tuhasari tire. Sa ye tiquire beseatiquina dih̄ta ȳh̄u poto pehe ȳh̄u c̄u pehe pehe dujieta, niahye Jesu tiquinare.

<sup>24</sup>Sa yena us̄a apequina diez tiquire buhena pehe Santiago, Ñu ahriquina p̄aro mehna usuaū us̄a. Jesure tiquina pacoro ticoro sini basarire tuhona usuaū tiquina mehna. <sup>25</sup>Us̄a sa usuaḡu ihñano, Jesu us̄are ijipihtina tiquire buhenare piji cahmeco, yahuri us̄are:

—Coh̄ãcj̄re masieñequina p̄h̄to pehe tiquina masare dutiye, usuaro mehna dutire. <sup>26</sup>M̄sa pehe ne sa yesi m̄sa basi. M̄sa mehna cj̄no p̄h̄toro iji duaro, ijipihtiyequina tiquire mehna cj̄ena cahacj̄no ijiro cahmene tiquire. <sup>27</sup>Sa yero ijipihtiyequinare dutiriquiro iji duaro, apequina cahacj̄no ijiro cahmene tiquire. <sup>28</sup>Sata ijiḡu ijijaja ȳh̄u ḡh̄u. Ȳh̄u mas̄u Coh̄ãcj̄u ohorigu ahri yehpap̄re masare yedohoḡu ahtau. Sa yeḡu peyequina masa ye buhirire yariagu ahtau nii. Sa yeḡu masare pecar̄u wahaboriquinare ȳh̄d̄oḡu ahtau nii. Masare dutipegu taḡu niedu, nidi Jesu us̄are.

**P̄aro caperi bajueyequinare ihñaḡu yehye Jesu**  
(*Mr 10.46-52; Lc 18.35-43*)

<sup>29</sup>Sa ye Jericópu ijirina us̄a wahaḡu peyequina masa Jesure nunu t̄ari.

<sup>30</sup>Sa ye Jesu tiquire ȳh̄d̄uaḡu p̄aro caperi bajueyequina maha d̄h̄tu cahar̄u dujiyequina t̄h̄ori. Sa t̄h̄oye, oh̄o saha ni sañuducuri:

—P̄h̄to, Davi m̄n̄ano panami iji turiagu, masare ȳh̄d̄uoacj̄u, us̄are paja ihñaña, ni sañuducuri.

<sup>31</sup>Tiquina sa ni sañuducuḡu masa pehe tiquinare tuhtiri.

—Dihta mariahña, nidi masa tiquinare.

Tiquina sa tuhtiḡu t̄h̄oye, to pano tiquina sañuducuriro ȳh̄d̄oro sañuducu nemori tja.

—Usã puhto, Davi munano panami iji turiagu, usãre paja ihñaña, ni sañuducu nemori.

<sup>32</sup>Tiquina sa nigũ tuhoro Jesu esadaca, tiquinare pijio, sinituri:

—¿Duhse yuhũ yegũ cahmejari msa? ni sinituri.

<sup>33</sup>—Puhto, usãre ihñagũ yeya, ni yuhtiri tiquina.

<sup>34</sup>Tiquina sa nigũ Jesu tiquinare paja ihñari. Sa paja ihñano tiquina caperire ña peori. Tiquiro sa ña peogũta tiquina pehe ihñaa wahari. Sa ihñaña, tiquirore nunũ tã cãa wahari.

### Jerusalẽpu esahye Jesu

(Mr 11.1-11; Lc 19.28-40; Jn 12.12-19)

**21** <sup>1</sup>Sa ye Jerusalẽpu esana tana Betfagé wame tiri macapu esa muhtau usã Jesu mehna. Cunũ Olivo wame tidũ cahapu Betfagé ijiri. Topu esaro, usã tiquiro buhena mehna cjẽnare puaro Jesu tiquiro pano oho muhtari. <sup>2</sup>Ohõ saha dutiri tiquinare:

—Si macapu burroare nena wahaya. Topu esana, duita burrore ticoro macunogã mehna tiquina duhte docoricorore bocanata. Tiquinare boca, yuta dare pã, ne cãhta basaya yuhure. <sup>3</sup>Msa sa yegũ ihñano, burroa upuro “¿Duhseña tana burroare pajari msa?” tiquiro nigũ tuhona ohõ saha ni yuhtiya. “Mari puhtoro burroare cahmedi. Sa yero mianogã wiarota tiquiro”, ni yuhtiya tiquirore, ni duti ohori Jesu puaro tiquiro buheyequinare.

<sup>4</sup>Sa yeri Cohãcjũ yere yahu muhtariquiro tiquiro ni ojoariro sahata. Ohõ sahata ni ojoahye panopu:

<sup>5</sup>Jerusalẽ cjẽnare ohõ saha ni yahuya:

“Ihñaña msa. Msa puhtoro msa cahapu ahtare. Tiquiro quehnoano masa quehnoariquiro ijire. Burro macunogã bui pesariquiro ahtarota”, ni yahuya Jerusalẽ cjẽnare, ni ojoahye panopu.

<sup>6</sup>Jesu tiquiro dutiriquina puaro ti macapu esa, tiquiro dutiriro sahata yeahye tiquina. <sup>7</sup>Burrore, ticoro macunogã gũhare ne cãhta, tiquina bui sañaña suhtire tu we ne, burrogã bui duhu peori tiquina. Tiquina sa yeri bato Jesu tiquirogã bui mja pjeri, waharo taro. <sup>8</sup>Mja pje tuhasa, tiquirogã bui Jerusalẽpu wahari. Tiquiro ahtagũ ihñaña masa peyequina tiquina bui cjẽ suhtire tu we ne, seõ cũ muhtari tiquiro wahari mahare, Jesure ño peoye. Apequina pehe pũri tiye dupurire mahapu cũ muhtari tiquirore ño peoye. <sup>9</sup>Sa ye tiquiro pano wahayequina, tiquiro bato nunũ tãnequina mehna sañuducuri:

—Davi panamino iji turariquirore marine yuhduoatiquirore ño peouhna. Ahriquiro Cohãcjũ ohoriquiro quehnoano ijiahro. Uhmuse cjẽnore “Tutuagu ijire”, ni ño peouhna, ni sañuducuri masa.

<sup>10</sup>Sa ye Jerusalẽpu tiquina esagũ to cjẽna pehe ihña maria wahari.

—¿Noa ijijari ahriquiro? ni cahme sinituri tiquina.

<sup>11</sup>Apequina masa yuhtiri:

—Ahriquiroy Cohãcjũ yere yahu muhtariquiroy Nazare cjũno Jesu wame tiriquiroy ijire, ni yahuri tiquina masare.

### Cohãcjũ wuhupũ esahye Jesu

(Mr 11.15-19; Lc 19.45-48; Jn 2.13-22)

<sup>12</sup>Came Cohãcjũ wuhupũ esari Jesu. Ti wuhupũ esa, sajãa wahari. Ti wuhupũ duayequinare, dúyequina gũhure cohã wiori tiquiro. Sa yero niñeru comesaye mesarire ne majare cũ mujari. Bujuaare duayequina tiquina dujiye pahitari gũhure sata yeri. <sup>13</sup>Sa yero tiquinare ohõ saha nidi:

—Cohãcjũ yere tiquina ojoari pũpũ ohõ saha nine: “Ya wuhũ Cohãcjũ mehna yahuducuri wuhũ wame tirota”, nimene tiquiro ojoari pũpũ. Mũsa pehe ahri wuhupũ duana mũsa basi cahme yaquere mũsa, nidi tiquiro tiquinare.

<sup>14</sup>Tiquiro sa yeri bato caperi bajueyequina, tini masieñequina gũhũ Cohãcjũ wuhupũ tiquiro cahapũ wihiri. Tiquina sa wihigũ tiquinare yũhdũgũ yeri tiquiro. <sup>15</sup>Sa quehnoañene tiquiro yegũ ihñãñe, pahia pũhtoã, marine judio masare buheyequina gũhũ usuari tiquiro mehna. Sa ye macanagã Jesure “Davi panami iji turiagu, masare yũhdũocjũ, tutuagu ijire mũhũ”, tiquina ni ño peogũ tũhoye usuari pari turi tiquina. <sup>16</sup>Sa usuaye ohõ saha nidi Jesure:

—¿Tiquina sa nigũ tũhoerajari mũhũ? Sa niedacãhdo, ni tuhtiri tiquina Jesure.

—Tiquina sa nigũ tũhoaja. ¿Cohãcjũ ojoari pũpũ ahrire ne buherari mũsa?

Macanagãre Cohãcjũre quehnoano ño peogũ yeri mũhũ, nine Cohãcjũ yere tiquina ojoari pũpũ, nidi Jesu.

<sup>17</sup>Sa ni tuhasa tiquinare cohã cã, Betania wame tiri macapũ esa, ti ñamine topũ ijiri.

### Jesu higuerağure yaria dutiahye

(Mr 11.12-14, 20-26)

<sup>18</sup>Ape deco bohrearopũ Jerusalẽpũ tojoaro, ujuã ahbari Jesu. <sup>19</sup>Sa ujuã ahbaro, maha duhtũ cahapũ ijidũ higuerağũ wame tidũre ihñano, tũ dũcare macano wahamedi. Dũca mariedari tũ pehe. Pũri dihita ijiri. Tũ sa ijigũ ihñano Jesu tũre ohõ saha nidi:

—Ahdũ ne pari turi dũca tisi, nidi tiquiro.

Tiquiro sa nigũta duita tũ pehe ñaia wahari. <sup>20</sup>Tũ sa wahagũ ihñana usã tiquiro buhena ihña maria wahaũ.

—¿Yohou, dũhsero ahdũ duita ñaia wahajari? ni sinituu usã.

<sup>21</sup>Jesu yũhtiri:

—Ahrire wacũña mũsa. Cohãcjũre quehnoano wacũ tutuaya. “Potota sa yerota tiquiro”, nina, ahdũre yũhũ yeriro sahata ye masinata mũsa gũhũ. Sa yena ahdũre yũhũ yaria dutiriro yũhdũoro ye masinata mũsa. Ahdũ cũnũre “Duha ne, pajiri mapũ cohãdu ijiaħro”, mũsa nigũ duha cohãdu ijirota. <sup>22</sup>Cohãcjũre mũsa wacũ tutuagũ, “Yũhũ sinidiro sahata waharota”, mũsa ni wacũgũ mũsa sinidiro sahata waharota, nidi Jesu usãre.

**Jesure dutiriquiروه sinituahye apequina**

(Mr 11.27-33; Lc 20.1-8)

<sup>23</sup>Sa ye Cohācjū wuhupū tojoa sa, buheri tiqiuro. Tiquiro sa buhegū pahia puhtoā, mari judio masa bucuna mehna tiqiuro cahapū wihi, sinituri:

—¿Duhsegu canū ñamicahare sa yeari muhu? ¿Noa muhure tire sa ye dutiari? ni sinituri tiquina.

<sup>24</sup>Tiquina sa nigū Jesu yuhtiri:

—Musa pehere sinitu muhtagutja. Quehnoano yuhure musa queoro yuhtigū musare yahutja yuhū gūhū. <sup>25</sup>¿Ñu masare tiqiuro wame yegū noa boro pehe tiqiurore wame ye dutiyari, musa tuhutugū? ¿O Cohācjū dutierayari? ¿O masa pehe dutiyari, musa tuhutugū? ni sinituri Jesu tiquinare.

Tiquiro sa nigū tiquina pehe tiquina basi ohō saha nidi:

—¿Duhse ni yuhtinatari mari? “Cohācjū Ñure dutie tiahye”, mari nigū, “¿Duhseña Ñu tiqiuro dutiepegūta tuho duerari musa?” niboaga Jesu marine. Sa yena “Cohācjū Ñure dutie tiahye”, ni yuhti masiedaja mari. <sup>26</sup>Ahriquina masa pehe “Potota Ñu Cohācjū yere yahu muhtariqiuro ijiri”, ni tuhuturi tiquina. Sa ni tuhutuye “Ñu tiqiuro wame yegū Cohācjū pehe tiqiurore dutierahye”, mari nigū tuhoye masa usueta mari mehna. Sa yena ti gūhure yahu masiedaja mari, nidi tiquina basi.

<sup>27</sup>Tiquina sa nidi bato Jesure yuhtiri tiquina.

—Ñure wame ye dutiriquiروه usā masiedaga, nidi tiquina.

Tiquina sa nigū tuhoro ohō saha nidi Jesu:

—Ti pje pūrita yuhū gūhū musa sinitu muhtarire yahueraja musare. Yuhū yerire dutiriquiروه yahueraja musare, nidi tiqiuro tiquinare.

**Ръаро раръро queoyere yahuahye Jesu**

<sup>28</sup>Tiquiro sa nidi bato Jesu queoye mehna buhe nemori tiquinare:

—¿Ne, duhse tuhutuajari musa ahri queoyere? Ръаро раръро ijiahye.

Wahmino pehere ohō saha niahye tiqiuro раръро: “Macū, wesepū dahragū wahaya”, niahye. <sup>29</sup>“Wahaeraja”, ni yuhtimahye tiqiuro macūno coā warore.

Sa nieperota camerūre wesepū waha duaro ijiahye tiqiurore. Sa yero wahahye tiqiuro. <sup>30</sup>Sa yero tiquina раръро tiqiuro macūno duhsariqiuro cahapū esa, tiqiuro wahminore tiqiuro dutiriro sahata wesepū waha dutimahye. “Añ”, nimahye duhsariqiuro. Sa nieperota wahaerahye tiqiuro.

<sup>31</sup>¿Diquiro pehe tiqiuro раръро dutiriro sahata yeari? ni sinituri Jesu.

—Tiquiro wahmino pehe yeahye, ni yuhtiri tiquina.

Tiquina sa nigū Jesu yahuri:

—Musare niita niaja. Wapa ne cohteyequina, umna mehna ñano yeducuye numia tiquina buipū waro musa pehe ña yuhduana ijire. Sa ye Cohācjū puhtoro ijiropure musa esaboriروه tiquina pehe musare esa muhtaboaga.

<sup>32</sup>Ñu wame yeriquiro buhero musare “Quehnoano yeya”, ni yahumedi. Sa

tiquiro yahugū dāhsariquiro pacūrore tiquiro yūhtierariro sahata tiquirore tūhoerari mūsa. Sa yena tiquirore yūhtierari. Wapa ne cohteyequina pehe, amma mehna ñano yeducuye numia gūhū tiquirore tūhori. Tiquina sa tūhogū ihñari mūsa. Mūsa sa ihñāepenata tiquirore ne tūho duerari. Sa yena tūhoerari mūsa, nidi Jesu pahia puhtoare, mari judio masa bācuna gūhure.

**Ñañequina dahra cohteyequina queoyere yahuahye Jesu**

*(Mr 12.1-12; Lc 20.9-19)*

<sup>33</sup>Sa ye Jesu pari turi queoye mehna ohō saha ni tiquinare buhe nemori: —Apeye queoyere tūhoya mūsa. Dihta cūoriquiro ijiahye. Tiquiro ya dihtapū ūhse darire oteahye. Ote tuhasa, sahrīnore ye tuhasa, ūhsere tiquina cūhta mūtoati copere sehe, ūhmūari wūhūgā yeahye.

'Sa yero ti wesere apequinare ihcā pehe pahrē pahma cūahye. Sa yero ti wesere tiquinare ihña ihbo duti, ape yehpapū wahaah wahahye tiquiro.

<sup>34</sup>Sa ye ūhse ñidi pje ijigū wese upūro tiquiro cahacjēnare wesere ihña ihboyequina cahapū ohoahye. Wese cjē tiquiro oteri dūcare tiquiro ya pahrē cjē dūcare ne dutiro ohomahye. <sup>35</sup>Sa ye wesere ihña ihboyequina pehe tiquiro cahacjēnare ñano yeahye. Ihcāquirore tutuaro quē, apequirore wejē, apequirore utā mehna doqueahye. <sup>36</sup>Came wese upūro pari turi tiquiro cahacjēnare tiquiro oho mūhtariquina yūhdūo cjūno ijiri curuare ohomahye tja. Sa ye wesere ihña ihboyequina tiquina gūhūre mūnanota yeahye tja.

<sup>37</sup>'Sa yero tiquiro oho bato tiriquiro tiquiro macūno ijiahye. “Yūhū macū pehere ño peota”, nino tiquirore ohomahye. <sup>38</sup>Tiquiro sa ni tūhotuepegūta wesere ihña ihboyequina tiquiro macūno ahtagū ihñañe, ohō saha niahye: “Wese upūro macūno ijire ahriquiro. Tiquirore wejēihna mari. Sa yero ahri wese mari ya wese tojoarota”, nimahye tiquina basi. <sup>39</sup>Sa niñeta tiquirore ñehe, wese dūhtū cahapū ne cā, wejēahye tiquina tiquirore.

<sup>40</sup>¿Ne, wese upūro ahtarō dūhse yerotari tiquiro wesere ihña ihboyequinare? ni sinituri Jesu pahia puhtoare, bācuna gūhure.

<sup>41</sup>Tiquiro sa nigū tiquina yūhtiri:

—Tiquiro apequinare wesere ihña ihboatiquinare comesarota jji mūhtañequinare ña yūhdūayequinare wejēno taro. Tiquirore queoro dūcare tu watiquina pehere ihña ihbo dutirota, ni yūhtiri tiquina.

<sup>42</sup>Tiquina sa nigūta Jesu yahu nemori tiquinare:

—¿Cohācjū yere tiquina ojoari pūpū ahrire yūhūre tiquiro ni ojoarire ne buherari mūsa?

Ahriquiro Cristo utā yero saha ijire. Utāre wūhū dahreyequina tiquina cohāno saha masa tiquirore cohāeta. Tiquina sa yepegūta yojorūre wūhū dahreyequina wūhūre yeye tiquina cū mūhtaria utāre tiquina cūno saha Cohācjū tiquirore puhtoro sōri. Cohācjū pehe ahrire yeri. Tiquiro sa yegū ihñana, “Quehnoa yūhdūare”, ni, tūhotuaja mari, ni ojoahye panopū.

¿Tire ne buherari mûsa? <sup>43</sup>Mûsare niita niaja yûhû. Cohãcjû tiquiro pũthoro ijiro mûsa ijiao ijiboaga. Tiquiro pũthoro ijire apequna pehere mûsa ijiborire ohorota Cohãcjû. Apequna masa pehe tiquiro dutiro sahata yeeta. [<sup>44</sup>Ijipihtiequina tia utã bui doque queheyequinare mûta sitea wahaeta. Sa yero tia utã pehe masuno bui bora pjero mûtaa wahagû yerota tiquirore. Tiquiro pagû mûnanore daye manarigã wahagû yerota. (Sata yûhûre ño peo dueyequina yûhû buhiri dahreatiquina ñano yûhdûeta.) ] nidi Jesu pahia pũthoate, mari acaye judio masa bucuna gûhûre.

<sup>45</sup>Ti queoyere tiquiro nigû tûhoye, “Sohõ tiquiro yahu mûhtari queoye, wesere ihña ihboyequina queoye mehna marine nino niaga tiquiro”, ni tûhoturi tiquina. <sup>46</sup>Sa ni tûhotuye, tiquirore ñehe duamedí. Masa pehe Jesure ño peo, “Cohãcjû yere yahu mûhtariquiro ijire tiquiro”, niñequina ijie tiri tiquina. Tire masiñe, pahia pũthoate, bucuna mehna masare cueye, Jesure ñehedari.

### Pajiri bose deco cjê queoyere yahuahye Jesu

(Lc 14.15-24)

**22** <sup>1</sup>Sa ye pari turi queoye mehna tiquinare buhe ducari Jesu. <sup>2</sup>—Uhmûse cjãno pũthoro ijiro ahri queoye yero saha ijire. Ihcã yehpa cjãna pũthoro ijiahye. Sa yero tiquiro macuno ya deco bose deco yehye. Tiquiro omoca dũhteri bose deco ijiahye. <sup>3</sup>Sa yero pũthoro tiquiro cahacjẽnare bose decore ihñañe ahtatiquinare piji dutiro ohomahye. Tiquina pehe ahta duerahye. <sup>4</sup>Sa yero apequnare piji dutiro ohomahye tja tiquiro cahacjẽnare. “Yûhû pijioriquinare ohõ saha ni yahuya. ‘Mari ihyatire dahre tuhasari. Wecûare, wecûagã dihi tiyequinagã gûhûre wejẽ tuhasari. Sa yero ijipiltiro bose deco cjê ijiatire quehno tuhasari. Sa yena bose deco cjẽne ihyana ahtaya’, ni yahuya tiquinare”, ni ohomahye pũthoro tiquiro cahacjẽnare. <sup>5</sup>Tiquina sa yahuri bato tiquiro pijionohriquina sa tûhotu cãhye. Bose decore ihñañe wahaerahye. Ihcãquiro tiquiro ya wesepû waha wahahye. Apequro tiquiro dahrayere ihñano wahahye. <sup>6</sup>Apequna pehe tiquiro cahacjẽnare ñehe, tiquinare ñano ye, wejẽ cãhye. <sup>7</sup>Tiquina sa yegû tûhoro, pũthoro pehe usuahye. Usua, tiquina sa wejẽdi buhiri buhiri dahre dutiro tiquiro surarare ohoahye. Sa ye surara tiquinare wejẽ peho, tiquina ya macare ûjã cãhye. <sup>8</sup>Tiquina sa yeri bato, pũthoro tiquiro cahacjẽnare ohõ saha niahye: “Bose deco cjê ijiatire quehno tuhasamedí. Sa ijiepegûta yûhû pijio mûhtariquina yûhû bose decore ihñaboriquina ijierare. Ñañequina ijiri tiquina. <sup>9</sup>Sa yena macare ijie maharipû dũhse ijiequina mûsa boca sayequinare bose decore ihñatiquinare pijiya”, niahye tiquiro cahacjẽnare. <sup>10</sup>Tiquiro sa nigû tiquiro cahacjẽna maharipû waha, ijipihtiequinare tiquina boca sayequinare, ñañequina, quehnoañequina gûhûre yahuahye. Tiquina sa pijiri bato esahye tiquina pari. Quehnoano ti bose deco tiquina yeri tucûre masa wahpa yûhdûa wahahye.

<sup>11</sup>Topû tiquina dũjigû pũthoro pehe ihcãquirore omoca dũhteri deco cjã suhtirore sañeniquirore ihñahye. <sup>12</sup>“¿Ne yûhû acayû, dũhse yegû omoca dũhteri deco cjã suhtirore sañedapegûta sajã tari mûhû?” ni sinituahye pũthoro.



'Tiquiro sa sinitugũ masuno pehe yũhtierahye. <sup>13</sup>Tiquiro sa yũhtieragũ ihñano tiquiro cahacjẽnare ohõ saha niahye: “Ahriquiore omocarine dũhteya. Tiquiro dahpocãri gũhũre dũhteya. Dũhte tuhasa ne wijia, sopecahapũ cohãña tiquiore nahitianopũ. Topũ tiquiro tutuaro uti, bũjũa witiro mehna bahque dihorota”, niahye pũhtoro, ni yahuri Jesu.

<sup>14</sup>Tiquiro sa nidi bato ohõ saha ni bato tiri tiquiro:

—Ahri queoye ijero saha Cohãcjũ peyequina masa tiquiro pijioriquina ijiepetameheñequinagã tiquiro mehna tojoaeta, ni yahu bato tiri Jesu.

### Pũhtoa ye wapare apequina sinituahye Jesure

(Mr 12.13-17; Lc 20.20-26)

<sup>15</sup>Tiquiro sa nidi bato fariseo masa waha, tiquiore tiquina yahusãtire tiquina basi yahuducuahye. Tiquiro ñano yũhtigũ tũho duaye nimahye tiquiore yahusãñe tehe. <sup>16</sup>Sa yahuducuye tiquina mehna cjẽnare, Herode ya curua cjẽna gũhũre Jesure sinitu dutiye ohoahye. Tiquina pehe Jesu cahapũ wihi, tiquiore meje cũ sinitumedi:

—Buhegũ, poto yahuducugũ ni mehoñe mariegũ mũhũ ijigũ masiaja usã. Cohãcjũ yere queoro mũhũ yahugũ gũhũre usã masiaja. Sa yegũ ihcãquiropũhtoro waro ijiepegũta tiquiro gũhũre dõyaro marieno potota yahure mũhũ. <sup>17</sup>Sa yegũ usãre yahuya. ¿Roma cjũno ijipihtiequina pũhtoro yere marine wapa yero cahmeajari, mũhũ tũhotugũ? ¿Mari dutiye wapa ye dutiajari, mũhũ tũhotugũ? ni sinitumedi tiquina Jesure.

<sup>18</sup>Tiquina sa nigũ tũhoro tiquiore tiquina ñano ye duayere masino ohõ saha nidi:

—Masa ihñono dihita quehnoano iji mehona ijire mũsa. ¿Dũhsena yũhũ ñano yahuducugũ tũho duajari mũsa? <sup>19</sup>Yojoipũre niñeru cjoere pũhtoare wapa yeati cjoere ne cãhtaya. Ti cjoere ihñauhna, nidi tiquiro.

Tiquiro sa nigũ tũhoye niñeru cjoere ne cãhtari tiquina.

<sup>20</sup>Sa yero tiquiro sinituri tiquinare:

—¿Noa boro queoye wahñajari ahri cjoere? ¿Noa boro wame wahñajari? ni sinituri.

<sup>21</sup>—César, masa ijipihtiequina pũhtoro queoye, tiquiro wame gũhũ wahñare, ni yũhtiri tiquina.

Tiquina sa nigũ tũhoro Jesu yahuri:

—Ti pje pũrita masa ijipihtiequina pũhtoro yere tiquiro pehere ohoya. Cohãcjũ yere Cohãcjũ pehere ohoya, nidi Jesu.

<sup>22</sup>Tiquiro sa nigũ tũhoye, tũho maria waha, waha wahari.



(San Mateo 22.21)

**Saduceo masa Cohãcjũ tiquiro masoñene sinituahye Jesure**  
(*Mr 12.18-27; Lc 20.27-40*)

<sup>23</sup>Sa ye ti decota ihquẽquina saduceo masa Jesu cahapũ wihiri. Saduceo masa pehe “Cohãcjũ yariariquinare masosi”, ni tuhotuyequina ijiri. Sa ye ohõ saha nidi tiquina tiquirore:

<sup>24</sup>—Buhegũ, ohõ saha ni buheahye Moise: “Ihcãquiro wahmino namo tiriquireo pohna mariedaperota yariagũ ihñano tiquiro bahũrore tiquiro wahmino namono ijiricorore nũoano cahmene. Sa yero wahmino mũnano tiquiro pohna tiboriro saha pohna tiro cahmene tiquiro bahũrore. Sa ye tiquiro pohne tiquiro wahmino mũnano pohne yero saha ijeta”, ni ojoahye Moise, nidi tiquina saduceo masa.

<sup>25</sup>Tire sa ni yahu tuhaha ahri queoyere yahu nemori tiquina Jesure:  
—Ihcãquiro masũno ijiahye. Seis bahana tiahye tiquiro. Tiquina wahmino pehe namo ti, pohna mariediquiro yariaa wahahye. Sa yero apequiro tiquiro bahũro gũhũ tiquiro wahmino namono ijiricorore nũoahye. <sup>26</sup>Sa nũoari bato tiquiro wahmino yero sahata pohna mariedaperota yariaa wahahye tja. Sa yero ahriquireo bahũro tiquiro wahmino mũnano yero sahata pohna mariedaperota yariaa wahahye. Sa dihita wahahye ihcãquiro pohne waro. Ne pohna mariedapeta yaria pihtia wahahye tiquina. <sup>27</sup>Tiquina namono ijiricoro gũhũ tiquina bato yariaa wahahye. <sup>28</sup>¿Cohãcjũ ijipihtiequinare yariariquina mũnare tiquiro masogũ diquireo boro namono pehe ijiboagari ticoro? Tiquina ijipihtiequina ticorore namo tiriquireo mũna ijiahye. ¿Sa yero diquireo namono pehe ijiboagari ticoro pototi? ni sinituri tiquina.

<sup>29</sup>Jesu yũhtiri tiquinare:

—Cohãcjũ yere tiquina ojoari pũre, tiquiro masiñe gũhũre ne masiedare msa. Sa ye msa tuhutuye pehe ne poto ijierare. <sup>30</sup>Yariariquina mũna tiquina masa mũjari bato tiquina angele yero saha ijire. Namu marieñequina, manũ marieñe numia ijire topũre. <sup>31</sup>Yariariquina mũna tiquina masa wijiato pehere mũsare yahutja. ¿Cohãcjũ mũsare tiquiro nidire ne buherari msa? Ohõ saha niahye tiquiro. <sup>32</sup>“Yũhũ Abrahã, Isaac, Jacob tiquina pũhto ijiaja’, nine Cohãcjũ”, ni ojoahye panopũre. Tiquina yariari bato “Tiquina pũhto ijiaja”, ni yahuahye Cohãcjũ. Sa nieperota yariariquina mũna pũhtoro ijierare Cohãcjũ. “Tiquina pũhto ijiaja”, tiquiro niñe mehna catiequina tiquina ijigũ masiaja mari. Tiquiro catiequina pũhtoro ijire, ni yahuri Jesu tiquinare.

<sup>33</sup>Tiquiro sa ni buhegũ tuhoye peyequina masa tũho maria wahari.

**Quehnoa yũhduari dutirore yahuahye Jesu**  
(*Mr 12.28-34*)

<sup>34</sup>Sa ye saduceo masa Jesure tiquina yũhti masiedagũ tuhoye, fariseo masa pehe tiquiro cahapũ cahmecoari. <sup>35</sup>Sa yero tiquina mehna cjũno marine judio masare buheriquiro pehe Jesu tiquiro ñano nigũ tũho duaro meje cũ sinitumedi tiquirore.

36—¿Buhegü, Cohãcjũ ye dutiro quehnoa yũhduari dutiro noho pehe ijiajari, mũhũ tũhotugũ? ni sinituri tiqiro.

37 Jesu tiqirore yũhtiri:

—“Tutuario masa jeripohna mehna, masa tutuaye mehna, quehnoano masa wacũne mehna Cohãcjũre cahĩña”, nine Cohãcjũ. 38 Ahri dutirota ijire quehnoa yũhduari dutiro apeye dutiye yũhdoro. 39 Ahri dutiro bato apero dutiro quehnoa yũhdware: “Mũhũ basi mũhũ cahĩno saha mũhũ caharũ ijiyequina gũhũre cahĩña”, nine Cohãcjũ. 40 Ahri pũa dutirota apeye dutiye gũhũre masi pehogũ yere. Ahri pũa dutirore yena, ijipihtiye apeye dutiyere ye pehona niaja mari. Cohãcjũ yere yahu mũhtariquina panopũ tiquina ojoari gũhũre yena niaja mari, ni yahuri Jesu.

### **Cristo Davi mũnano pũhtoro ijire**

*(Mr 12.35-37; Lc 20.41-44)*

41 Sa ye fariseo masa topũ cahmecoãnequina tiquina ijigũ Jesu tiqinare sinituri:

42—“Cristo Cohãcjũ tiqiro ohoatiqiro ijire”, nine masa. ¿Noa boro ijiajari tiqiro ñecũno mũnano panopũ cjũno, masa tũhotugũ? nidi tiqiro.

—Cristo Davi mũnano panamino iji turiariqiro ijirota, ni yũhtiri tiquina.

Jesu yahuri:

43—¿Cristo Davi mũnano panamino iji turiariqiro tiqiro ijigũ dũhse yero Davi pehe pũhtoro tiyari Cristore? ¿Dũhse yero sa pũhtoro ti dutiyari Espĩritu Santo tiqirore? Ohõ saha niahye Davi:

44 Cohãcjũ yũhũ pũhtorore ohõ saha nidi: “Ohõpũ yũhũ poto pehepũ dujiya. Sa yegũ mũhũre ihña tuhtiyequinare mũhũre yũhdũca basatja yũhũ”, nidi Cohãcjũ yũhũ pũhtorore, ni ojoahye Davi.

45 Sa ni ojoarota Davi pũhtoro tiahye Cristore. ¿Davi Cristo ñecũno iji turiariqiro ijiro dũhse yero tiqiro pũhtoro tiyari Cristore? Cristo Davi pũhtoro ijire, ni yahuri Jesu.

46 Tiqiro sa ni yahugũ tiquina tiqirore ne yũhti masiedari. Sa ye to punota sinitu duhu cãri tiquina tiqirore. Sa ye cueye, pari turi sinituerari tiqirore.

### **Judio masare buheyequina, fariseo masa gũhũ tiquina**

**ñano yeyere yahuahye Jesu**

*(Mr 12.38-40; Lc 11.37-54; 20.45-47)*

# 23

<sup>1</sup> Sa ye peyequina masare, usã gũhũre Jesu yahuri tja.

<sup>2</sup>—Marine judio masare buheyequina fariseo masa gũhũ Cohãcjũ dutiye Moisere tiqiro cũrire yahuequina ijire tiquina. <sup>3</sup> Tiquina sa yahuequina ijigũ masare tiquina yahuriro sahata tire ye pehoya masa. Sa yepenata tiqinare ihña cũedacãhña masa. Tiquina buheriro sahata yerare tiquina. <sup>4</sup> Masare peye dutire tiquina. Sa dutiepetã tiquina dutiro saha masa yeragũ ihñañe tiqinare

yedohoerare. <sup>5</sup>Masa tiquina ihñono dihita quehnoano ye ihñomene tiquina. Cohãcjũ yere tiquina ojoari pũre tiquina duhu sãne acarigãre, bujũ cjũne acarigãre tiquina wũhdoa bui dũhte yori, masare ihña dutiye. Tiquina omocari gũhũre dũhte yori. Sa ye tiquina suhti tu pjeri da bui tiquina ohõri da eh̄sa yũhdũari da ijire. Cohãcjũre tiquina ño peorire masa pehere ye ihñõne nimene tiquina. Ti queoro ijierare tiquina sa ye ihñõne. <sup>6</sup>Sa ye bõse decori ijigũ puhto tiquina dujyepũ duji duare. Sa ye judio masa mari buheye wũhũsepũ gũhũre quehnoañe dujiye pahtari dihitare cahmene tiquina. <sup>7</sup>Sa ye doeri cjẽ duaropũ apeqũna puhtoare quehnoano ño peo tiquina sinino saha tiquina piti cagũ cahmene tiquina. Tiqũnare “Buhegũ”, masa tiquina ni pisugũ cahmene.

<sup>8</sup>Apeqũna mũsare pisuye “Buhegũ”, niedacãhdo. Mũsa ijipihtina ihcãno saha ijina nine. Sa yegũ mũsare buhegũ ihcũta ijijaja. <sup>9</sup>Sa yena ahri yehpa cjẽnare “Mari pacũ”, nina tiqũnare ño peona niaga. Ne sa niedacãhña. Ëhmũse cjũno dihita mari Pacũ ijire. Tiqũro dihitare ño peoro cahmene marine. <sup>10</sup>Sa yena masũnore “Puhto”, niedacãhña. Mũsa puhto yũhũ Cristo pehe ihcũta ijijaja. <sup>11</sup>Cahacjũno yero saha mũsare yedohoriquiro tiqũro ijire masa puhtoro ijiatiquiro. <sup>12</sup>Ihcãquiro puhtoro iji duaro tiqũrore ihyo ijiriquiro yero saha ijiro cahmene. Sa yero “Thyo ijigũ ijijaja yũhũ”, ni tuhoturiquiro pehe puhtoro ijirota, ni yahuri Jesu.

### **Judio masare buheyequina, fariseo masa mehna tiquina ni mehoñene yahuahye Jesu**

<sup>13</sup>Tiqũro sa nidi bato tiqũnare yahu nemori:

—Mũsa judio masare buhena, fariseo masa gũhũ ñano yũhdũnata. Masa ihñono dihita quehnoano iji mehona ijire masa. Sijoro saha masa buhegũ tuhoye masa pehe Cohãcjũ puhtoro ijirõpũre wahasi. Mũsa gũhũ topũre wahasi. Sa yena topũre waha duayequinare cahmotare masa.

[<sup>14</sup>Mũsa judio masare buhena, fariseo masa gũhũ ñano yũhdũnata. Masa ihñono dihita quehnoano iji mehona ijire masa. Wape wiha numia ye wũhũsere tiquina cũoye gũhũre ehmare masa tiquina numiare. Sa yena yoari pje masa ihñonõpũ Cohãcjũre sini ihñomene masa masare. Mũsa sa yeri buhiri peyequina yũhdũoro Cohãcjũ buhiri dahrerota mũsare.]

<sup>15</sup>Mũsa judio masare buhena, fariseo masa gũhũ ñano yũhdũnata. Masa ihñono dihita quehnoano iji mehona ijire masa. Pajiri mapũ pehã, yoaro cjẽ yehparipũ wahare masa, masa dutiyere yeatiquirore macana tana. Mũsa dutiyere yeatiquirore boca, tiqũrore buhere. Mũsa sa yegũ tiqũro pehe masa yũhdũoro pecapũ wahatiquiro ijirota.

<sup>16</sup>Mũsa ñano yũhdũnata. Caperi bajueyequina tiquina ihña masieno saha masiena ijire masa. Sa ijiepenata apeqũnare buhemene masa. Ohõ saha ni buhemene masa: “ ‘Cohãcjũ wũhũ mehna yũhũ nino sahata yeitja’, nidiquiro, tiqũro nidiro sahata yerapegũta quehnoanota”, ni buhemene masa. “ ‘Cohãcjũ ya wũhũ cjẽ uru mehna yũhũ nino sahata yeitja’, nidiquiro tiqũro pehere tiqũro nidiro sahata ye sohtori tiro cahmene”, ni ti gũhũre buhemene masa. <sup>17</sup>Caperi

bajueyequina tiquina ihña masieno saha masiena ijire m̄sa. T̄ho masiena ijire. ¿Dise boro pehere ño peoro cahmeajari? Urupe ño peoraro cahmene. Cohãcjũ pehe ti uru ti w̄h̄w̄p̄ ijigũ quehnoañe ijigũ yere tire. Sa yena ti w̄h̄w̄ pehere ño peoro cahmene m̄sare. Sa ye m̄sa buheye pehe queoro ijierare. <sup>18</sup>Ahri gũh̄w̄re buhemene m̄sa: “Cohãcjũ w̄h̄w̄ c̄jã altar mehna yũh̄w̄ nino sahata yeitja’, nidiquiro tiquiro nidiro sahata yeragũ quehnoanota”, ni buhemene m̄sa. “Ti altar bui ijieye mehna Cohãcjũre tiquina ohori mehna yũh̄w̄ nino sahata yeitja’, nidiquiro tiquiro pehere tiquiro nidiro sahata ye sohtori tiro cahmene”, ni buhemene m̄sa. <sup>19</sup>Caperi bajueyequina tiquina ihña masieno saha masiena ijire m̄sa. ¿Dise boro pehe ti waro ijiajari, m̄sa t̄hotugũ? Cohãcjũre mas̄no tiquiro ohori ti waro ijiera cjũre. Ti altar bui Cohãcjũre tiquiro ohogũ, quehnoañe wahare ti altar bui ijieye. Sa yero ti altar pehe ihyo ijiri altar ijierare. Cohãcjũre tiquina ohori bui cjũnogã quehnoari altar ijire. <sup>20</sup>Sa yero “Cohãcjũ w̄h̄w̄ c̄jã altar mehna yũh̄w̄ nino sahata yeitja’”, ihcãquiro nino, ti altar bui cjẽ tiquiro ohori mehna sa nino niaga. Sa ye m̄sa buheye pehe queoro ijierare. <sup>21</sup>Sa yero “Cohãcjũ w̄h̄w̄ mehna yũh̄w̄ nino sahata yeitja’”, ihcãquiro nino, potota Cohãcjũ mehnata sa ninota niaga. Cohãcjũ ti w̄h̄w̄ cjãno ijire. <sup>22</sup>Sa yero “Uhm̄se mehna yũh̄w̄ nino sahata yeitja’”, ihcãquiro nino, Cohãcjũ ijirop̄ mehnata sa nino niaga. Sa yero Cohãcjũ mehnata sa nino niaga. Tiquiro pehe to cjũno ijire. Sa ye m̄sa buheye pehe queoro ijierare.

<sup>23</sup>M̄sa judio masare buhena, fariseo masa gũh̄w̄ ñano yũhd̄nata. Masa ihñono dihita quehnoano iji mehona ijire m̄sa. Moa yero saha ijieye ihyayere ocagũ yeyere c̄ona mehenogã ohomene m̄sa. Cohãcjũre ño peona tana pahiare ohomene m̄sa. Mehenogã ohomene m̄sa. Menta, anís, comino wame tiye ocagũ yeyere ohomene m̄sa. Sa ohoopenata quehnoañene yerare m̄sa. Sa yena masare paja ihñedare m̄sa. Sa yena Cohãcjũre wacũ tutuerare m̄sa. Oteye ducare m̄sa nedire mehenogã pahiare m̄sa ohogũ quehnoare. Sa ohona ohõ saha ye nemoña: Quehnoañene yeya. Sa yena paja ihñaña masare. Sa yena Cohãcjũre wacũ tutuaya. <sup>24</sup>Caperi bajueyequina tiquina ihña masieno saha masiena ijire m̄sa. Ohõ saha yere m̄sa: M̄sa ye dutiyere ye dutina, ihyo ijieyegã warore dutiyere yere m̄sa. Sa yepenata Cohãcjũ pototi tiquiro dutiye warore yerare m̄sa.

<sup>25</sup>M̄sa judio masare buhena, fariseo masa gũh̄w̄ ñano yũhd̄nata m̄sa. Masa ihñono dihita quehnoano iji mehona ijire m̄sa. M̄sa waparire, m̄sa sihniñe wajarire bui m̄sa cosero saha quehnoañene ye ihñore m̄sa buigã warona. Sa yepenata Cohãcjũ yere queoro yerare m̄sa. Apequina yere ehmana, m̄sa basi dihita buj̄yere ne duana ijire m̄sa. Sa dihita t̄hoture m̄sa. <sup>26</sup>Caperi bajueyequina tiquina ihña masieno saha masiena ijire m̄sa fariseo masa. M̄sa jeripohnarine comesaya m̄sa. Quehnoañe pehere yeya. M̄sa sa yena masa tiquina ihñonop̄ quehnoana ijinata m̄sa.

<sup>27</sup>M̄sa judio masare buhena, fariseo masa gũh̄w̄ ñano yũhd̄nata. Masa ihñono dihita quehnoano iji mehona ijire m̄sa. Masa cope, yehseye mehna tiquina wisõri cope yero saha ijire m̄sa. Masa ti copere tiquina ihñagũ quehnoari cope bajure. Sa bajuepegũta, puhiap̄ ahbariquirore, tiquiro cohãrine, ñañene

ihñedare tiquina. <sup>28</sup>Sata mûsa gũhu masa ihñonopũ quehnoañequina yero saha bajumene mûsa. Sa quehnoañequina yero saha bajuna mûsa ijiepegũta mûsa tuhotyepũ ñaãe, ni mehoñe jji yũhdũare ahbaye yero saha, ni yahuri Jesu.

**Judio masare buheyequina, fariseo masa gũhũre  
tiquiro buhiri dahreatire yahuahye Jesu**

<sup>29</sup>Sa ni tuhasa ohõ saha ni yahu nemori tiquinare:

—Mûsa judio masare buhena, fariseo masa gũhu ñano yũhdũnata.

Masa ihñono dihita quehnoano jji mehona ijire mûsa. Cohãcjũ yere yahu mũhtañequina panopũ cjẽna tiquina masa coperire quehnoano quehnomene mûsa, tiquinare ño peoro saha yena. Sa yena quehnoano yeyequina mûna tiquina queoyere mûsa yeri queoyere quehnoano quehnomene mûsa. <sup>30</sup>Sa yena ohõ saha niducumene mûsa: “Panopũre usã ñecũsumũa jji turiayequina mûna tiquina yeriro saha usã pehe yeraboaga. Ti p̄jerp̄ ijieyeyequinare Cohãcjũ yere yahu mũhtariquinare usã wejẽdaboaga”, niducumene mûsa. <sup>31</sup>Sa nina mûsa ñecũsumũa jji turiayequina Cohãcjũ yere yahu mũhtariquinare wejẽdiquina mûna tiquina yerire ihñona nine. Tiquinare wejẽdiquina mûna tiquina panamena jji turiana mûsa ijieye gũhũre ihñona nine mûsa. <sup>32</sup>Mûsa ñecũsumũa jji turiayequina mûna tiquina yeriro sahata ye sohorti ticũnahña.

<sup>33</sup>Añaã yero saha ña yũhdũana ijire mûsa. Mûsa ñaãe yerire bujua witi duerana Cohãcjũ mûsa ñaãe buhirire pecapũ mûsare tiquiro cohãto pano duhti masiedare mûsa. <sup>34</sup>Sa yegũ mûsare niita niãja. Cohãcjũ yere yahu mũhtariquinare, apequina quehnoano masiñequinare, apequina mûsare buheatiquinare mûsa cahapũ ohoutja. Yũhu sa ohogũ mûsa pehe ihquẽquina tiquinare wejẽnata. Apeyeyequinare curusapũ quẽ bihanata. Apeyeyequinare mûsa buheye wũhũsepũ tananata. Sa yena macaripẽpũ tiquinare ñano yena, oma nũnũ tãnata mûsa. <sup>35</sup>Mûsa sa yena ijipihtiyequina ñaãe marieñequinare mûsa wejẽdi buhiri buhiri tinata. Abe mũnanore Caĩ wejẽdi buhiri ijipihtina mûsa gũhu buhiri tinata. Ijipihtiyequina tiquiro bato ijieyeyequinare quehnoañequinare tiquina wejẽdi buhiri gũhũre buhiri tinata mûsa gũhu. Sa yena Cohãcjũ wũhũ cahapũ wahiquinare mûsa ohori altar cahapũ Zacariare wejẽahye mûsa. Tiquiro pehe Berequia macũno ijiahye. Sa yena tiquiro gũhũre mûsa wejẽdi buhiri buhiri tinata mûsa. <sup>36</sup>Ijirota mûsare yahuguta niãja. Tiquina ijipihtiyeyequinare tiquina wejẽdi buhiri yojopũ cjẽna gũhu buhiri tieta, ni yahuri Jesu.

**Jerusalẽ cjẽnare tutuaro cahĩahye Jesu**

*(Lc 13.34-35)*

<sup>37</sup>Sa ni tuhasa ohõ saha ni nemori:

—Ahyou, Jerusalẽ cjãna, Cohãcjũ yere yahu mũhtariquinare wejẽdina ijire mûsa. Mûsa acaye panopũ cjẽna gũhu sata yeyequina mûna ijiahye. Sa yena mûsa cahapũ tiquiro ohoriquinare utã paca mehna doque wejẽdina ijire mûsa. Canaca ticoro pohnene ticoro wũye dũpũri mehna ticoro moha cuñano saha

peye tahari cahiducumi musare. Musare cahmemi. Musa pehe yuhure ne cahmedari. <sup>38</sup>Yojopu musa ya maca cohōri maca ijirota. <sup>39</sup>Ijirota musare niita niaja. Caperu ahtautja yuhu. Sa yuhu ahtagu ihnana musa yuhure “Cohācjū tutuaye mehna ahtariquiro quehnoahdo”, ninata. Yuhure musa tire niato pano yuhu tojoa tato pano pari turi yuhure ihnasi musa, nidi Jesu tiquinare.

—Cohācjū wuhu cohāri wuhu ijirota, niahye Jesu

(Mr 13.1-2; Lc 21.5-6)

**24** <sup>1</sup>Sa ye Cohācjū wuhuru ijiriquiro Jesu tiquiro wijia wihigū usā tiquiro buhena ti wuhure ti wuhu cahapu ijiye wuhuse gūhure ihnana, —Quehnoa yuhduye wuhuse ijicjoare. Ihnana muhu gūhu, nii usā tiquirore. <sup>2</sup>Jesu yuhtiri:

—Ahri wuhusere yojopure ihnamene musa. Musare yahuguta niaja. Ahri wuhusere ijiphihiye musa ihnari, ahri wuhuse cje utā paca gūhure cohā pehoeta. Ne ihcāria utā tojoasi, nidi tiquiro usāre.

**Pihtiari deco ijiatire yahuahye Jesu**

(Mr 13.3-23; Lc 21.7-24; 17.22-24)

<sup>3</sup>Came Olivo wame tidu canapu esa, topu dujiri Jesu. Topu dujigū usā tiquiro buhena usā sehsharo tiquiro cahapu esau.

—Yahuya usāre. ¿Duhse ijigū sa waharotari muhu nidiro saha waharo? ¿Ahri yehparu muhu tojoa tati deco, pihtiati deco panogā ijigū duhse ti waha ducagū ihnanatari usā? ni sinituu usā.

<sup>4</sup>Jesu yuhtiri:

—Quehnoano yeya musa. Sa yena musare apequina tiquina ni mehoñene tuhoeracāhña. <sup>5</sup>Peyequina masa “Cristo ijiaja yuhu”, ni mehoñequina ahtaeta. Tiquina sa ni mehogū tuhoye peyequina masa Cohācjū yere duhueta. <sup>6</sup>Musa cahagāpu masa apequina tiquina cahme wejēgū tuhonata musa. Sa yena yoropu gūhure tiquina cahme wejēgū tuhoonata musa. Sa tuhoopenata ne tire pajiro wacūedacāhña. Sa waharota. Tiquina sa yegū pihtiati deco duhsarīnata. <sup>7</sup>Ti pjere ihcā yehpa cjenā ape yehpa cjenā mehna cahme wejēeta. Sa ye ihcāquiro puhtoro yequina apequiro puhtoro yequina mehna cahme wejēeta. Sa ye peyequina masa ujuā mehna yarieta. Sa yero peye yehparipu yehpa nuhminota. <sup>8</sup>Sa wahagū ahri yehpa cjenare tiquina nāno yuhdu nemoato duhsarota ti pjere. Nāno yuhdu nemoeta.

<sup>9</sup>Ti pjere apequina musare ñehe, nāno ye dutiye ohoeta musare apequina puhtoapure. Tiquina sa ohogū musare wejēeta. Yeequina musa ijiri buhiri ijiphihiyequina musare ihña tuhtieta. <sup>10</sup>Ti pjere peyequina yeequina ijimediquina yuhure cohāeta. Sa ye tiquina mehna cjenare tiquina ihña tuhtieta. Sa ye tiquina mehna cjenā tiquina ijiepegūta tiquinare nāno yeatiquinare ohoeta tiquina. <sup>11</sup>Ti pjere peyequina “Cohācjū yere yahu muhtana ijiaja”, ni mehoñequina ijietā. Sa ye peyequina masa tiquina ni mehoñene

tũhoeta. <sup>12</sup>Ti pjere ña yũhũaro yeeta masa. Sa ye tiquina mehna cjenare cahĩ nemosi. <sup>13</sup>Sa yena mũsa tutuana ijina, ahri yehpapũ mũsa catinino puno ihcãno sahana, yũhdũnata mũsa. <sup>14</sup>Sa yero ahri quehnoañe buheye ijipihtiropũ ahri yehpapũre tiquina yahuri buheye ijirota. Cohãcjũ puhtoro ijiyere yahuri buheye tiquina yahu siteri buheye ijirota, ijipihtiyequina ti buheyere tiquina masiato saha. Tiquina sa yahuri bato pihtiri deco dũcarota.

<sup>15</sup>Cohãcjũ yere yahu muhtariquiro Daniel mũnana panopũ cjenõ ña yũhdũariquirore Cohãcjũ yere ñano yeriquirore yahue tiahye panopũre. Ti pjere tiquiro ñariquiro pehe Cohãcjũ ya wũhũpũ tiquiro ducugũ ihñanata mũsa. Ahri yũhũ nidire quehnoano masiña mũsa. <sup>16</sup>Topũ tiquiro ducugũ ihñañe, Judea yehpapũ ijiyequina pehe cũnũ cahapũ oma duhtiahro. <sup>17</sup>Sojaro mehna oma duhtiahro. Ti pjere tiquina wũhũseri bui cjẽ paaripũ ijiyequina wũhũ puhiapũ ijiyere tiquina yere neñe wahaeracãhdo tiquina mũmũñano waharo. <sup>18</sup>Sa ye ti pjere apequina weseripũ ijiyequina tiquina bui cjẽ suhti wũhũpũ ijyie suhtire neñe wahaeracãhdo tiquina mũmũñano waharo. <sup>19</sup>Ti pjere niji pacosãnumia, tiquina pohnene apũoñe numia gũhũ pejecũoro wahaeta. <sup>20</sup>Sa yena Cohãcjũre ohõ saha ni siniña: “Pohecu ijigũ judio masa usã soye decori ijigũ gũhũre usã oma duhtiati deco ijieracãhdo”, ni siniña mũsa Cohãcjũre. <sup>21</sup>Ti decorire masa ña yũhũaro wahaeta. Ahri yehpare tiquiro bajumehnedi bato masa ñano yũhdũe tiahye. Tiquina sa yũhdũepẽgũta ijipihtiyẽ ti puriñe yũhdũoro pihtiri deco panogã ña yũhdũaro yũhdũeta masa. Sa ñano tiquina yũhdũeri bato pari turi sata ñano yũhdũsi ahri yehpapũ. <sup>22</sup>Cohãcjũ ti decorire meheñe decorigã ijigũ yerota. Tiquiro sa yeragũ ne ihcãquiro masũno yũhdũeraboaga. Sa yero tiquiro beseriquina tiquina yũhdũatire meheñe decorigã cũnota Cohãcjũ.

<sup>23</sup>Ti pjere apequina mũsare “Ihñaña. Ohõpũ ijire Cristo”, tiquina nigũ tiquinare tũhoeracãhña. “Topũ ijire Cristo”, tiquina nigũ tiquinare tũhoeracãhña. <sup>24</sup>“Cristo ijiaja”, ni mehoñequina, “Cohãcjũ yere yahu muhtarina ijiaja”, ni mehoñequina ijietã ti pjere. Sa ye Cohãcjũ tiquiro beseriquinare ni mehoñe, tiquina bajumehneñene ye ihñoeta. Cohãcjũ yequinare Cohãcjũre tiquina cohãgũ ye duare tiquina ni mehoñequina. <sup>25</sup>Ahri ijipihtiyere yahuyujaja mũsare ti sa wahato pano. Sa yena tũhoya mũsa. <sup>26</sup>Apequina masa mũsare “Ihñaña. Masa marienopũ ijire Cristo”, tiquina nigũ topũre ihñana wahaeracãhña. Sa yena “Ohõpũ ahri tucũripũ ijire tiquiro”, tiquina nigũ tiquinare tũhoeracãhña. <sup>27</sup>Yũhũ masũ Cohãcjũ ohorigũ wacũeno mehna tojoa tautja. Upo miadoqueoro uhmũsere asũ mũja taropũ, asũ sajãnopũ wacũeno mehna ti miadoqueoro saha wacũeno mehna tojoa tautja yũhũ. <sup>28</sup>Masa tiquina ñañe yeducurirorpũ topũ Cohãcjũ tiquina ñañe buhiri buhiri dahrerota tiquinare, ni yahuri Jesu.



**Cristo ahri yehpapu tiquiro tojoa tatire yahuahye tiquiro**  
*(Mr 13.24-37; Lc 21.25-33; 17.26-30, 34-36)*

<sup>29</sup>Sa ye tiquinare yahu nemori:

—Ti ñano yuhduye decori bato asū deco cjūno, ñami cjūno gūhu buhrio duhueta. Tiquina sa wahagū ñahpicoha paca uhmusepū ijiye paca bora dijia taeta. Sa ye uhmuse cjē yehpari, ñahpicoha gūhu ti sa wahaducurore comesaeta. Sa ye ñuhmieta. <sup>30</sup>Ti pjeta yūhu masu Cohācjū ohorigu uhmusepū yūhu bajumehnenore yūhu ihñogū ihñaeta masa. Sa ye ijipihtiye cururi cjēna utieta. Sa yegu yūhu tutuaye mehna, yūhu asi siteye mehna uhmūano cjē ehmeo cururi bui ahri yehpapure yūhu tojoa tagū ihñaeta tiquina. <sup>31</sup>Corneta bisirota. Sa yegu yeequina angelere ijipitiropū ahri yehpapū ohoutja yūhu. Sa ye ijipitiropū yeequina yūhu beseriquinare tiquina neeta.

<sup>32</sup>Yojopure higeragure tūhotuya mūsa. Tū queoye mehna mū sare buheitja. Tū yucūgu pūri tigū ihñana, cūhma mehenogā dūhsagū masine mūsa. <sup>33</sup>Sata ahri ijipihtiye yūhu nidire ti sa wahagū ihñana, yūhu tojoa tato mehenogā ti dūhsagū masinata mūsa. <sup>34</sup>Ijirota niita niaja mū sare. Ti pje cjēna tiquina yariato pano ijipihtiye yūhu nidiro sahata sa waharota. Uhmuse, ahri yehpa gūhu pihtia waharota. <sup>35</sup>Yūhu yahuducuye pehe ne comesasī. Ijipihtiye yūhu nidiro sahata sa waha sohtori tirota.

<sup>36</sup>Ti decore yūhu tojoa tati decore, ti hora gūhure masiedaja yūhu. Angele gūhu tire masiedare. Masa gūhu masiedare. Yūhu Pacū dihita tire masine.

<sup>37</sup>Noé tiquiro ijiri pje cjēna tiquina ijiriro sahata ahri yehpapū yūhu tojoa tato panogāre sata ijieta masa. <sup>38</sup>Yehpa miniato pano masa ihya, sihni, yeahye. Sa yeye umūa, numia mehna omoca dūhteahye. Noé gūhu yucūsapū tiquina sajāto pano sa yee timahye masa. <sup>39</sup>Duita tutuaro acoro ahta, wacūeno mehna yehpa minia wahahye. Masa gūhu mini pihtia wahahye. Wacūeno mehna tiquina minidiro saha yūhu masu Cohācjū ohorigu ahri yehpapure wacūeno mehna tojoa tautja. <sup>40</sup>Ti pjere wesepū pūaro dahrayequina ijigū ihcāquiro yūhure cahmediquirore neitja. Sa yero yūhure cahmeediquiro topū tojoarota. <sup>41</sup>Ti pjere pūaro numia ihcānopū tiquina trigore ña mūtoñequina numia ijigū ihcācoro yūhure cahmedicorore neitja. Sa yero yūhure cahmeedicoro topūta tojoarota.

<sup>42</sup>Quehnoano wacū masi cohteya. Yūhu mūsa pūhto, yūhu tojoa tati decore ne masiedare mūsa. <sup>43</sup>Ahrire wacūña. Yaqueriquiro wūhūpū tiquiro sajā yaqueato panore wūhū upūro masino, ti ñami tiquiro cariedaboaga, yaqueriquirore cohtero. Sa yero yaqueriquirore tiquiro ya wūhūpū sajā dutieraboaga. Yaqueriquiro tiquiro wacūeno mehna tiquiro ahtariro saha wacūeno mehna ahtautja yūhu. <sup>44</sup>Sa yena yeere sa yeducuna yūhure cohteya. Yūhu masu Cohācjū ohorigu ahri yehpapū tojoa tagū wacūeno mehna ahtautja, nidi Jesu.

**Apequiro dahra cohteriquiro tiquiro puhtorore ño peo,  
apequiro ño peerare  
(Lc 12.41-48)**

<sup>45</sup>Sa ye Jesu queoye mehna ohõ saha ni buhe nemori tja:

—Dahra cohteriquiro tiquiro puhtorore ño peoriquiro tũho masiniquiro ijire. Tiquiro sa ijigũ ihñano apequina dahra cohteyequina bui cũre tiquirore tiquiro puhtoro pehe waharo taro. Sa tiquirore cũ tuhasa wahaa wahare puhtoro. Sa yero ihyari pje ijigũ dahra cohteriquiro apequinare ihyayere itire. <sup>46</sup>Came puhtoro tiquiro ya wũhũpũ tojoa wihire. Tiquiro tojoa wihigũ ihñano dahra cohteriquiro pehe tiquiro puhtoro dutiriro sahata ye pehoriquiro ijiro, bucueriquiro ijirota. <sup>47</sup>Ijirota musare niita niaja. Tiquiro sa yegũ ihñano tiquiro puhtoro ijipihtiyee tiquiro yere ihña ihboriquiro cũnota tiquirore. <sup>48</sup>Sa yepegũta ñariquiro dahra cohteriquiro pehe “Yũhũ puhtoro bajuerare”, nino, <sup>49</sup>apequina dahra cohteyequinare quẽpe, pajiro ihya, sihni, queheyequina mehna queherota. <sup>50</sup>Came tiquiro puhtoro wacũeno mehna tojoa tarota. Ti deco, ti hora gũhũre ne masiedare dahra cohteriquiro. <sup>51</sup>Puhtoro pehe tojoa taro ñariquiro tiquiro ñano yerire tũhoro, tiquirore tutuaro buhiri dahrerota. Sa yero ni mehoñequina tiquina waharopũ cohãnota tiquirore. Topũre tiquiro tutuaro uti, bũjũa witiro mehna bahque dihorota, ni yahuri Jesu.

**Pũa omope numia queoye mehna buheahye Jesu**

**25** <sup>1</sup>Sa ye Jesu pari turi queoye mehna ohõ saha ni buhe nemori tja: —Uhmũse cũno puhtoro tiquiro ijiiye ahri queoye yero saha ijire: Pũa omope numia ijiahye. Ihcã ñami tiquina sihõne paca mehna omoca dũhteatiqirore piti caye wahahye. <sup>2</sup>Tiquina mehna ihcã omope numia tũho masieñequina numia ijiahye. Apequina numia pehe ihcã omope numia tũho masieñequina numia ijiahye. <sup>3</sup>Tũho masieñequina numia pehe tiquina sihõne pacare, pose tiye pacare nemahye. Apee pacare uñse pose tiye pacare ti pihtigũ tiquina pioborire nedahye. <sup>4</sup>Tũho masieñequina numia pehe tiquina sihõne paca uñse pose tiye pacare neahye. Apee paca tiquina pioati paca gũhũre neahye. <sup>5</sup>Sa ye omoca dũhteatiqiro tiquiro bajueragũ tiquina numiare wũjũa purigũ carĩa wahahye. <sup>6</sup>Sa yero ñami decopũ sañuducugũ tũhoahye. “Tũhoya. Omoca dũhteatiqiro ahtaro ca tare. Tiquirore piti cana ahtaya”, ni sañuducugũ tũhoahye. <sup>7</sup>Tiquiro sa nigũ tũhoye numia wahcã, tiquina ye sihõne pacare quehnoahye. <sup>8</sup>Sa ye tũho masieñequina numia pehe apee numia tũho masieñequina numiare ohõ saha niahye: “Uñsã sihõne paca yatiro nine. Sa yena mehenogã musa ye uñsere ohoya uñsãre”, ni sinimahye tiquina numia. <sup>9</sup>Tiquina sa siniepegũta tũho masieñequina numia ohõ saha yũhtiahye: “Uñsã ye uñse mari ijipihtinare esa tuhaeraboaga. Sa yena uñse cũoyequinare musa basi dũna wahaya”, ni yũhtiahye tũho masieñequina numia pehe. <sup>10</sup>Sa ye tũho masieñequina numia dúye wahahye. Tiquina sa wahari bato omoca dũhteatiqiro wihiahye.

Tiquiro wihigũ ihña tiquina yere quehno tuhasariquina numia tuho masiñequina numia tiquirore piti cahye. Piti ca bose deco omoca dũhteri decopũ tiquiro mehna ihñañe wahahye. Sa ye bose decore tiquina yeri wũhũpũ apequina mehna numia tiquina sajãri bato, sopecahare biha cãhye. <sup>11</sup>Camepũ tuho masiñequina numia pehe wihimahye. “Pũhto, usãre pũohña”, nimahye tiquina numia. <sup>12</sup>“Ijirota musare niita niaja. Musare masiedaja yũhũ”, niahye tiquiro tiquina numiare.

<sup>13</sup>Sa yena tuho masiñequina numia tiquina yere quehnoano quehno tuhasa, tiquina cohteriro saha quehnoana, ñaño mariena iji, cohteya musa gũhũ. Yũhũ tojoa tati decore ti hora gũhũre ne masiedare musa, ni yahuri Jesu.

### Niñeru cjoeri uru cjoeri queoyere yahuahye Jesu

<sup>14</sup>Sa ni yahu tuhasa queoye mehna ohõ saha ni buhe nemori tja:  
—Ti pjere yũhũ tojoa tati pje ahri queoye yero saha ijirota. Wũhũ upũro ijiyahye. Tiquiro ape siepũ tinino waharo taro, tiquirore dahra cohteyequinare pijioahye. Sa yero tiquinare tiquiro yere cohte dutiahye.

<sup>15</sup>Sa cohte dutiro tiquina ihbo masino puno tiquinare niñeru cjoerire ohoahye. Ihcãquirore ihcã omope cjoeri wapa bũjũye cjoerire uru cjoerire ohoahye. Apequirore pũa cjoer ohoahye. Apequirore ihcã cjoer ohoahye. Tiquinare oho tuhasa, wahaa wahahye. <sup>16</sup>Sa ye ihcã omope cjoeri tiquiro ohoriquiro duita tiquiro wahari batota ti cjoeri mehna apee borore dúahye. Tiquiro dúrire apequinare duahye. Tiquiro duari wapa pũa omope cjoeri wapa yeahye tiquirore. Sa yero pũa omope cjoeri cũoahye. <sup>17</sup>Sa yero pũa cjoer tiquiro ohoriquiro duita tiquiro wahari batota ti cjoeri mehna apee borore dúahye. Tiquiro dúrire apequinare duahye. Tiquiro duari wapa pititia cjoer wapa yeahye tiquirore. Sa yero pititia cjoer cũoahye. <sup>18</sup>Ihcã cjoere tiquiro ohoriquiro pehe cope sehe, ti cjoere yahye, ti coperpũ nũono.

<sup>19</sup>Came yoari bato tiquina pũhtoro wihiahye. Sa wihiro tiquiro niñeru cjoeri mehna tiquina ñehe nemorire queoro ahtaro tiquirore dahra cohteyequinare pijioahye. <sup>20</sup>Sa yero ihcã omope cjoeri tiquiro ohoriquiro pũhtoro cahapũ esa, pũa omope cjoeri wiahye tiquirore. “Ihcã omope cjoeri yũhũre ohori mũhũ. Ihñaña. Ti cjoeri mehna apeye cjoerire ñehe nemou”, niahye tiquirore. <sup>21</sup>“Quehnoano yeaya mũhũ. Mũhũ quehnoagũ, yũhũ dutiriro saha yerigũ ijire. Mehenoğãre quehnoano yeaya mũhũ. Sa yegũ yojopũre mũhũre pajiro mũhũ dahratire cũtja. Sa yegũ yũhũ mehna bucueya mũhũ”, niahye tiquiro pũhtoro. <sup>22</sup>Sa yero pũa cjoere ñehediquiro pũhtoro cahapũ esa, yahuahye tiquirore: “Pũa cjoer yũhũre ohori mũhũ. Ihñaña. Ti cjoeri mehna apeye cjoeri pũa cjoer ñehe nemou”, niahye tiquiro. <sup>23</sup>“Quehnoano yeaya mũhũ. Mũhũ quehnoagũ, yũhũ dutiriro saha yerigũ ijire. Mehenoğãre quehnoano yeaya mũhũ. Sa yegũ yojopũre pajiro mũhũ dahratire cũtja. Sa yegũ yũhũ mehna bucueya mũhũ”, niahye tiquiro pũhtoro.

<sup>24</sup>Sa yero ihcã cjoere ñehediquiro pũhtoro cahapũ esa, yahuahye tiquirore: “Pũhto, mũhũ apequina pehere tutuaro dahra dutigũ ijire. Sa tutuaro dahra dutigũ ijigũ mũhũ basi oterapegũta ti dũcare nene mũhũ. <sup>25</sup>Mũhũ sa ijigũ mũhũre cuei. Sa cuegũ cope sehe, ti coperpũ mũhũ niñeru cjoere nũou. Ihñaña. Ohõpũ

ijire mûhu ya cjoe niñeru cjoe”, niahye tiquiro. <sup>26</sup>“Mûhu ñagu, cape bujugu ijire. Yûhu basi oterapeguta ti ducare yûhu negu ijigû masine mûhu. <sup>27</sup>Yûhu sa ijigû ihñaeppeguta yûhu niñeru cjoere niñeru ihbori wûhuru ihboyoaya mûhu. Mûhu sa ihbogû tiquina ti cjoere wiayepu apee niñeru oho nemoboaya tiquina”, niahye puhtoro tiquirore. <sup>28</sup>Sa nino apequina tiquiro dahra cohteyequinare dutiahye tiquiro: “Niñeru cjoere ehmaña tiquirore. Pua omope cjoerire cuoriquiro pehere ohoya. <sup>29</sup>Cuoyequinare oho nemoutja. Sa ye pajiro cuoeta. Cuoyequina pehere mehenogã tiquina cuoeppeguta tire ehmautja. <sup>30</sup>Ahriquiro dahra cohteriquiro dahseatiquiro ijierare. Nahitianopu ñanopu cohã cãhña tiquirore. Topu tiquiro tutuaro uti, bujua witiro mehna bahque dihorota”, niahye puhtoro, ni yahuri Jesu.

### Buhiri dahreatire yahuahye Jesu

<sup>31</sup>Sa ye Jesu yahu nemori:

—Yûhu masu Cohãcjû ohorigu ijiphtiyequina angele mehna puhto ijigu tagu, yûhu puhtoro dujiropu yûhu asi siteye mehna dujigutja. <sup>32</sup>Sa yûhu dujigû, ahri yehpa cjëna ijiphtiyequina yûhu cahapu cahmecoata. Tiquina sa cahmecoari bato pua curua tu waitja tiquinare. Ovejare ihña ihboriquiro ovejare, cabra gûhure tiquiro tu wariro saha masare tu wa docoutja. <sup>33</sup>Sa tu wagu oveja yero saha ijiequinare quehnoañequinare yûhu poto pehe bese docoutja. Sa yegu cabra yero saha ijiequinare ñañequinare yûhu cû pehe peheru bese docoutja. <sup>34</sup>Yûhu sa yeri bato yûhu ijiphtiyequina puhto pehe yûhu poto peheru yûhu bese docoriquinare ohõ saha ni yahutja: “Yûhu Pacu masare quehnoano yere. Ahri yehpare bajumehnenopu musa ye ijiatire tiquiro puhtoro ijire quehnoyu tuhasari Cohãcjû. Sa yena vojopure tiquiro quehnoriropure ijina ahtaya. <sup>35</sup>Yûhu ujua ahbagû musa pehe yûhure ihyayere ohori. Yûhu aco wuogû yûhure musa sihõri. Musa cahapu yûhu tinigû yûhure ihña masiedapenata yûhure quehnoano piti cari musa. <sup>36</sup>Suhti mariegu yûhu ijigû ihñana musa pehe yûhure suhti sãari. Dohatigu yûhu ijigû musa yûhure ihñana ahtari. Peresupu yûhu ijigû gûhure yûhure ihñana ahtari musa”, niitja quehnoañequinare. <sup>37</sup>Yûhu sa nigû tuhoye tiquina yûhure sinitueta: “¿Puhto, dahse ijigû mûhu ujua ahbagû mûhure ihyayere ohori usã? ¿Dahse ijigû mûhu aco wuogû mûhure sihõri usã? <sup>38</sup>¿Dahse ijigû mûhure ihña masiedapenata mûhure quehnoano piti cari usã? ¿Dahse ijigû suhti mariegu mûhu ijigû mûhure suhti sãari usã? <sup>39</sup>¿Dahse ijigû mûhu dohatigû o peresupu mûhu ijigû gûhure mûhure ihñana esari usã?” nieta yûhure. <sup>40</sup>Tiquina sa ni sinitugû tuhogu yûhu puhto tiquinare yahutja. “Ijirota masare niita niaja. Ahriquina yeequina mehna cjëno ihyo ijiriquiro tiquiro ijiepeguta, tiquirore musa sata yeri. Sa ijiriquirore sa yena, yûhure yero saha yena nidi musa tiquinare”, ni yahutja.

<sup>41</sup>‘Quehnoañequinare yûhu sa ni yahuri bato yûhu cû pehe peheru ducyequinare yûhu ijiphtiyequina puhto ohõ saha ni yahutja: “Cohãcjû tiquiro buhiri dahreatina ijire musa. Yûhu mehna tojoeracãhña. Pecapu wahaya musa. Ti peca ne yatierare. Watino, tiquiro yequina angele gûhu tiquina ijiatire ti pecare yeri Cohãcjû. <sup>42</sup>Yûhu ujua ahbagû musa pehe yûhure ihyayere ohoerari.

Yuhũ aco wuogũ mũa yuhũre sihõedari. <sup>43</sup>Yuhũre masiedana mũa yuhũre piti caerari. Sa ihña cãri. Suhti mariegũ yuhũ ijiepegũta, yuhũre suhti sãaedari mũa. Dohatigũ yuhũ ijigũ peresupũ yuhũ ijigũ gũhũre sa ihña cãri mũa yuhũre”, ni yahutja tiquinare ñañequinare. <sup>44</sup>Yuhũ sa nigũ tuhoye tiquina yuhũre sinitueta: “¿Pũhto, mũhu ẽjua ahbagũ, mũhu aco wuogũ, usã masiedigũ mũhu ijigũ, suhti mariegũ mũhu ijigũ, dohatigũ mũhu ijigũ, peresupũ mũhu ijigũ dũhse ijigũ usã pehe mũhũre yedohoerari?” ni sinitueta yuhũre. <sup>45</sup>Tiquina sa ni sinitugũ yuhũ tiquinare ohõ saha ni yahutja: “Ijirota mũsare niita niaja. Ahriquina yeequina mehna cẽũno ihyo ijiriquireore mũa ne yedohoerari. Sa ijiriquireore mũa yedohoerana, yuhũreta sa yena nidi mũa”, ni yahutja tiquinare. <sup>46</sup>Sa yero tiquinare sa buhiri dahreducurota Cohãcũ. Ti buhiri dahreye ne pihtisi. Sa ye, quehnoañequina pehe ijipihtiye decori quehnoano ijjeta, ni yahuri Jesu.

**Pahia pũhtoa, judio masa bucũna mehna Jesure wejẽ duahye**  
(*Mr 14.1-2; Lc 22.1-2; Jn 11.45-53*)

**26** <sup>1</sup>Ti ijipihtiyere tiquiro buheri bato Jesu usãre tiquiro buhenare yahuri: <sup>2</sup>—Pũa deco bato pascua ijjirota. Tire mũa masine. Ti pjere yuhũ masure Cohãcũ ohorigũre ñeheeta. Ñeheñe, yuhũre curusapũ wejẽeta, nidi tiquiro usãre.

<sup>3</sup>Sa ye pahia pũhtoa, judio masa bucũna gũhu cahmecoahye. Caifa pahia pũhoro ya wuhũpũ cahmecoahye tiquina. <sup>4</sup>Topũ cahmecoa, tiquina ni mehoñe mehna Jesure ñehe tiquina wejẽatire cahme yahuye niahye.

<sup>5</sup>—Bose deco ijigũ tiquirore ñehedacũhna, “Masa usuari”, nina, niahye tiquina basi.

**Numino ehme sitiye uhse mehna Jesure pio peoahye**  
(*Mr 14.3-9; Jn 12.1-8*)

<sup>6</sup>Ti pjere Simo cami bucũ mũa wihiro ijimediquiro ya wuhũpũ ijiri Jesu. Tiquiro ijiri maca Betania wame tiri maca ijiri. <sup>7</sup>Ti wuhũpũ tiquiro ihyari watoa ihcãcoro numino ehme sitiye ne cãhta, Jesu dapu bui pio peori. Ti ehme sitiye alabastro wame tiriapũ pose tiri. Wapa bujũyẽ co ijiri. <sup>8</sup>Ticoro sa pio peogũ ihñana usã Jesu buhena usuã.

—¿Dũhsero ahricoro ahri core wapa bujũyere sa ye siteajari? <sup>9</sup>Ti ehme sitiye duaboaya. Sa duaro pajiro wapa ñeheboaya. Sa ñeheno ti niñerure pejecũoyequinare ohoboaya ahricoro, nii usã tiquiro buhena.

<sup>10</sup>Usã sa ni usuagũ ihñano, Jesu yahuri usãre:

—Sa niedacãhña tiorore. Yuhũre quehnoano yero nine. <sup>11</sup>Pejecũoyequina pehe mũa mehna sa ijiducuenta. Sa yena tiquina pehere mũa oho masine. Yuhũ pehe ahri yehpapũre mũa mehna sa ijiducusi. <sup>12</sup>Yuhũre tiquina yato pano yuhũ pagũre quehnoyuro, ticoro yuhũre pio peori. <sup>13</sup>Ijirota mũsare niita niaja. Ijipihtiro ahri yehpapũ quehnoañe buheyere tiquina yahuropũ

ahricoro yojopure ticoro yerire yahueta. Tiquina sa yahugū tūhoye ticorore masa peyequina wacūeta, ni yahuri Jesu usāre.

**Juda Iscariote Jesure ihña tuhtiequinare ihñoahye**

*(Mr 14.10-11; Lc 22.3-6)*

<sup>14</sup>Ti pjere ihcāquiro usā mehna cjño Juda Iscariote pahia pūtoa cahapū esahye. <sup>15</sup>Esa, tiquinare sinituahye.

—¿Jesure musare yūhū ihñogū noho puno wapa yenatari mūsa? ni sinituahye tiquinare.

Tiquiro sa nigū tiquina tiquireore treinta cjoeri plata cjoerire ohoahye.

<sup>16</sup>Tiquina sa ohogū Juda pehe Jesure tiquiro ihñoati ñamine cohero niahye.

**Jesu tiquiro buheyequina mehna tiquiro ihya bato tiri deco ijiahye**

*(Mr 14.12-25; Lc 22.7-23; Jn 13.21-30; 1 Co 11.23-26)*

<sup>17</sup>Sa ye pugū yeye moremehneñe pāre tiquina ihyati deco bose deco iji dūcari deco usā tiquiro buhena Jesu cahapū waha, sinituu tiquireore:

—¿Noho boropū bose deco ijigū mari ihyatire quehnoyu dutigū ohoutjari mūhū usāre? nii tiquireore.

<sup>18</sup>Usā sa nigū tiquiro yūhtiri:

—Jerusalēpū wahaya. Topū ijiriquireore ohō saha ni yahuya: “Marine buheriquiro tiquiro ñano yūhdūati deco mehenogā dūhsatjiñhohti. Pascua ijigū mūhū ya wūhūpū Jesu usāre tiquiro buhenare siho ihyati ijiñhohti”, ni yahuya ti wūhū upūrore, ni ohori Jesu usāre.

<sup>19</sup>Sa yena usāre tiquiro dutiriro sahata yena, pascua ijigū usā ihyatire quehnoy usā.

<sup>20</sup>Sa ye ti ñamine usā mehna doce tiquiro buhena mehna ihyaro nidi Jesu. <sup>21</sup>Usā ihyari watoa tiquiro usāre yahuri:

—Ijirota musare niita niaja. Ihcāquiro mūsa mehna cjño yūhūre ihña tuhtiequinare ihñonota yūhūre, ni yahuri tiquiro usāre.

<sup>22</sup>Tiquiro sa nigū tūhona tutuaro bājūa witina, tiquireore sinitu dūcau usā ijipihtina:

—¿Pūhto, yūhūta ijiajari mūhūre ihñoacjū? ni sinituu.

<sup>23</sup>Usā sa ni sinitugū tiquiro yūhtiri:

—Yūhū ihyari papū yūhū mehna soha ihyariquiro ijire yūhūre ihña tuhtiequinare ihñoatiquiro. <sup>24</sup>Panopū yūhūre tiquina ojoariro sahata yūhū masū Cohācjū ohorigū yariagutja. Sa yero yūhūre ihña tuhtiequinare ihñoatiquiro ñano yūhdūrota. Tiquiro pehe masa bajueraro quehnoa yūhdūaboaya. Nano yūhdūeraboaya, nidi Jesu.

<sup>25</sup>Tiquiro sa nigūta tiquireore ihñoatiquiro Juda sinituri:

—¿Buhegū, mūhūre ihñoacjū ijiajari yūhū? ni sinituri tiquiro. Jesu yūhtiri:

—Ūhū. Mūhūta ijire, nidi.

<sup>26</sup>Sa ni yahu tuhasa usã tiquiuro buhena mehna ihyaro taro nidi. Sa yero Jesu pãre ne, Cohãcjüre “Quehnoare”, nidi. Sa ni tuhasa tire nuha, usãre tiquiuro buhenare itiri.

—Ahrire ne, ihyaya. Ahri yuhũ pagu ijire, nidi tiquiuro.

<sup>27</sup>Sa ni tuhasa tiquiuro sihniidi pare ne, Cohãcjüre “Quehnoare”, ni, usãre ohori.

—Musa ijipiltina ahrire sihniña. <sup>28</sup>Ahri yuhũ dii ijire. Peyequina masa tiquina ñañe yerire cohãgũ tagu yariutja. Sa yegu yuhũ diire cohãutja. Cohãcjũ “Musare yuhduotja”, tiquiuro nidiro esagũ yuhũ yariaro mehna tiquiuro nidiro sohtori tirota. <sup>29</sup>Musare niita niaja. Yuhũ Pacu tiquiuro pũthoro ijiropũ ñhmusepũ musa mehna wahma core uhse core sihniitja. Mari sa sihniato pano ahri core sihni nemosi yuhũ, nidi Jesu usãre.

<sup>30</sup>Sa yena Cohãcjũ yere basa tuhasana cunũpũ Olivo wame tidũpũ wahaũ usã.

**Pedro Jesure tiquiuro cohãtire yahuahye Jesu**  
(*Mr 14.26-31; Lc 22.31-34; Jn 13.36-38*)

<sup>31</sup>Topũ usã esagũ Jesu pehe usãre yahuri:

—Mia ñami yuhũre cohã cãnata musa. Ohõ sahata nine Cohãcjũ tiquiuro yere tiquina ojoari pũpũ yuhũre yahuro: “Ovejare ihña ihboriquiro yero saha ijiriquire yuhũ Cohãcjũ cohãgũtja. Yuhũ sa cohãgũ tiquiuro yequina oveja yero saha ijiyequina duhti site cãa wahaeta”, nine Cohãcjũ tiquiuro yere tiquina ojoari pũpũ. <sup>32</sup>Sa yegu Cohãcjũ yuhũre tiquiuro masori bato musa pano Galileapũ wahayutja yuhũ, nidi tiquiuro.

<sup>33</sup>Tiquiro sa nigũ tũhoro ohõ saha nimedi Pedro:

—Yuhũ mehna cjẽna ijipihyequina mũhũre tiquina cohãepẽgũta yuhũ pehe mũhũre ne cohãsi, nimedi Pedro tiquire.

<sup>34</sup>Jesu yũhtiri:

—Ijirota niita niaja mũhũre. Mia ñami canaca tiquiuro yahuato pano “Yuhũ Jesure masiedaga”, niita mũhũ. Ihtia taha sa niita mũhũ, nidi tiquiuro Pedrorre.

<sup>35</sup>Tiquiro sa niepẽgũta Pedro ohõ saha ni yũhtiri:

—Mũhũ mehna yuhũre tiquina wejẽ duepẽgũta “Jesure masiedaga”, ne nisi yuhũ, ni yũhtimedi Pedro.

Sa yena usã gũhũ apequina tiquiuro buhena Pedro tiquiuro nidiro sahata nimi usã Jesure.

**Getsemaní wame tiri wesepũ Cohãcjüre siniahye Jesu**  
(*Mr 14.32-42; Lc 22.39-46*)

<sup>36</sup>Sa ye Getsemaní wame tiri wesepũ Jesu usã tiquiuro buhena mehna waha, topũ esa, usãre nidi:

—Ohõ dujiyuya. Musa ohõ dujiri watoa sohõ cjũnogãpũ Cohãcjüre sinigu wahagu niaja, nidi tiquiuro usãre.

<sup>37</sup>Sa ni tuhasa, Pedrore, p̄aro Zebedeo pohnene tiquina ihtiarore piji c̄ari. Sa yero tiquiro tutuaro b̄jua witi, ñano jeripohna tiahye. <sup>38</sup>Sa b̄jua witiro tiquiro mehna c̄j̄nare tiquiro piji c̄ariquinare oh̄o saha niahye:

—Tutuaro ñano jeripohna tiaja ȳhu. Ȳhure tutuaro pur̄ino saha tuhohuḡu niaja. Soh̄o c̄j̄noḡa wahagu niaja. Oh̄op̄u tojoaya. Sa yena ȳhu mehnata car̄iedac̄ah̄ña m̄sa ḡhu, niahye tiquiro tiquinare.

<sup>39</sup>Sa ni tuhasa mehenoḡa waha nemo, yehpap̄u quehe sa, Coh̄ac̄j̄ure niahye:

—Mai, ȳhu ñano ȳhduatire ye dueragu yerac̄ah̄ña. Ȳhu sa niepeḡuta ȳhu cahmeno saha yerac̄ah̄ña. M̄hu pehe masine. M̄hu cahmeno saha yeya ȳhure, ni siniahye tiquiro Coh̄ac̄j̄ure.

<sup>40</sup>Sa ni tuhasa, ihtiaro tiquiro buheyequina cahap̄u wihiro, car̄iñequinare ih̄ñahye. Tiquinare ih̄ñano, Pedrore oh̄o saha niahye:

—¿Ihc̄a hora waro ȳhu mehna car̄ieḡu iji masiedajari m̄hu?

<sup>41</sup>Quehnoano yeya m̄sa. Sa yena Coh̄ac̄j̄ure siniducuya m̄sa, “Ñano yeari”, nina. M̄sa tuhohuyeh mehna quehnoañene ye duamene m̄sa. M̄sa sehsaro sa ye duepenata tire ye masiedare m̄sa, ni yahuahye Jesu.

<sup>42</sup>Sa ni yahu tuhasa, pari turi waha, Coh̄ac̄j̄ure siniahye:

—Mai, ȳhu ñano ȳhduatire ye duagu yeya ȳhure. M̄hu cahmeno saha yeya, ni siniahye tiquiro.

<sup>43</sup>Ni, tiquiro buheyequina ihtiaro buheyequina cahap̄u pari turi wihiahye t̄ja. Sa wihiro car̄iñequinareta ih̄ñahye t̄ja. W̄jua pur̄i ȳhduahye tiquinare. <sup>44</sup>Sa yero tiquinare c̄u c̄a, pari turi waha, Coh̄ac̄j̄ure siniahye. To pano tiquiro nidiro sahata niahye t̄ja. <sup>45</sup>Sa ni tuhasa tiquiro buheyequina cahap̄u wihi, tiquinare oh̄o saha niahye:

—¿Yojop̄u p̄uritare car̄inina nijari m̄sa? ¿Sor̄ina nijari m̄sa? niahye tiquiro.

Sa ni tuhasa, masa tiquina ahtaḡu ih̄ñano, oh̄o saha niahye.

—Tuhoya. Mianoḡata ȳhu masure Coh̄ac̄j̄u ohorigure ñañequinare ohoeta ȳhure. <sup>46</sup>Wahc̄añã. Isa wahana. Ih̄ñañã. Ȳhure ih̄ña tuhtieyquinare ih̄ñoatiquiro oh̄op̄u ahtare, niahye tiquiro.

### Jesure ih̄ña tuhtieyquina tiquirore peresu yeahye

(*Mr 14.43-50; Lc 22.47-53; Jn 18.2-11*)

<sup>47</sup>Tiquiro sa nino watoa us̄ã mehna c̄j̄no ijimediquiro Juda pehe wihiri. Masa peyequina ahtari tiquiro mehna. Tiquina pahia p̄h̄toa, judio masa b̄c̄una ḡhu tiquina ohoriquina ijiri. N̄oseñe p̄j̄inine, yuca tiari ḡhure c̄ori. <sup>48</sup>Coã warore Jesure ih̄ña tuhtieyquinare ih̄ñoatiquiro masare oh̄o saha ni yahuyu tuhasahye:

—Ȳhu wahsupu ihmidiquirota ijirota m̄sa ñeheatiquiro. Tiquirore ȳhu ihmidi bato ñeheña tiquirore, niahye Juda tiquinare.

<sup>49</sup>Sa ye wihiro Jesu cahap̄u duita wahari.

—¿Buhegu, ijijari m̄hu? ni, tiquirore wahsupu ihmidi.

<sup>50</sup>Tiquiro sa ihmiḡu Jesu oh̄o saha nidi:

—Ȳhu acaȳu, oh̄op̄ure m̄hu yei t̄u ahtarire yeya m̄hu, nidi tiquiro.





(San Mateo 26.50)

Sa ye tiquina Jesure ñehedi.

<sup>51</sup>Tiquina sa yegū ihñano Jesu mehna cjño tiquiro ñoseni pjine tuā we ne, pahia puhtoro cahacjūnore cahmonore dute pahrē cāri. <sup>52</sup>Tiquiro sa yegū ihñano Jesu tiquirore yahuri.

—Muhū ñoseni pjine ihboya. Apequinare muhū ñosegū tiquina ñose cahmegū yariagūta muhū. <sup>53</sup>Yuhū Pacure yuhure yuhū yedoho dutigū tiquiro pehe peyequina angelere doce cururire yuhū caharu ohoboaya tiquiro. ¿Tire masiedajari muhū? <sup>54</sup>Sa yedohoboriquiro tiquiro ijiepegūta tiquirore yuhure yedoho dutisi yuhū. Yuhū sa dutieragū Cohācjū yere tiquina ojoari pū ti nidiro sahata sa waharota, nidi tiquiro.

<sup>55</sup>Sa ni tuhasa masare yahuri tiquiro:

—¿Duhse ijiro boro mūsa ñoseñe pjīni mehna, yucu tiāri mehna yaque bucurore yero saha mūsa yuhure ñehena ahtajari? Decoripe Cohācjū wuhuru musare yuhū buhe dujigū, mūsa yuhure ne ñehedari. <sup>56</sup>Sa ijiepegūta ahri ijipihtiye sa waharo nine Cohācjū yere yahu muhtariquina tiquina ni ojoariro sahata, nidi Jesu.

Tiquirore tiquina sa ñehegũ ihñana usã tiquiro buhena tiquirore cohã oma cãa wahau usã.

**Judio masa puhtoahy Jesure sinituahye**

(Mr 14.53-65; Lc 22.54-55, 63-71; Jn 18.12-14, 19-24)

<sup>57</sup>Sa ye tiquirore ñehediquina pahia puhtoro Caifa wame tiriquireo ya wuhuru ne sahye tiquirore. Ti wuhuruta marine judio masare buheyequina, bucna gũhu cahmecoahye. <sup>58</sup>Topu Jesure tiquina neagũ Pedro yoaropu tiquinare ihña nũnu tãhye. Sa nũnu tãno Caifa ya wuhure cahmotari sahrĩnore esa, ti sahrĩno puhiapu sajàa wahahye. Sajã sa, ti wuhure cohteyequina surara mehna dujjahye. Jesure tiquina dũhse yegũ ihñano taro niahye.

<sup>59</sup>Sa ye pahia puhtoahy, apequina puhtoahy mehna Jesure wejẽ duti duaye, ni mehoñe mehna tiquirore tiquina ñano buhiri dahreatire wacũ macamahye. <sup>60</sup>Tiquina yahusãtire wacũ bocaerahye. Sa wacũ bocaerapeta peyequina masa tiquirore sa ni meho yahusã maca cãhye. Sa ye puaro tiquina bato wihiyequina tiquirore yahusãhye tja.

<sup>61</sup>—Ahriquireo ohõ saha nidi: “Cohãcjũ wuhure cohã masiaja. Sa cohãgu ihtia deco wahaboro ti wuhure pari turi yeitja”, tiquiro nigũ tuhõu usã, ni yahusã maca cãhye Jesure.

<sup>62</sup>Tiquina sa nidi bato pahia puhtoro wahcãdũca sa, Jesure sinituahye:

—¿Ahriquina mũhure tiquina yahusãepẽgũta tiquinare yũhti cahmedajari mũhu? niahye puhtoro.

<sup>63</sup>Tiquiro sa nigũ tuhõeperota Jesu sata tuhõtu cãhye. Tiquiro sa yũhtieragũ ihñano pahia puhtoro pari turi sinituahye tja:

—Cohãcjũ catiriquireo wame mehna poto niña mũhu. Mũhu sa niedagũ tiquiro mũhure buhiri dahrerota. Yahuya usãre. ¿Cristo Cohãcjũ macũta ijjajari mũhu? ni sinituahye tja.

<sup>64</sup>Tiquiro sa nigũputa Jesu yũhtiahye:

—Tiquirota ijjaja. Mũsare poto yahugũta niaja. Came yũhu masũ Cohãcjũ ohorigũ yũhu Pacũ tutuariquireo cahapu tiquiro poto peherũ yũhu dujjigũ ihñanata mũsa. Sa yena uhmũse cjẽ ehmeo cururi bui yũhu ahtagũ gũhure ihñanata mũsa, ni yũhtiahye Jesu.

<sup>65</sup>Tiquiro sa nigũ tuhõro pahia puhtoro tiquiro sañari suhtirore tuhũrẽ cãhye apequinare “Usua yũhdũare”, ni ihña masi dutiro.

—Cohãcjũre pajiro ñano yahuducuro nine ahriquireo. Sa ye tiquiro ñano yahuducuyere tuhõ tuhasaja mari. Sa ye topequinata yahusãahdo ahriquireo. Ohõputa tiquiro ñano yahuducugũ tuhõaja mari basita. <sup>66</sup>¿Dũhse yenatari mari yojopũre ahriquireo? ni sinituahye tiquiro apequina puhtoahy.

—Tiquiro ñari buhiri wejẽ cãno cahmene tiquirore, ni yũhtiahye tiquina.

<sup>67</sup>Tiquina sa nidi bato tiquiro wũhdoare sihco puti ohõ, tiquirore quẽpeahye tiquina. <sup>68</sup>Tiquirore quẽpe tuhasa, ohõ saha niahye tiquirore:



(San Mateo 26.62)

—¿Noa pehe m̄hure quēajari? Cristo ijigū ih̄nedapeguta yahuya us̄are, ni buj̄upeahye tiquina.

—Tiquirore masiedaga, niahye Pedro Jesure  
(Mr 14.66-72; Lc 22.56-62; Jn 18.15-18, 25-27)

<sup>69</sup>Sa ye ti w̄h̄u cahar̄u ijiri paar̄u quehnoari paar̄u Pedro pehe duj̄iahye. Tiquiro sa duj̄igū ih̄n̄ano pahia puhtoro cahacj̄ono tiquiro cahar̄u esaro, oh̄ saha niahye:

—M̄h̄u ḡūh̄u Jesu Galilea cj̄ūno mehna ijiri, niahye ticoro.

<sup>70</sup>Ticoro sa nigū t̄uhoro, Pedro oh̄ saha niahye:

—¿D̄uhse ni maca c̄o niajari m̄h̄u? M̄h̄u nidiquirore ne masiedaga ȳh̄u, niahye Pedro ticorore ijipihtiyequina tiquina t̄uhorop̄u.

<sup>71</sup>Tiquiro sa nidi bato ti paa cj̄ā sahr̄ino sopecaha cahar̄u wahahye Pedro. Top̄u tiquiro ijigū apecoro cahacj̄ono tiquirore ih̄n̄ano, top̄u ij̄iyequinare oh̄ saha niahye:

—Jesu Nazare cj̄ūno mehna ijiri ahriquiro, niahye ticoro Pedrorre t̄ja.

<sup>72</sup>Ticoro sa nigū t̄uhoro Pedro ȳhtiahye:

—Coh̄ācj̄ū mehna poto nii niaja. Tiquiro m̄h̄u nidiquirore ne masiedaga ȳh̄u, ni ȳhtiahye Pedro.

<sup>73</sup>Sa ye came cj̄ūno top̄u ducuyequina Pedro cahar̄u waha, tiquirore oh̄ saha niahye t̄ja:

—Poto tjire. Jesu yequina mehna cǰũ ijire mǰhũ gũhũ. Tiquina yero saha yahuducure mǰhũ, niahye tiquina Pedrorre.

<sup>74</sup>Tiquina sa nigũ Pedro yǰhtiahye:

—Poto Cohǰcǰũ mehna nii niaja mǰsare. Yǰhũ poto yǰhũ niedagũ Cohǰcǰũ yǰhũre buhiri dahreahro. Tiquirore mǰsa nidiquirore ne masiedaga yǰhũ, ni yǰhtiahye tiquiro tiquinare.

Tiquiro sa nigũta canaca yahuahye. <sup>75</sup>Tiquiro yahugũ tǰhoro Jesu tiquirore nidire wacũahye. “Canaca tiquiro yahuato pano ‘Jesure masiedaga’, niita mǰhũ. Ihtia taha waro sa niita mǰhũ”, Jesu tiquirore nidire wacũahye Pedro. Sa wacũno, ti sahrĩnore wijia, tutuaro utiahye.

**Pilato caharũ Jesure neahye**  
(*Mr 15.1; Lc 23.1-2; Jn 18.28-32*)

**27** <sup>1</sup>Sa ye bohrea quehagũrũ pahia pǰhtoa mari judio masa bǰscna gũhũ Jesure tiquina wejẽ dutiatire cahme yahuducuahye. <sup>2</sup>Tiquina sa yeri bato tiquirore dǰhte, Pilato caharũ nea, tiquirore ohoahye Pilatore. Pilato pehe ti yehpa cǰena pǰhthora ijiri.

**Juda Iscariote yariaa wahahye**

<sup>3</sup>Sa yero Jesure tiquina wejẽ dutigũ ihñano Juda pehe Jesure ihñoriquiro tiquirore tiquiro ihñorire tutuaro wacũ bǰjua witiahye. Sa bǰjua witiro treinta cjoeri tiquiro ñehedi niñeru cjoerire wiaro waharo, pahia caharũ, bǰscna caharũ esa, ohõ saha niahye:

<sup>4</sup>—Jesu mǰsare yǰhũ ihñoriquiro ñañe marieniquiro tiquiro ijiepegũta tiquina wejẽ dutiri tiquirore. Sa yegũ mǰsare tiquirore ihñogũ ñano yegũ niaya yǰhũ, ni yahuahye Juda tiquinare.

Tiquiro sa ni yahuri bato tiquina yǰhtiahye:

—Sata yecũnahdo. Ʋsǰre dǰhseati ijierare ti mǰhũ sa niñe. Mǰhũ dihita sa ni tǰhoture tire, ni yǰhtiahye tiquina tiquirore.

<sup>5</sup>Tiquina sa ni yǰhtiri bato Cohǰcǰũ ya wǰhũrũ Juda tiquiro ye niñeru cjoerire doque site cũahye. Doque site cũ, wahaa wahahye. Waha, yuta dare dǰhte ohõ, tiquiro basi wamũare tu suha, uhpu cǰũ sa, yariaa wahahye.

<sup>6</sup>Sa ye pahia pǰhtoa niñeru cjoerire ne, ohõ saha niahye:

—Ahri niñerure Cohǰcǰũ wǰhũ cǰǰ acaropũ niñeru ihbore acaropũ mari cũ masiedaja. Ahri niñeru mehnata masũnore wejẽ dutiri. Sa ye mari ye dutiye marine sa ijiye niñerure ihbo dutierare, niahye tiquina basi.

<sup>7</sup>Tiquina sa nidi bato “Ohõ saha yeihna”, tiquina ni yahuri bato dihi suturire yeriquiro ya yehpare dúahye. Ti cjoeri mehna dúahye. Ape sie cǰena tiquina wihi tiquina yariagũ tiquina yati yehpa ijiatore ti yehpare dúahye. <sup>8</sup>Sa ye ti yehpare “Dii yehpa”, wame yeri masa. Yojoerũ gũhũre sata wame tire. <sup>9</sup>Ahri ijipihtiye sa wahahye Jeremia panopũ “Sa waharota”, tiquiro ni ojoariro sahata. Tiquiro Cohǰcǰũ yere yahu mǰhtariquiro ijiahye. Ohõ saha ni ojoahye tiquiro: “Treinta

niñeru cjoerire plata cjoerire “To punota wapa yenata tiqirore usã ñeheatire”, nieta Israe masa. <sup>10</sup>Sa ye ti cjoeri mehna dihi suturire yeriquiro ya yehpare dúeta tiquina. Ohõ sahata yuhure ye dutiri Cohãcjũ”, ni ojoahye Jeremia panopũ.

### Pilato Jesure sinituahye

(Mr 15.2-5; Lc 23.3-5; Jn 18.33-38)

<sup>11</sup>Sa ye Pilatore tiquina ohoi bato tiqiro pehe Jesure sinituahye:

—¿Potota judio masa pũhtota ijiajari mũhũ? ni sinituahye Jesure.

—Mũhũ nino sahata ijiaja, ni yũhtiahye Jesu.

<sup>12</sup>Sa ni yũhtieperota, pahia pũhtoa, bũcũna gãhũ tiquina tiqirore yahusãgũ yũhtierahye Jesu. <sup>13</sup>Tiqiro sa yũhtieragũ ihñano Pilato sinituahye:

—¿Ahri ijipihtiye mũhũre tiquina yahusãrere tũhoerajari mũhũ? ni sinituahye tiqiro Jesure.

<sup>14</sup>Tiqiro sa ni sinituepegũta Jesu ne mehenogã yũhtierahye. Tiqiro sa yũhtieragũ ihñano Pilato ne dũhse ni masiedahye.

### Jesure wejẽ dutiahye

(Mr 15.6-20; Lc 23.13-25; Jn 18.38-19.16)

<sup>15</sup>Cũhmaripe pascua ijigũ masa yaqiro ijiatiqirore ihcãqiro peresupũ ijiriquirore Pilato sa wio basaducue tiahye. <sup>16</sup>Ti pjere Barrabá wame tiriquiro peresupũ ijiyahye. Tiqirore masiahye masa. <sup>17</sup>Sa yero tiquina cahmecoagũ Pilato pehe sinituahye tiquinare:

—¿Diquiro pehere mũsare wio basaboagari yũhũ? ¿O Barrabá pehere o Jesure Cristo tiquina nidiquirore wio basaboagari yũhũ? ni sinituahye tiqiro.

<sup>18</sup>Jesure masa cahĩgũ ihñañe judio masa mari pũhtoa tiqirore ihña tuhtiahye. Sa ihña tuhtiye tiqirore ohoahye Pilatore. Sa yero masa tiquina cahĩdi buhiri tiquina ihña tuhtirire masino Pilato Jesure wio duamahye.

<sup>19</sup>Sa ye Pilato masare ñañe yeyequinare tiqiro beseri pahtapũ dujigũ tiqiro namono tiqirore quti ohoahye: “Mia ñamine Jesure quehẽgo, tutuaro ñano yũhdũ. Sa yegũ tiqirore ñañe marieniquirore ne sijoro saha yeracãhña mũhũ”, ni yahudoqueoahye tiqiro namono Pilatore.

<sup>20</sup>Sa ye coã waropũre pahia pũhtoa, bũcũna gãhũ masare ohõ saha ni duti tuhasahye. “Barrabá pehere wio duti, Jesu pehere wejẽ dutiya”, ni dutiahye masare. <sup>21</sup>Sa yero Pilato masare sinituahye:

—¿Ahriquina pũarore diquiro pehere mũsare wio basaboagari yũhũ? ni sinituahye.

—Barrabá pehere wio basaya usãre, ni yũhtiahye.

<sup>22</sup>—¿Ahriquiro Jesu Cristo tiquina nidiquiro pehere dũhse yeitari yũhũ, mũsa sa ni saũducugũ? ni sinituahye tiqiro.

—Curusapũ quẽ biha wejẽña tiqirore, ni yũhtiahye masa ijipihtiyequina.

<sup>23</sup>—¿Yabe borore ñañene yeari ahriquiro, mũsa sa nigũ? niahye tiqiro. Tiqiro sa nigũ tũhoye tiquina tutuaro mehna saũducuahye:

—Curusapũ quẽ biha wejẽña tiquirore, ni sañuducuahye masa tiquirore.

<sup>24</sup>Tiquina sa ni sañuducugũ tũhoro, tiquirore tiquina tũho dueragũ ihñano “Masa usua, cahmequeboaga”, nino, yũhtiro ohõ saha yeahye Pilato. Masa tiquina ihñonopũ tiquiro omo coseahye. Sa omo cosero ohõ saha niahye.

—Ahriquiroro wejẽdi buhiri yee buhiri ijierare. Mũsa ye buhiri ijire, nino omo coseahye.

<sup>25</sup>Tiquiro sa nigũ tũhoye ijipihtiyequina masa ohõ saha niahye.

—Ahriquiroro wejẽdi buhiri usã, usã pohna gũhu usã ye buhiri ijiahro, niahye masa.

<sup>26</sup>Tiquina sa nigũ tũhoro Pilato Barrabãre peresupũ ijiriquirore wio dutiahye masa tiquina cahmeniquirore. Sa ye tuhasa Jesu pehere yuta dari mehna tana duti, tiquirore curusapũ wejẽ dutiro ohoahye surarare.

<sup>27</sup>Tiquiro sa ohogũ Pilato ya wũhũpũ tiquiro yequina surara Jesure neñe esahye. Sa ye tiquina surara ijipihtiyequina Jesu cahapũ cahmecoahye.

<sup>28</sup>Sa ye tiquiro suhtire tu we ne, pũhtoro ya suhtiro saha bajuri suhtirore tiquirore sãahye. <sup>29</sup>Sa sãa tuhasa, pota behtore ye tuhasa, tiquiro dapu bui duhu peoahye. Sa duhu peo tuhasa, yucũgũre poto pehe dahra suhahye. Dahra suha tuhasa, dũsepe curi mehna quehe sa, bũjũpeahye tiquirore.

—Quehnoano ahtaya. Judio masa pũhto, quehnoano ahtaya, ni bũjũpeahye tiquirore.

<sup>30</sup>Sa nieta tiquirore sihco puti ohõ, tiquina dahra suhadũre tiquirore tũã we ne, tiquiro dapure quẽahye tũ mehnata. <sup>31</sup>Tiquina sa bũjũperi bato tiquina sãari suhtirore tu we ne, tiquiro ye suhti pehere sãahye tja. Sãa tuhasa, curusapũ wejẽñe tehe, tiquirore ne wijiahye.

### **Tiquina Jesure curusapũ quẽ biha, wejẽahye**

*(Mr 15.21-32; Lc 23.26-43; Jn 19.17-27)*

<sup>32</sup>Tiquirore ne cã, Simo wame tiriquirore Cirene cãnore piti ca, tiquirore Jesu wũari curusare wũa cã dutiri.

<sup>33</sup>Wũa cã Gólgota wame tiropũ esari. “Gólgota”, nino “Dapu pehtoro”, nino nine. <sup>34</sup>Sa ye vinore suẽñe co mehna tiquina moreñe core Jesure ohomedi. Ti acore sihni tuhu, sihniedari tiquiro.

<sup>35</sup>Sa ye Jesu ye suhtire tiquina tu we nedi bato tiquirore curusapũ quẽ bihari tiquina. Sa quẽ biha tuhasa, tiquiro ye suhtire “¿Noa yaro ijirrotari ohõ?” ni, cahme doqueperi, ni ojoahye panopũ. <sup>36</sup>Doquepe tuhasa tiquirore ihña dujuducuri tiquina. <sup>37</sup>Tiquiro dapu bui curusapũ ohõ saha ni ojoari pĩne duhu ohõri tiquina tiquiro ñañe buhirire yahu duaye. “AHRIQUIRO JESU JUDIO MASA PũHTORO LJIRE”, ni ojoari tiquina ti pĩne.

<sup>38</sup>Came pũaro yaque bũcũnare Jesu cahapũ apeye curusaripũ quẽ biha docori tiquina. Ihcãquiro tiquiro poto pehe, apequiro tiquiro cũ pehe pehe quẽ biha docori tiquina. <sup>39</sup>Curusari cahapũ yũhdũ cãnequina Jesure ihña, tiquina dapu pacare yure, tiquirore ñano yahuducuri:

40—¿Cohācjũ wuhũre cohã, ihtia deco wahaboro pari turi ti wuhũre dahreborigũ ijajari mũhũ? Cohācjũ macũ ijigũ mũhũ basi dijia taya. Sa yegũ mũhũ basi yedohoya, nidi masa.

41 Sata ni bũjũperi tiqirore. Pahia pũthoa gũhũ, marine judio masare buheyequina gũhũ, bũcũna gũhũ tiqirore sa ni bũjũperi.

42—Tiqiro apeqũnare yũhdũoriquiro ijiro tiqiro basi gũhũ yũhdũoahro. “Israe masa pũtho ijajaja”, nimene tiqiro. Sa yena tiqiro basi dijia tagũ ihũana tiqirore wacũ tutuanata. 43Tiqiro pehe Cohācjũre wacũ tutuamene. Sa yero “Cohācjũ macũ ijajaja”, nimene tiqiro. Tiqiro sa ijigũ Cohācjũ pehe tiqirore yedohoahro, ni bũjũperi tiquina.

44 Yaque bũcũna tiqiro cahapũ tiquina quẽ bihanohriquina sata tiqirore bũjũpe, ñano yahuducuri tiquina gũhũ.

### Jesu yariaa wahahye

(Mr 15.33-41; Lc 23.44-49; Jn 19.28-30; He 6.19-20; 10.19-20)

45 Sa ye coheri pje ijigũ ihtia hora waro ijipihitropũ nahitiano ijiri.  
46 Sa yero ti pjere nahitia yũhdũgũ waro Jesu tutuaro sañuducuri:

—¿Elf, Elf lema sabactani? nidi tiqiro. Sa nino ohõ saha nino niahye: “¿Yũhũ Pacũ, yũhũ Pacũ, dũhsegũ yũhũre cohājari mũhũ?” nino nidi.


47 Tiqiro sa nigũ tũhoye ihquẽquina topũ ducuyequina ohõ saha nimedi:

—Cohācjũ yere yahu mũhtariqirore Eliare pijoro niboaga, nimedi tiquina.

48 Sa yero ihcāquiro tiquina mehna cjũno oma cã, aco ihmini suhte mehna vino suẽne core soha tuhasa, yucũgũ sohtoapũ dũhte ohõ, Jesu cahapũ esa, tiqirore sihõmedi. 49 Tiqiro sa yegũ ihũãne apeqũna sihõriqirore ohõ saha nidi:

—Cohteniña. Elia ahriqirore tiqiro yũhdũogũ ihũãhna mari, nidi apeqũna.

50 Tiquina sa nidi bato pari turi sañuducu, Jesu pehe yariaa wahari. 51 Tiqiro yariagũta Cohācjũ wuhũ cjã suhtiro cahsero, topũ tiquina cahmotari cahsero deco tũhnũ maa dijia, cjũ saa wahahye. Sa yero yehpa gũhũ ñuhmidi. Sa ñuhmigũ Ʃtã paca bũjũye paca wahtia wahari. 52 Sa ye masa coperi parĩgũ, peyequina Cohācjũ



(San Mateo 27.48)



(San Mateo 27.51)

yequina m̄na paṇoṇ yariariquina m̄na masa wijiāhye. <sup>53</sup>Masa wija, Jesu masa wijiari bato ti coperire cohā cā, quehnoari macap̄ Jerusalēp̄ wahari tiquina. Top̄ tiquina wahagū peyequina masa ihñāhye tiquinare.

<sup>54</sup>Sa ye ti ijiphtiyere ihñāñe, yehpa ñuhmigū ihñāñe, surara p̄h̄toro tiqiro yequina surara mehna ihña maria wahari. Tiquina Jesure curusap̄ ijiriquirore cohteyequina ijiri. Ihña maria waha, ohō saha nidi: —Ijirota ijire. Ahriqiro Cohācjū mac̄nota ijimeya, nidi tiquina.

<sup>55</sup>Sa ye Galileap̄ Jesu mehna ahtariquina numia tiqirore yedohoriquina numia yoarop̄ tiqirore curusap̄ ijiriquirore ihñaducuye nidi. <sup>56</sup>Tiquina numia mehna María Magdalena ijiri. Apecoro María wame tiricoro gūh̄ ijiri. Ticoro pehe Santiago, José gūh̄ pacoro ijiri. Apecoro Zebedeo namono ijiri.

**Jesu pagure masa copeṇ cūahye José**  
(Mr 15.42-47; Lc 23.50-56; Jn 19.38-42)

<sup>57</sup>Sa ye ñamicahap̄ José Arimatea cj̄ño doeri cj̄ up̄ro top̄ wihiahye. Tiquiro Jesu buheriquiro ijiri. <sup>58</sup>Wihi, Pilato cahap̄ esa, Jesu pagure siniahye. Tiquiro sa sinigū tuhoro Jesu pagure tiqirore oho dutiahye Pilato. <sup>59</sup>Tiquiro sa dutiri bato José pehe tiqiro pagure ne dijio, quehnoari suhtiro wete marieni suhtiro mehna tiqiro pagure wahmeahye. <sup>60</sup>Wahme tuhasa, José tiqiro ya masa copeṇ cūahye Jesu pagure. Ti cope tiquina ut̄p̄r seheri cope wahma cope ijiri. Ti copeṇ ne sajā duhu cū tuhasa, pajiria ut̄re



tu torē cāhye tia mehna biharo taro. Biha tuhasa, waha wahahye. <sup>61</sup>Sa ye María Magdalena, apecoro María mehna ti copere ihña dujiducuahye.

### Jesure tiquina cūri copere surara cohteahye

<sup>62</sup>Sa ye ape deco, pascua ijiatire tiquina quehno deco bato, saurú ijigū pahia puhto, fariseo masa gūhu Pilato cahapū cahmecoahye.

<sup>63</sup>Cahmecoa tuhasa ohō saha niahye tiquina Pilatore:

—Puhto, tiquiro ni mehoriquiro Jesu catiro ohō saha niahye: “Ihtia deco wahaboro masa wijiagutja yūhu”, niahye tiquiro. <sup>64</sup>Tiquiro sa nidiquiro ijigū tiquiro buheyequina pehe tiquiro pagure yaqueboaga. Sa yaqueye masare ohō saha niboaga: “Jesu masa wijiari”, niboaga tiquina. Tiquiro Jesu pehe masare ni mehono nidi. Sa ijiepegūta tiquiro buheyequina pehe “Tiquiro masa wijiari”, niñe, ni mehoñe nieta. Sa yero Jesu tiquiro ni mehoriro yūhduoro tiquina ye ni mehoñe pehe ña yūhduarota. “Sa yaqueari”, nigū ihtia deco waro tiquiro masa copere mūhu yequina surarare cohte dutiya, niahye tiquina Pilatore.

<sup>65</sup>Pilato yūhtiahye:

—Au. Ti copere cohteahro. Sa yena masa gūhu masa ye masino puno ti copere quehnoano cohteya, niahye tiquiro tiquinare.

<sup>66</sup>Tiquiro sa nigū tiquina waha, ti copere biharia utā mehnarūta ñehogūputa wihtā ñeheahye masa tiquina sajāgū ihña masiñe tehe. Sa ye surarare ti copere cohte dutiahye.

### Jesu masa wijiahye

(Mr 16.1-8; Lc 24.1-12; Jn 20.1-10)

**28** <sup>1</sup>Sa ye judio masa mari sori deco saurú pehe yūhdugū domingo ijigū ñami cjūnogā ijigū María Magdalena apecoro María mehna Jesu masa copere ihñañe wahahye. <sup>2</sup>Sa yero duita yehpa tutuaro ñuhmiahye. Sa ñuhmigū mari puhtoro tiquiro yaquiro angel ūhmūsepū ijiriquiro dijia ta, masa copere biharia utāre tu torē cā, tia bui dujiahye. <sup>3</sup>Upo miadoqueoro yero saha quehnoano asi siteahye tiquiro. Sa ye tiquiro suhti ehmeo curua yero saha quehnoano yehseye suhti ijiahye. <sup>4</sup>Tiquiro sa bajuagū ti copere cohteyequina surara cue yūhdūye, nanare yūhduā waha, buigā warona yaria yūhduā wahahye. <sup>5</sup>Sa yero angel pehe tiquina numiare ohō saha niahye:

—Yūhūre cueracāhña. Curusapū tiquina quē bihariquiro, Jesure masa macagū masiāja yūhu. <sup>6</sup>Tiquiro yojopure ohōre mariedare. Tiquiro nidiro sahata masa wijiāa wahari. Tiquiro pagure tiquina cūriroro ihñana ahtaya. <sup>7</sup>Sa yena tiquiro buheyequina cahapū ūmūñano waha, ohō saha ni yahuna wahaya: “Jesu masa wijiari. Sa yero masa pano Galileapū tiquiro wahayurota. Topū tiquirore ihñanata masa”, ni yahuna wahaya masa. Ahrita ijire mūsarē yūhu yahuri quti, niahye angel tiquina numiare.

<sup>8</sup>Tiquiro sa nidi bato tiquina numia masa copepũ ijiye numia sojaro mehna wijia, tiquireore cuepeta bucue yũhdũye mehna Jesu buheyequinare yahuye oma cãa wahahye. <sup>9</sup>Sa wahayequina numiare Jesu piti ca, ohõ saha niahye:

—¿Quehnoano ijijari mũsa? niahye tiquireo.

Tiquiro sa nidi bato, tiquina pehe tiquireo cahapũ esa, dahpocãrine ñehe, tiquireore ño peohye.

<sup>10</sup>—Cueracãhña mũsa. Yũhũ bahanare “Galileapũ wahaya”, ni yahuna wahaya. Topũ yũhũre ihñaeta tiquina, niahye Jesu tiquireo.



(San Mateo 28.20)

**Masa copere cohteyequina surara tiquina ihñarire yahuahye**

<sup>11</sup>Tiquiro sa nidi bato numia wahari watoa ihquẽquina masa copere cohteriquina mehna cjẽna surara, Jerusalẽpũ pahia pũhtoare ijipihtiyere yahu pehoye wahahye. Jesu tiquiro masa copepũ wijiarire yahu peho cãhye. <sup>12</sup>Tiquina sa ni yahugũ pahia pũhtoa, judio masa mari bucũna mehna cahmecoahye. Cahmecoa, yahuducuahye. Sa yeye surarare ni meho dutiye niñerure wapa yeahye.

<sup>13</sup>—Ohõ saha niña mũa masare: “Ñami usã carĩdi bato tiquiro buheyequina pehe masa copepũ wihi, tiquiro pagũre ne cãri jiri”, ni yahuya masare. <sup>14</sup>Mũa sa ni yahugũ Pilato pehe mũa cari yũhduarire tũhoboaga. Tiquiro sa tũhogũ, “Mũsare tuhtiari”, nina, mũare yahu basanata usã tiquirore, niahye tiquina surarare.

<sup>15</sup>Tiquina sa nidi bato surara pehe niñerure ñehe, tiquinare tiquina ni meho dutiro sahata masare yahuye wahahye. Sa ye tiquina ni mehoriro sahata Jesu tiquiro masa copere wijiarire yahuducuri judio masa. Yojořũ gũhũre sata nine tiquina.

**Jesu tiquiro yere buhe dutiro ohoahye tiquiro buheyequinare**  
(*Mr 16.14-18; Lc 24.36-49; Jn 20.19-23*)

<sup>16</sup>Sa ye usã Jesu buhena once buhena cunũpũ Galileapũ ijidũpũ Jesu tiquiro waha dutidũpũ wahaũ usã. <sup>17</sup>Topũ esa, Jesure ihñana, ño peou usã tiquirore. Sa ño peopenata, usã ihquẽquina “Ahriquiro Cohãcjũ macũno ijieraboaga”, ni tũhotumi. <sup>18</sup>Usã sa ño peogũ tiquiro pehe usã cahapũ wihi, ohõ saha nidi:

—Ahri yehpũre, uhmũsepũ gũhũre Cohãcjũ ijipihtiyequina bui tutuayere ohoi yũhũre. <sup>19</sup>Tiquiro sa ohogũ ohõ saha dutiaja mũare: Ijipihtiro cjẽnare yeere buhena wahaya. Yeequina tiquina wahatire buhena wahaya. Sa yena mari Pacũ wame mehna, yũhũ wame mehna, Espĩritu Santo wame mehna tiquinare wame yeya. <sup>20</sup>Sa yena mũare yũhũ dutirire tiquina ye pehoatire buheya tiquinare mũa. Sa yena ahrire yũhũ niatire wacũña: Ijipihtiyere decori ahri yehpa ijero puno mũa mehna sa ijiducugũtja. Mũa mehna yũhũ sa ijiducuatire wacũña mũa, ni yahuri usãre Jesu.